

ओं नमः परमात्मने, श्री महागणपतये नमः,

श्री गुरुभ्यो नमः, हरिः ओं
--

कृष्ण यजुर्वेदीय तैत्तिरीय संहिता

तृतीयं काण्डं

Note: Please refer to the book, TS Kandam 1 for notes and conventions used in this Compilation.

Table of Contents

3	कृष्ण यजुर्वेदीय तैत्तिरीय संहितायं तृतीयं काण्डं.....	3
3.1	तृतीयकाण्डे प्रथमः प्रश्नः – न्यूनकर्माभिधानं.....	3
3.1.1	Appendix	27
3.2	तृतीयकाण्डे द्वितीयः प्रश्नः – पवमानग्राहादीनां व्याख्यानं.....	29
3.3	तृतीयकाण्डे तृतीयः प्रश्नः – वैकृतविधीनामभिधानं.....	53
3.3.1	Appendix	72
3.4	तृतीयकाण्डे चतुर्थः प्रश्नः – इष्टिहोमाभिधानं.....	73
3.5	तृतीयकाण्डे पञ्चमः प्रश्न – इष्टिशेषाभिधानं.....	97

ओं नमः परमात्मने, श्री महागणपतये नमः, श्री गुरुभ्यो नमः

हरिः ओं

3 कृष्ण यजुर्वेदीय तैत्तिरीय संहितायं तृतीयं काण्डं

3.1 तृतीयकाण्डे प्रथमः प्रश्नः – न्यूनकर्माभिधानं

3.1.1.1

प्रजापतिरकामयत प्रजाः सृजेयेति स तपोऽतप्यत स सर्पान्सृजत
सोऽकामयत प्रजाः सृजेयेति सद्वितीयमतप्यत स वयाऽस्य सृजत
सोऽकामयत प्रजाः सृजेयेति स तृतीयमतप्यत स एतं
दीक्षितवादमपश्यत् तमवदत् ततो वै स प्रजा असृजत यत् तपस्तप्त्वा
दीक्षितवादवदति प्रजा एव तद्यजमानः – [] 1

3.1.1.2

सृजते यद्वै दीक्षितोऽमेध्यं पश्यत्यपास्मादीक्षाक्रामति नीलमस्य हरो
व्येत्यबद्धं मनो दरिद्रं चक्षुः सूर्यो ज्योतिषाऽश्रेष्ठो दीक्षे मा माहासीरित्याह

नास्मा॑दीक्षाऽप॑क्रामति॒ नास्य॑ नीलं॒ न हरो॑ व्येति॒ यद्वै
दीक्षि॑तमभि॒वर्ष॑ति॒ दिव्या॑ आपोऽ॒शान्ता॑ ओजो॒ बलं॑ दीक्षां - [] 2

3.1.1.3

तपोऽ॒स्यनि॑र्घ्नन्त्यु॒न्दती॑र्बलं॒ धत्तौ॑जो॒ धत्त॑ बलं॒ धत्त॑ मा मे॒ दीक्षां॑ मा
तपो॑निर्व॒धिष्टे॑त्याहै॒ तदे॒व सर्व॑मात्मन्॒ धत्ते॑ नास्यौजो॒ बलं॑ न दीक्षां॒ न
तपो॑निर्घ्नन्त्यग्निर्वै॒ दीक्षि॑तस्य॒ देवता॑ सोऽ॒स्मादे॒तर्हि॑तिर॒ इव॑ यर्हि॒ याति॑
तमी॑श्वरं॒ रक्षा॑ंसि॒ हन्तो॑ - [] 3

3.1.1.4

भ॒द्राद॑भि॒श्रेयः॑ प्रेहि॒बृह॑स्पतिः॒ पुर॑ ए॒ता ते॑ अ॒स्त्वित्या॑ह॒ ब्रह्म॑ वै दे॒वानां॑
बृह॑स्पतिस्तमे॒वान्वा र॑भते स ए॒नं सं॑ पा॒रय॑त्ये॒ दम॑गन्म दे॒वय॑जनं पृथि॒व्या
इत्या॑ह दे॒वय॑जनं ह्ये॒ष पृथि॑व्या आ॒गच्छ॑ति यो यज॑ते वि॒श्वे दे॒वा यद॑जुषन्त
पूर्व॑ इत्या॒ह वि॒श्वे ह्ये॒तदे॒वा जो॑षयन्ते यद्ब्रा॒ह्मणा॑ () ऋ॒क्सामा॑भ्यां य॒जुषा॑
सन्त॑रन्त इत्या॒ह र्सा॑माभ्यां ह्ये॒ष य॒जुषा॑ सन्त॑रति यो यज॑ते रा॒यस्पो॑षेण
समि॑षा-मदे॒मेत्या॑-हाऽशि॒षमे॑वै तामा॒ शास्ते॑ । 4

(यजमानो - दीक्षा - हन्तो - ब्राह्मणा - शतुर्विंशतिश्च) (A1)

3.1.2.1

एष ते गायत्रो भाग इति मे सोमाय ब्रूतादेष ते त्रैष्टुभो जागतो भाग इति
मे सोमाय ब्रूताच्छन्दोमाना साम्राज्यं गच्छेति मे सोमाय ब्रूताद् यो वै
सोम राजान साम्राज्यं लोकं गमयित्वा क्रीणाति गच्छति स्वाना
साम्राज्यं छन्दासि खलु वै सोमस्य राज्ञः साम्राज्यो लोकः पुरस्तात्
सोमस्य क्रयादेवमभि मन्त्रयेत् साम्राज्यमेवै - [] 5

3.1.2.2

न लोकं गमयित्वा क्रीणाति गच्छति स्वाना साम्राज्यं यो वै तानूनप्त्रस्य
प्रतिष्ठां वेद प्रत्येव तिष्ठति ब्रह्मवादिनो वदन्ति न प्राश्नन्ति न जुह्वत्यथ क्व
तानूनप्त्रं प्रति तिष्ठतीति प्रजापतौ मनसीति ब्रूयात् त्रिरव जिघ्रेत् प्रजापतौ
त्वा मनसि जुहोमीत्येषा वै तानूनप्त्रस्य प्रतिष्ठा य एवं वेद
प्रत्येव तिष्ठति यो - [] 6

3.1.2.3

वा अध्वर्योः प्रतिष्ठां वेद प्रत्येव तिष्ठति यतो मन्येतानभिक्रम्य
 होष्यामीति तत् तिष्ठन्ना श्रावयेदेषा वा अध्वर्योः प्रतिष्ठा य एवं
 वेद प्रत्येव तिष्ठति यदभिक्रम्य जुहुयात् प्रतिष्ठाया इयात् तस्मात् समानत्र
 तिष्ठता होतव्यं प्रतिष्ठित्यै यो वा अध्वर्योः स्वं वेद स्ववानेव भवति
 सुगवा अस्य स्वं वायव्यमस्य - [] 7

3.1.2.4

स्वं चमसोऽस्य स्वं यद्वायव्यं वा चमसं वाऽनन्वारभ्याऽऽश्रावयेथ्
 स्वादियात् तस्मा दन्वारभ्या ऽऽश्राव्य स्वादेव नैति यो वै सोमम-
 प्रतिष्ठाप्य स्तोत्रमुपाकरोत्य प्रतिष्ठितः सोमो भवत्यप्रतिष्ठितः स्तोमो-
 ऽप्रतिष्ठिता-न्युक्थान्यप्रतिष्ठितो यजमानो ऽप्रतिष्ठितो ऽध्वर्युर्वा यव्यं वै
 सोमस्य प्रतिष्ठा चमसोऽस्य प्रतिष्ठा सोमः स्तोमस्य स्तोम उक्थानां ग्रहं
 वा () गृहीत्वा चमसं वोन्नीय स्तोत्रमुपा कुर्यात् प्रत्येव सोमऽस्थापयति
 प्रतिस्तोमं प्रत्युक्थानि प्रति यजमानस्तिष्ठति प्रत्यध्वर्युः । 8

(एव - तिष्ठति यो - वायव्यमस्य - ग्रहं वै - कान्न - वि॒शतिश्च)
(A2)

3.1.3.1

य॒ज्ञं वा॑ ए॒तत् सं भ॑रन्ति य॒त् सो॑म॒क्रय॑ण्यै प॒दं य॑ज्ञ॒मुख॑
ह॒वि॒र्धा॒ने य॒र्हि ह॒वि॒र्धा॒ने प्रा॒चीं प्र॑व॒र्तये॑यु॒स्तर॒हि ते॑नाक्ष॒मुपा॑-
ज्ज्याद्-य॒ज्ञ॒मुख॑ ए॒व य॒ज्ञ॒मनु॑ स॒न्तनो॑ति प्रा॒ज्चम॑ग्निं प्र॒ हर॑न्त्युत् प॒त्नीमा॑
न॒यन्त्य॑न्वना॒सि प्र॑ वर्त॒यन्त्य॑थ॒ वा अ॒स्यैष॑ धि॒ष्णियो॑ ही॒यते॑ सोऽनु॑
ध्या॒यति॑ स ई॒श्वरो॑ रु॒द्रो भू॒त्वा - [] 9

3.1.3.2

प्र॒जां प॒शून् य॑ज॒मान॑स्य श॒मयि॑तो॒र्यर्हि॑ प॒शुमा॑ प्री॒तमु॑द॒ज्चं न॑यन्ति त॒र्हि
तस्य॑ प॒शुश्र॑पण॒ हरे॑त् ते॒नैवैनं॑ भा॒गिनं॑ करोति यज॒मानो॑ वा आ॒हव॑नीयो
य॒ज॒मानं॑ वा॒ एत॑द्वि क॒र्षन्ते॑ यदा॒हव॑नीयात् प॒शुश्र॑पण॒ हर॑न्ति स॒ वैव
स्या॒न्निर्म॑न्थ्यं वा कुर्याद्-य॒ज॒मान॑स्य सा॒त्मत्वा॑य॒ यदि॑ प॒शो॒रव॑दानं
नश्ये॒दाज्य॑स्य प्र॒त्याख्या॑य॒मव॑ द्ये॒त् सैव॑ ततः () प्रा॒यश्चि॑त्तिर्ये
प॒शुं वि॑म॒थ्नी॒रन् य॑स्तान् का॒मये॑ता ऽऽ*ति॒मा॒र्च्छे॑यु॒रिति॑ कु॒विद॑ङ्गेति

नमो॑ वृ॒क्तिव॑त्यर्चाऽऽग्नी॑ध्रे जुहु॒यान्नमो॑ वृ॒क्तिमे॒वैषां॑ वृ॒द्धे
ताज॒गार्ति॑माच्छ॒न्ति । 10(भू॒त्वा - ततः॑ - षड्वि॑ंशतिश्च) (A3)

3.1.4.1

प्रजा॑पते॒र्जाय॑मानाः प्रजा॑ जा॒ताश्च॑ या इ॒माः ।
तस्मै॑ प्र॒ति प्र वे॑दयचि॒कित्वा॑ अनु॒ मन्य॑तां ।
इमं॑ पशुं॒ पशु॑पते ते अद्य॑ ब॒ध्नाम्य॑ग्ने सु॒कृत॑स्य म॒ध्ये ।
अनु॑ मन्यस्व सु॒यजा॑ यजाम॒ जुष्टं॑ दे॒वानामि॑दमस्तु ह॒व्यं ।
प्रजा॑नन्तः प्र॒तिगृ॑ह्णन्ति पूर्वे॑ प्राणम॒ङ्गेभ्यः॑ पर्याच॑रन्तं ।
सुव॑र्गं या॒हि प॒थिभि॑ दे॒वयानै॑-रोष॑धीषु प्र॒तिति॑ष्ठा शरी॑रैः ।
येषा॑मीशे - [] 11

3.1.4.2

पशु॑पतिः पशू॒नां चतु॑ष्पदा॒मुत च॑ द्वि॒पदां॑ ।
निष्क्री॑तोऽयं य॒ज्ञियं॑ भा॒गमे॑तु रा॒यस्पो॑षा यज॑मानस्य सन्तु ।
ये ब॒ध्यमा॑नमनु ब॒ध्यमा॑ना अ॒भ्यैक्ष॑न्त मन॒सा चक्षु॑षा च ।

अ॒ग्नि॒स्ता॒ꣳ अ॒ग्रे प्र॒मु॒मो॒क्तु दे॒वः प्र॒जा॒प॒तिः प्र॒जया॑ सँ॒वि॒दानः॑ ।
य आ॒र॒ण्याः प॒श॒वो वि॒श्वरू॒पा वि॒रू॒पाः स॒न्तो बहु॑धै॒करू॒पाः ।
वा॒यु॒स्ता॒ꣳ अ॒ग्रे प्र॒मु॒मो॒क्तु दे॒वः प्र॒जा॒प॒तिः प्र॒जया॑ सँ॒वि॒दानः॑ ।
प्र॒मु॒ञ्च॒मा॒ना - [] 12

3.1.4.3

भु॒व॒न॒स्य रे॒तो गा॒तुं ध॒त्त य॒ज॒मा॒नाय॑ दे॒वाः ।
उ॒पा॒कृ॒तꣳ श॒श॒मा॒नं यँ॑द॒स्था॒ज्जी॒वं दे॒वा॒नाम॑प्ये॒तु पा॒थः॑ ।
ना॒ना प्रा॒णो य॒ज॒मा॒न॒स्य प॒शु॒ना य॒ज्ञो दे॒वे॒भिः सह॑ दे॒व॒या॒नः॑ ।
जी॒वं दे॒वा॒नाम॑प्ये॒तु पा॒थः स॒त्याः स॒न्तु य॒ज॒मा॒न॒स्य का॒माः॑ ।
यत् प॒शु॒र्मा॒यु॒म॒कृ॒तो॒रो वा प॒द्भि॒रा॒ह॒ते॑ ।
अ॒ग्नि॒र्मा तस्मा॑दे॒न॒सो वि॒श्वान् मु॒ञ्च॒त्वꣳ ह॒सः॑ ।
श॒मि॒ता॒र उ॒पे॒त॒न य॒ज्ञं - [] 13

3.1.4.4

दे॒वेभि॑रि॒न्वितं॑ ।

पा॒शात् प॒शुं प्र॑मुञ्च॒त ब॒न्धाद्य॑ज॒पतिं॑ परि॑ ।

अदि॑तिः पा॒शं प्र॑मु॒मोक्त्वे॒तं नमः॑ प॒शुभ्यः॑ प॒शुप॑तये॒ करो॑मि ।

अ॒राती॑यन्त-म॒धरं॑ कृ॒णोमि॑ यं द्वि॒ष्मस्तस्मि॑न् प्र॒ति मुञ्चामि॑ पा॒शं ।

त्वा॒मु ते द॑धि॒रे ह॒व्यवा॑ह॒ः शृ॑तं॒कर्तारि॑मु॒त य॒ज्ञियं॑ च ।

अ॒ग्ने सद॑क्षः स॒तनु॑र्हि भू॒त्वाऽथ॑ ह॒व्या जा॑तवे॒दो जु॑षस्व ।

जा॑तवे॒दो व॒पया॑ गच्छ॒ देवा॑न्त्व॒ः () हि॑ हो॒ता प्र॑थ॒मो ब॒भूथ॑ ।

घृ॒तेन॑ त्वं त॒नुवो॑ वर्ध॒यस्व॑ स्वाहा॒कृत॑ः ह॒विर॑दन्तु॒ देवाः॑ ।

स्वाहा॑ दे॒वेभ्यो॑ दे॒वेभ्यः॑ स्वाहा॑ । 14

(ई॒शो - प्र॑मुञ्च॒माना - य॒ज्ञं - त्व॑ - षोड॑श च) (A4)

3.1.5.1

प्रा॒जाप॑त्या वै प॒शव॑स्तेषा॒ः रु॒द्रोऽधि॑पतिर्य-दे॒ताभ्या॑-मु॒पा करो॑ति

ता॒भ्यामे॒वैनं॑ प्र॒तिप्रो॑च्याऽऽल॒भत॑ आ॒त्मनो॑ऽना॒व्रस्का॑य॒ द्वाभ्या॑मु॒पाकरो॑ति

द्वि॒पाद्य॑ज॒मानः॑ प्र॒तिष्ठि॑त्या उ॒पाकृ॑त्य पञ्च जुहोति पाङ्गाः पशवः पशूने॒वा
वरु॑न्धेमृ॒त्यवे॑ वा ए॒ष नी॑यते यत् पशु॒स्तं य॑दन्वारभेत प्र॒मायु॑को यज॒मानः
स्या॒न्नाना॑ प्रा॒णो यज॑मानस्य पशु॒नेत्या॑ह व्यावृ॒त्यै – [] 15

3.1.5.2

यत् पशु॒र्मायु॑मकृ॒तेति॑ जुहोति शान्त्यै श॒मितार॑ उपेतनेत्याह
यथा॒यजुरे॒वैतद्व॑पायां वा आ॒ह्रिय॑माणाया-म॒ग्नेर्मे॒धोऽप॑ क्रामति त्वामु
ते दधिरे हव्यवा॒हमि॑ति व॒पाम॑भि जुहोत्य॒ग्नेरे॒व मे॒धम॑व रुन्धेऽथो
शृ॒तत्वा॒य पु॒रस्ता॑थ् स्वाहा कृतयो वा अन्ये दे॒वा उप॑रिष्ठाथ् स्वाहाकृतयोऽन्ये
स्वाहा दे॒वेभ्यो॑ दे॒वेभ्यः॑ स्वाहेत्य॒भितो॑ वपां () जुहोति तानेवोभयान्
प्रीणाति । 16 (व्यावृ॒त्या – अ॒भितो॑ वपां – पञ्च च) (A5)

3.1.6.1

यो वा अयथादे॒वतं॑ य॒ज्ञमु॑पचरत्या दे॒वता॑भ्यो वृश्च्यते पापी॒यान् भव॑ति
यो यथादे॒वत॑न् दे॒वता॑भ्य आ वृश्च्यते वसी॒यान् भव॑त्याग्नेय्यर्चा ऽऽग्नी॒ध्रम॑भि
मृशे॒द् वैष्ण॑व्या ह॒विर्धा॑निमाग्नेय्या सु॒चो वा॒यव्य॑या वा॒यव्या॑न्यैन्द्रि॒या स॒दो

यथादे॒वत॑मे॒व य॒ज्ञमु॑प॒ चर॑ति न दे॒वता॑भ्य॒ आ वृ॑श्च्यते वसी॒यान् भव॑ति
यु॒नज्मि॑ ते पृथि॒वीं ज्यो॑तिषा॒ सह यु॒नज्मि॑ वा॒युम॑न्तरि॒क्षेण॑ – [] 17

3.1.6.2

ते सह यु॒नज्मि॑ वाच॑ सह सूर्ये॑ण ते यु॒नज्मि॑ तिस्रो॒ विपृ॑चः
सूर्य॑स्य ते । अ॒ग्निर्दे॒वता॑ गा॒यत्री॑ छन्द॒ उपा॑श्शोः पा॒त्रम॑सि
सोमो॑ दे॒वता॑ त्रि॒ष्टुप् छन्दो॑ऽन्तर्या॒मस्य॑ पा॒त्रम॑सीन्द्रो दे॒वता॑ जग॒ती छन्द॑
इन्द्र॑वा॒युवोः॑ पा॒त्रम॑सि बृह॒स्पति॑ दे॒वता॑ऽनु॒ष्टुप् छन्दो॑ मि॒त्रावरु॑णयोः
पा॒त्रम॑स्यश्चि॒नौ दे॒वता॑ प॒ङ्क्तिश्छन्दो॑ऽश्चि॒नोः पा॒त्रम॑सि सूर्यो॑
दे॒वता॑ बृह॒ती – [] 18

3.1.6.3

छन्दः॑ शु॒क्रस्य॑ पा॒त्रम॑सि चन्द्र॒मा दे॒वता॑ सतो॒ बृह॑ती छन्दो॒ मन्थि॑नः
पा॒त्रम॑सि वि॒श्वेदे॒वा दे॒वतो॑ष्णिहा छन्द॒ आग्र॑यणस्य पा॒त्रम॑सीन्द्रो दे॒वता॑
क॒कुच्छ॑न्द उक्थानां॒ पा॒त्रम॑सि पृथि॒वी दे॒वता॑ वि॒राट् छन्दो॑
ध्रु॒वस्य॑ पा॒त्रम॑सि । 19(अ॒न्तरि॑क्षेण – बृह॒ती – त्रय॑स्त्रि॒ंशच्च॑) (A6)

3.1.7.1

इष्टर्गो वा अध्वर्युर्यजमानस्येष्टर्गः खलु वै पूर्वोऽर्घुः क्षीयत आसन्यान्मा
मन्त्रात् पाहि कस्याश्चिदभिशस्त्या इति पुरा प्रातरनुवाकाज्जुहुयादात्मन एव
तदध्वर्युः पुरस्ताच्छर्म नह्यतेऽनात्यै सँवेशाय त्वोपवेशाय त्वा गायत्रिया
स्त्रिष्टुभो जगत्या अभिभूत्यै स्वाहा प्राणापानौ मृत्योर्मा पातं प्राणापानौ
मा मा हासिष्टं देवतासु वा एते प्राणापानयो - [] 20

3.1.7.2

व्यार्यच्छन्ते येषाँ सोमः समृच्छते सँवेशाय त्वोपवेशाय त्वेत्याह
छन्दाँसि वै सँवेश उपवेशश्छन्दोभिरेवास्य छन्दाँसि वृद्धे
प्रेतिवन्त्याज्यानि भवन्त्यभिजित्यै मरुत्वतीः प्रतिपदो विजित्या उभे
बृहद्रथन्तरे भवत इयं वाव रथन्तरमसौ बृहदाभ्यामेवैनमन्तरेत्यद्य वाव
रथन्तरं श्वो बृहदद्याश्वा देवैनमन्तरेति भूतं - [] 21

3.1.7.3

वाव रथन्तरं भविष्यद्-बृहद् भूताच्चैवैनं भविष्यतश्चान्तरेतिपरिमितं
वाव रथन्तरमपरिमितं बृहत् परिमिताच्चैवैन-मपरिमिताच्चाऽन्तरेति

वि॒श्वा॒मि॒त्रज॒मद॒ग्नी॒ वसि॑ष्ठे॒नास्प॑र्धे॒ता॒ꣳस॒ ए॒तज्ज॒मद॒ग्नि॒ वि॒हव्य॑म॒ पश्य॑त्
 ते॒न वै स॒ वसि॑ष्ठस्ये॒न्द्रि॒यं वी॒र्य॑मवृ॒द्धं यद्वि॑हव्य॒ꣳश॒स्यत॑ इ॒न्द्रि॒यमे॒व
 तद्वी॒र्यं य॑ज॒मानो॒ भ्रातृ॑व्यस्य वृ॒द्धे () यस्य॑ भू॒याꣳसो॒ यज्ञ॑क्र॒तव॑ इत्याहुः
 स दे॒वता॑ वृ॒द्ध इति॑ यद्य॒ग्निष्टो॒मः सोमः॑ प॒रस्ता॑थ॒ स्या॒-दु॒क्थ्यं
 कु॒र्वीत॑ यद्यु॒क्थ्यः॑ स्यादति॒रात्रं॑ कु॒र्वीत॑ यज्ञ॒क्रतु॑भिरे॒वास्य॑ दे॒वता॑ वृ॒द्धे
 वसी॑यान् भवति । 22

(प्रा॒णा॒पा॒नयो॑ - भू॒तं - वृ॒द्धे - ऽष्टा॑वि॒ꣳशति॑श्च) (A7)

3.1.8.1

नि॒ग्रा॒भ्याः॑ स्थ दे॒वश्रु॑त॒ आयु॑र्मे तर्प॒यत॑ प्रा॒णं मे॑ तर्प॒यता॑पा॒नं मे॑ तर्प॒यत॑
 व्या॒नं मे॑ तर्प॒यत॑ चक्षु॑र्मे तर्प॒यत॑ श्रो॒त्रं मे॑ तर्प॒यत॑ मनो॑मे॒ तर्प॒यत॑
 वाचं॑ मे॒ तर्प॒यता॑ऽऽ*त्मा॒नं मे॑ तर्प॒यता॑ङ्गा॒नि मे॑ तर्प॒यत॑ प्र॒जां मे॑ तर्प॒यत॑
 प॒शून् मे॑ तर्प॒यत॑ गृ॒हान् मे॑ तर्प॒यत॑ ग॒णान् मे॑ तर्प॒यत॑ स॒र्वग॑णं॒ मा तर्प॒यत॑
 तर्प॒यत॑ मा - [] 23

3.1.8.2

गणा॒ मे॒ मा॒ वि॒ तृ॒ष॒न्नो॒ष॒धयो॒ वै सोम॑स्य॒ विशो॒ विशः॒ खलु॒ वै
 राज्ञः॒ प्र॒दा॒तो॒री॒श्वरा॒ ऐन्द्रः॒ सोमो॑ऽवी॒वृ॒धं॒ वो॒ मन॑सा॒ सुजा॒ता ऋ॒तप्र॑जा॒ता
 भग॒ इ॒द्वः स्या॑म । इ॒न्द्रेण॑ दे॒वीर्वी॒रु॒धः सँ॒वि॒दा॒ना अनु॑ म॒न्यन्ता॒ऽस॒व॒नाय॒
 सोम॑मि॒त्याहौ॑ष॒धीभ्य॒ ए॒वैन॑ऽ स्वायै॒ विशः॒ स्वायै॑ दे॒वता॑यै॒ निर्या॑च्या॒भि
 षु॒णोति॒ यो वै सोम॑स्याभिषूयमाणस्य - [] 24

3.1.8.3

प्रथ॑मोऽंशुः॒ स्कन्द॑ति स ई॒श्वर॑ इ॒न्द्रियं॒ वीर्यं॑ प्र॒जां प॒शून्
 यज॑मानस्य॒ निर्ह॑न्तोस्तम॒भि मन्त्र॑येताऽऽ माऽऽस्कान्त्सह॒ प्रजया॑ सह
 राय॑स्पोषेणेन्द्रियं॒ मे वीर्यं॑ मा निर्व॒धीरि॒त्याशि॑षमे॒वैता॑मा शा॒स्त
 इन्द्रि॒यस्य॑ वी॒र्यस्य॑ प्र॒जायै॑ प॒शूना॑मनिर्घा॒ताय॑ द्र॒प्सश्च॑स्कन्द
 पृथि॒वीम॒नु द्या॑मिमञ्च॒ योनि॑म॒नु यश्च॑ () पूर्वः ।
 तृती॑यं योनिम॒नु सञ्च॑रन्तं द्र॒प्सं जु॒होम्य॑नु सप्त हो॒त्राः । 25
 (तर्प॑यत मा - ऽभिषूयमाणस्य - यश्च - दश॑ च) (A8)

3.1.9.1

यो वै देवान् देवयशसेनार्पयति मनुष्यान् मनुष्ययशसेन देवयशस्येव
 देवेषु भवति मनुष्ययशसी मनुष्येषु यान् प्राचीन-माग्रयणाद्
 ग्रहान् गृह्णीयात् तानुपांशु गृह्णीयाद्यानूर्ध्वाऽस्तानुपब्दिमतो देवानेव
 तद्देवयशसेनार्पयति मनुष्यान् मनुष्ययशसेन देवयशस्येव देवेषु
 भवति मनुष्ययशसी मनुष्येष्वग्निः प्रातः सवने पात्वस्मान् वैश्वानरो
 महिना विश्वशम्भूः । स नः पावको द्रविणं दधात्वा - [] 26

3.1.9.2

युष्मन्तः सहभक्षाःस्याम ।
 विश्वे देवा मरुत इन्द्रो अस्मानस्मिन् द्वितीये सवने न जह्युः ।
 आयुष्मन्तः प्रियमेषां वदन्तो वयं देवानां सुमतौ स्याम ।
 इदं तृतीयं सवनं कवीनामृतेन ये चमसमैरयन्त ।
 ते सौधन्वनाः सुवरानशानाः स्विष्टिं नो अभि वसीयो नयन्तु ।
 आयतनवतीर्वा अन्या आहुतयो हूयन्तेऽनायतना अन्या या

आ॒घ्रा॒व॒ती॒स्ता आ॒य॒त॒न॒व॒ती॒र्याः – [] 27

3.1.9.3

सौ॒म्या॒स्ता अ॒नाय॒त॒ना ऐ॒न्द्रवा॒यव॒-मा॒दाया॑ऽऽ*घ्रा॒रमा॑ घ्रा॒रये॑दध्व॒रो
य॒ज्ञोऽय॑मस्तु दे॒वा ओ॒षधी॑भ्यः प॒शवे॑ नो ज॒नाय॑ वि॒श्वस्मै॑
भू॒ताया॑ऽदध्व॒रोऽसि॑ स पि॒न्वस्व॑ घृ॒तव॑द्दे॒व सो॒मेति॑ सौ॒म्या ए॒व
तदा॑हु॒तीरा॒य॒त॒न॒व॒तीः क॒रोत्या॑य॒त॒न॒वान् भ॒वति॑ य ए॒वं वै॒दाथो॑
द्या॒वापृ॑थि॒वी ए॒व घृ॒तेन॑ व्यु॒नत्ति॑ ते व्यु॒त्ते उप॑जी॒वानी॑ये भ॒वत॑
उप॑वी॒वनी॑यो भ॒वति॑ – [] 28

3.1.9.4

य ए॒वं वै॒दैष॑ ते रु॒द्रभा॑गो यं नि॒रया॑च॒थास्तं॑ जु॒षस्व॑ वि॒देगो॑प॒त्यञ्
रा॒यस्पो॑ष॒ञ् सु॒वीर्य॑ञ् स॒व॒त्स॒रीणाञ् स्व॑स्तिं । म॒नुः पु॒त्रेभ्यो॑ दा॒यं
व्य॑भ॒जथ् स॒ नाभा॑ने॒दिष्टं॑ ब्र॒ह्मच॑र्यं व॒सन्तं॑ नि॒रभ॑जथ् स आ॒गच्छ॑थ्
सोऽब्र॑वीत् क॒था मा॒ नि॒रभा॑गि॒ति न॒ त्वा नि॒रभा॑क्ष॒मित्य॑-ब्र॒वीद॑ङ्गि॒रस॑ इ॒मे
स॒त्रमा॑स॒ते ते – [] 29

3.1.9.5

सु॒वर्गं॑ लो॒कं न प्र॒जान॑न्ति तेभ्य॑ इ॒दं ब्रा॑ह्मणं ब्रू॒हि ते सु॒वर्गं॑
लो॒कं य॑न्तो य ए॒षां प॒शव॑स्ता॒ऽस्ते दा॑स्यन्तीति॑ तदे॒भ्योऽब्रू॑वीत्
ते सु॒वर्गं॑ लो॒कं य॑न्तो य ए॒षां प॒शव॑ आसन् तान॑स्मा अ॒ददु॑स्तं
प॒शुभि॑श्चरन्तं य॒ज्ञवा॑स्तौ रु॒द्र आ॑गच्छ॒थ सोऽब्रू॑वीन्मम
वा इ॒मे प॒शव॑ इत्य॒दुर्वै॑ – [] 30

3.1.9.6

म॒ह्यमि॒मानि॑त्यब्रू॒वीन्न॑ वै तस्य॑ त ई॒शत॑ इत्य॒ब्रूवी॑द्-यद्-य॒ज्ञवा॑स्तौ ही॒यते॑
मम॑ वै तदिति॑ तस्मा॒द्-य॒ज्ञवा॑स्तु नाभ्य॒वेत्य॑ सोऽब्रू॒वीद्-य॒ज्ञे मा
ऽऽभ॑जाथ ते प॒शून् ना॒भि म॑स्य इति॑ तस्मा॒ एतं॑ म॒न्थिनः॑ स॒
स्रा॒वम॑जुहोत् ततो॑ वै तस्य॑ रु॒द्रः प॒शून् नाभ्य॑मन्यत यत्रै॒त () मे॒वं वि॒द्वान्
म॒न्थिनः॑ स॒ स्रा॒वं जु॒होति॑ न तत्र॑ रु॒द्रः प॒शून्ना॒भि म॑न्यते । 31
(द॒धात्वा॑ – य॒तन॑वती॒र्या – उ॒पजी॑वनी॒यो भ॑वति – तेऽ – दु॒र्वै –
यत्रै॒त – मे॒काद॑श च) (A9)

3.1.10.1

जु॒ष्टो वा॒चो भू॒यासं जु॒ष्टो वा॒चस्प॑तये॒ देवि॑ वाक् ।
यद्वा॒चो मधु॑मत् तस्मिन् मा धाः स्वाहा सरस्वत्यै ।
ऋ॒चा स्तोम॑ꣳ सम॒र्धय॑ गाय॒त्रेण॑ रथं॒तरं । बृ॒हद्-गा॑य॒त्रव॑र्तनि ।
यस्ते॑ द्र॒फ्सः॑ स्क॒न्दति॑ यस्ते॑ अꣳशु॒र्बाहु॑च्युतो॒ धिष॑णयो॒रुप॑स्थात् ॥
अध्व॑र्यो॒र्वा परि॑ यस्ते॑ पवि॒त्राथ् स्वा॑हाकृतमिन्द्राय॒ तं जु॑होमि ।
यो द्र॒फ्सो अꣳशुः॑ प॒तितः॑ प्र॒थिव्यां॑ परि॒वापात् - [] 32

3.1.10.2

पु॒रोडा॑शात् कर॒म्भात् ।
धा॒नासो॒मान्म॑न्थिन॒ इन्द्र॑ शु॒क्राथ् स्वा॑हाकृतमिन्द्राय॒ तं जु॑होमि ।
यस्ते॑ द्र॒फ्सो मधु॑माꣳ इन्द्रि॒यावा॑न्थ् स्वाहाकृतः पुनर॒प्येति॑ दे॒वान् ।
दि॒वः पृ॑थि॒व्याः पर्य॑न्तरि॒क्षाथ् स्वा॑हा कृतमिन्द्राय॒ तं जु॑होमि ।
अध्व॑र्यु॒र्वा ऋ॒त्विजां॑ प्रथ॒मो यु॑ज्यते तेन॒ स्तोमो॑ योक्तव्य॒ इत्याहु॑र्वाग॒ग्रेगा॑

अ॒ग्र ए॒त्वृ॒जु॒गा दे॒वेभ्यो॑ य॒ज्ञो म॒यि द॒धती॑ प्रा॒णान् प॒शुषु॑

प्र॒जां म॒यि- [] 33

3.1.10.3

च॒ यज॑माने॒ चेत्या॑ह॒ वाच॑मे॒व तद्य॑ज्ञ॒मुखे॑ यु॒नक्ति॑ वा॒स्तु वा ए॒तद्य॑ज्ञस्य॒
क्रिय॑ते॒ यद्ग्र॑हान् गृही॒त्वा ब॑हिष्प॒वमान॑ः सर्प॑न्ति॒पराञ्चो॑ हि य॒न्ति
परा॑चीभिः स्तु॒वते॑ वैष्ण॒व्यर्चा पु॒नरे॒त्योप॑ तिष्ठ॒ते य॒ज्ञो वै वि॒ष्णु
र्य॒ज्ञमे॒वाक॑र्विष्णो॒ त्वन्नो॑ अ॒न्तमः॑ शर्म॒ यच्छ॑ सह॒न्त्य ।
प्र ते॒ धारा॑ मधु॒श्चुत॑ उ॒थ्सं दु॒हते॑ () अ॒क्षित॑मि॒त्याह॑ यदे॒वास्य
श॒यान॑स्योप॒शुष्य॑ति॒ तदे॒वास्यै॒तेना॑ ऽऽप्या॒यति॑ । 34

(परि॒वापा॑त् - प्र॒जां म॒यि - दु॒हते॑ - चतु॑र्दश च) (A10)

3.1.11.1

अ॒ग्निना॑ र॒यिम॑श्न॒वत् पो॑षमे॒व दि॒वेदि॒वे । य॒ज्ञसं॑ वी॒रव॑त्तमं ।
गो॒माः अ॒ग्नेऽवि॑माः अ॒श्वी य॒ज्ञो नृ॒वत्स॑खा स॒दमि॑दप्र॒मृष्यः॑ ।
इ॒डावाः ए॒षो अ॒सुर॑ प्र॒जावा॑न् दी॒र्घो र॒यिः पृ॒थुबु॑ध्नः स॒भावान्॑ ।

आप्यायस्व>[1], सन्ते>[2] ।

इह त्वष्टारमग्रियं विश्वरूपमुप ह्वये । अस्माकमस्तु कैवलः ।

तन्नस्तुरीपमध पोषयितु देव त्वष्टर्वि रराणः स्यस्व । यतो वीरः – [] 35

3.1.11.2

कर्मण्यः सुदक्षो युक्तग्रावा जायते देवकामः ।

शिवस्त्वष्टरिहाऽऽ* गहि विभुः पोष उतत्मना । यज्ञेयज्ञे न उदव ।

पिशङ्गरूपः सुभरो वयोधाः श्रुष्टी वीरो जायते देवकामः ।

प्रजां त्वष्टा विष्यतु नाभिमस्मे अथा देवानामप्येतु पाथः ।

प्रणोदे>[3] व्या, नो दिवः >[4] ।

पीपिवाꣳ सꣳ सरस्वतः स्तनं यो विश्वदर्शतः ।

धुक्षीमहि प्रजामिषं । 36

3.1.11.3

ये ते सरस्व ऊर्मयो मधुमन्तो घृतश्रुतः । तेषां ते सुम्नमीमहे ।

यस्य व्रतं पशवो यन्ति सर्वे यस्य व्रतमुपतिष्ठन्त आपः ।

यस्य॑ व्र॒ते पु॒ष्टि॒पति॑र्नि॒विष्ट॑स्त॒ऽ सर॑स्वन्तमवसे हुवेम ।
 दि॒व्य॒ऽ सु॒पर्ण॑ व॒यसं॑ बृ॒हन्त॑मपां गर्भं वृ॒षभ॑मोषधीनां ।
 अ॒भीप॑तो वृ॒ष्ट्या॑ त॒र्पय॑न्तं त॒ऽ सर॑स्वन्तमवसे हुवेम ।
 सि॒नीवा॑लि पृथु॒ष्टुके॑ या दे॒वाना॑मसि स्वसा॑ । जु॒षस्व॑ ह॒व्य - [] 37

3.1.11.4

माहु॑तं प्र॒जां दे॒वि दि॑दिङ्घि नः । या सु॒पाणिः॑ स्व॒ङ्गुरिः॑ सु॒षूमा॑ बहु॒सूव॑री ।
 तस्यै॑ वि॒श्व॒न्नियै॑ ह॒विः सि॑नीवा॒ल्यै जु॑होतन ।
 इन्द्रं॑ वौ वि॒श्वत॑स्परी>[5], न्द्रं॑ नरः>[6] ।
 अ॒सित॑वर्णा ह॒रयः॑ सु॒पर्णा॑ मि॒हो व॑साना दि॒वमु॑त् प॒तन्ति॑ ।
 त आ॒ऽव॑वृ॒त्रन्थ् सद॑नानि कृ॒त्वाऽऽदि॑त् पृथि॒वी घृ॑तैर्व्यु॒द्यते॑ ।
 हि॒रण्य॑केशो रज॒सो वि॑सा॒रेऽहि॑र्धुनि॒र्वात॑ इव॒ ध्रजी॑मान् ।
 शु॒चिभ्रा॑जा उ॒षसो॑ - [] 38

3.1.11.5

न॒वे॒दा॒ य॒श॒स्व॒ती॒र॒प॒स्यु॒वो॒ न॒ स॒त्याः॑ ।
 आ॒ ते॒ सु॒पर्णा॑ अ॒मि॒नन्त॑ ए॒वैः॑ कृ॒ष्णो॑ नो॒नाव॑ वृ॒षभो॑ यदी॒दं ।
 शि॒वाभि॒र्न स्म॑य॒मा॒नाभि॒रा॒ग्नात् प॑त॒न्ति मि॒हः॑ स्त॒नय॑न्त्य॒भ्रा ।
 वा॒श्रे॒व वि॒द्युन्मि॑माति॒ व॒थ्सं॑ न मा॒ता सि॑ष॒क्ति । य॒देषां॑ वृ॒ष्टि॒रस॑र्जि ।
 प॒र्वत॑श्चिन्महि॒ वृ॒द्धो बि॑भा॒य दि॒वश्चि॒त् सानु॑ रे॒जत॑ स्व॒ने वः॑ ।
 यत् क्री॒डथ॑ मरु॒त – [] 39

3.1.11.6

ऋ॒ष्टि॒मन्त॑ आ॒प इ॒व स॒ध्रिय॑ञ्चो॒ धव॑ध्वे ।
 अ॒भि क्र॑न्द॒ स्त॒नय॑ गर्भ॒मा धा॑ उद॒न्वता॑ परि॒ दीया॑ रथे॒न ।
 दृ॒तिꣳ सु॑ क॒र्ष वि॑षि॒तं न्य॑ञ्चꣳ स॒मा भ॑वन्तू॒द्धता॑ नि॒पादाः॑ ।
 त्वं॒ त्या चि॑द॒च्युता॑ग्ने॒ पशु॑र्न॒ यव॑से ।
 धा॒मा ह॒ यत् ते॒ अ॒जर॑ वना॒ वृश्च॑न्ति॒ शिक्व॑सः ।
 अ॒ग्ने भू॑री॒णि तव॑ जा॒तवे॑दो॒ देव॑ स्व॒धावो॑ऽमृत॒स्य धा॑म । याश्च – [] 40

3.1.11.7

मा॒या मा॒यिनां॑ वि॒श्वमि॒न्व त्वे॑ पू॒र्वीः स॒न्दधुः॑ पृ॒ष्टब॒न्धो ।
 दि॒वो नो॑ वृ॒ष्टिं म॒रुतो॑ ररी॒ध्वं प्र॑पि॒न्वत॑ वृ॒ष्णो अ॒श्वस्य॑ धा॒राः ।
 अ॒र्वाङे॑तेन॒ स्तन॑यि॒तुने॒ह्यपो॑ नि॒षिञ्च॑न्नसुरः पि॒ता नः॑ ।
 पि॒न्वन्त्य॑पो म॒रुतः॑ सु॒दान॒वः प॒यो घृ॑तव॒द्विद॑थेष्वा भु॒वः ।
 अ॒त्यं न मि॒हे वि॑ नय॒न्ति वा॒जिन॒मुत्सं॑ दु॒हन्ति॑ स्तन॒यन्त॑मक्षि॒तं ।
 उ॒दप्रु॑तो म॒रुत॒स्ताꣳ इ॒यर्त॑ वृ॒ष्टिं - [] 41

3.1.11.8

ये॑ वि॒श्वे म॒रुतो॑ जु॒नन्ति॑ ।
 क्रो॒शाति॑ गर्दा क॒न्येव॑ तु॒न्ना पे॑रुं तु॒ज्जाना॑ प॒त्येव॑ जा॒या ।
 घृ॒तेन॑ द्यावापृथि॒वी म॒धुना॑ स॒मुक्ष॑त प॒यस्व॑तीः कृ॒णु॒ताऽऽ*प॑ ओष॒धीः ।
 ऊ॒र्जं च॑ तत्र॒ सु॒मतिं॑ च पि॒न्वथ॑ यत्रा नरो म॒रुतः॑ सि॒ञ्चथा॑ म॒धु ।
 उ॒दुत्यं॑ >[7], चि॒त्रं >[8] ।
 और्व॑-भृ॒गुव॑च्छुचि॒म॒प्न॒वान॒वदा॑ हु॒वे । अ॒ग्निꣳ स॒मुद्र॑वा॒ससं॑ ।

आ स॒व॒ स॒वि॒तु॒र्य॒था॒ भ॒ग॒स्ये॒ () व॒ भु॒जि॒ हु॒वे ।

अ॒ग्नि॒ समु॒द्र॒वा॒स॒सं । हु॒वे वा॒त॒स्वनं॑ क॒विं प॒र्जन्य॑क्र॒न्द्य॒ सहः॑ ।

अ॒ग्नि॒ समु॒द्र॒वा॒स॒सं । 42

(वी॒र - इ॒ष॒ - ह॒व्य - मु॒ष॒सो - म॒रु॒त - श्च - वृ॒ष्टिं - भ॒ग॒स्य -
द्वा॒द॒श च) (A11)

Prasna Korvai with starting Padams of 1 to 11 Anuvaakams :-

(प्र॒जा॒प॒ति॒र॒का॒म॒य॒तै - ष॒ ते॒ गा॒य॒त्रो - य॒ज्ञं वै - प्र॒जा॒प॒ते॒र्जा॒यि॒मा॒नाः -
प्रा॒जा॒प॒त्या - यो॒ वा अ॒य॒था॒दे॒व॒त - मि॒ष्ट॒र्गो - नि॒ग्रा॒भ्याः॑ स्थ -
यो॒ वै दे॒वा - ज्जु॒ष्टो - ऽग्नि॑ना॒ र॒यि - मे॒का॒द॒श)

Korvai with starting Padams of 1, 11, 21 Series of Panchaatis :-

(प्र॒जा॒प॒ति॒र॒का॒म॒य॒त - प्र॒जा॒प॒ते॒र्जा॒यि॒मा॒ना - व्या॒य॒च्छ॒न्ते - म॒ह्य॒मि॒मा -
न्मा॒या मा॒यि॒नान् - द्वि॒च॒त्वा॒रि॒श॒त्)

First and Last Padam of First Prasnam of Kandam 3:-

(प्रजापतिरकामयता – ऽग्निं समुद्रवाससं)

॥ हरिः ओं ॥

॥ कृष्ण यजुर्वेदीय तैत्तिरीय संहितायां तृतीयकाण्डे प्रथमः

प्रश्नः समाप्तः ॥

3.1.1 Appendix

1. 3.1.11.1 – आ॒ प्या॒यस्व॑ > 1

आ॒प्या॒यस्व॑ समे॒तु ते॑ वि॒श्वतः॑ सोम॒ वृष्णि॑यं ।

भवा॒ वाज॑स्य संग॒थे ॥ (Appearing in TS 4-2-7-4)

2. 3.1.11.1 – सन्ते॑ > 2

सं ते॑ पया॒सि॒ समु॑ यन्तु॒ वाजाः॑ सं वृष्णि॑यान् यभिमाति॒षाहः॑ ।

आ॒प्या॒यमा॑नो अ॒मृता॑य सोम॒ दिवि॑ श्रवा॒स्युत्त॑मानि॒ धिष्व॑ ॥

(Appearing in TS 4-2-7-4)

3 & 4. 3.1.11.2 – प्र॒णो दे॒व्या > 3, नो॑ दि॒वः > 4

प्र॒णो दे॒वी सर॑स्वती॒ वाजे॑भिर्वा॒जिनी॑वती । धी॒नाम॑वि॒त्र्यव॑तु ॥

आ नो॑ दि॒वो बृ॑हतः पर्व॒तादा॑ सर॒स्वती॑ यज॒ता ग॑न्तु य॒ज्ञं ।

हवं दे॒वी जु॒जुषा॑णा घृ॒ताची॑ श॒ग्मां नो॑ वाचमु॒शती॑ शृ॒णोतु॑ ।

(Appearing in TS 1.8.22.1)

4 & 5. 3.1.11.4 – इन्द्रं॑ ँ॒वो विश्व॑त॒स्परी>॥५॥, न्द्रं॑ नरः॑>॥६॥

इन्द्रं॑ ँ॒वो विश्व॑त॒स्परी ह॒वामहे॑ जने॑भ्यः । अ॒स्माक॑मस्तु॒ कैवलः॑ ॥

इन्द्रं॑ नरो॑ नेम॑धिता ह॒वन्ते॑ यत्पार्या॑ युन॑जते॒ धिय॑स्ताः ।

शूरो॑ नृषा॑ता श॒वसश्च॑कान॒ आ गो॑मति॒ व्रजे॑ भ॒जा त्वन्नः॑ ॥

(Appearing in TS 1.6.12.1)

7 & 8. 3.1.11.8 – उदु॑त्यं>॥७॥, चि॒त्रं>॥८॥ ।

उदु॑ त्यं जा॒तवे॑दसं दे॒वं ँ॒वह॑न्ति के॒तवः॑ । दृ॒शो वि॑श्वाय॒ सूर्यं॑ ॥

चि॒त्रं दे॒वाना॑मुद॑गादनी॒कं चक्षु॑ मि॒त्रस्य॑ वरु॒णस्या॑ऽग्नेः ।

आऽ प्रा॒ द्यावा॑पृथि॒वी अ॒न्तरि॑क्ष॒ञ् सूर्य॑ आ॒त्मा ज॑गतस्त॒स्थुष॑श्च ॥

(Appearing in TS 1.4.43.1)

ओं नमः परमात्मने, श्री महागणपतये नमः, श्री गुरुभ्यो नमः

हरिः ओं

3.2 तृतीयकाण्डे द्वितीयः प्रश्नः – पवमानग्राहादीनां व्याख्यानं

3.2.1.1

यो वै पवमानानामन्वारोहान् विद्वान् यजतेऽनु पवमानाना रोहति न
पवमानेभ्यो-ऽव च्छिद्यते श्येनोऽसि गायत्रच्छन्दा अनु त्वाऽऽरभे स्वस्ति
मा सं पारय सुपर्णोऽसि त्रिष्टुच्छन्दा अनु त्वाऽऽरभे स्वस्ति मा सं पारय
सघाऽसि जगतीच्छन्दा अनु त्वाऽऽरभे स्वस्ति मा संपारयेत्याहैते-[] 1

3.2.1.2

वै पवमानानामन्वारोहास्तान् य एवं विद्वान् यजतेऽनु पवमानाना
रोहति न पवमानेभ्योऽव च्छिद्यते यो वै पवमानस्य सन्ततिं वैद
सर्वमायुरेति न पुराऽऽयुषः प्र मीयते पशुमान् भवति विन्दते प्रजां
पवमानस्य ग्रहा गृह्यन्तेऽथ वा अस्यैतेऽगृहीता द्रोणकलश आधवनीयः
पूतभृत् तान् यदगृहीत्वोपाकुर्यात् पवमानं वि - [] 2

3.2.1.3

च्छिन्दात् तं विच्छिद्यमानमध्वर्योः प्राणोऽनु
 विच्छिद्ये-तोपयामगृहीतोऽसि प्रजापतये त्वेति द्रोणकलशमभि
 मृशेदिन्द्राय त्वेत्याधवनीयं विश्वेभ्यस्त्वा देवेभ्य इति पूतभृतं
 पवमानमेव तथ् सं तनोति सर्वमायुरेति न पुराऽऽयुषः प्रमीयते पशुमान्
 भवति विन्दते प्रजां । 3 (एते - वि - द्विचत्वारिंशच्च) (A1)

3.2.2.1

त्रीणि वाव सवनान्यथ तृतीयं सवनमव लुम्पन्त्यनं शु कुर्वन्त
 उपां शु हुत्वोपां शु पात्रेऽं शु मवास्य तन्तृतीयसवने ऽपिसृज्याभि
 षुणुयाद्यदाप्याययति तेनां शु मद्यदभिषुणोति तेनर्जीषि सर्वाण्येव
 तथ् सवनान्यं शु मन्ति शुक्रवन्ति समावद्दीर्याणि करोति द्वौ समुद्रौ
 विततावजूर्यो पर्यावर्तेते जठरेव पादाः । तयोः पश्यन्तो अति
 यन्त्यन्यमपश्यन्तः - [] 4

3.2.2.2

से॒तु॒नाऽति॑ यन्त्य॒न्यं । द्वे॑ द्र॒ध॒सी॑ स॒त॒ती॑ व॒स्त ऐ॒कः॑ के॒शी॑ वि॒श्वा भु॒व॒ना॒नि
वि॒द्वान् । ति॒रो॒धा॒यै॒त्य॒सि॒तं॑ व॒सानः॑ शु॒क्र॒मा द॑त्ते अ॒नु॒हा॒य जा॒र्यै॑ ।
दे॒वा वै॑ यद्य॒ज्ञेऽकु॑र्वत तद॒सुरा॑ अकुर्वत ते दे॒वा ए॒तं॑ म॒हा॒य॒ज्ञम॑पश्यन्
त॒म॒त॒न्व॒ता॒ग्नि॒हो॒त्रं॑ व्र॒त॒म॒कु॑र्वत तस्मा॒द् द्वि॒व्र॒तः॑ स्या॒द् द्वि॒र्ह्य॒ग्नि॒हो॒त्रं॑
जु॒ह्व॒ति पौ॒र्ण॒मा॒सं॑ य॒ज्ञम॑ग्नी॒षो॒मी॒यं – [] 5

3.2.2.3

प॒शु॒म॒कु॑र्वत दा॒र्यं॑ य॒ज्ञमा॑ग्ने॒यं प॒शु॒म॒कु॑र्वत वै॒श्व॒दे॒वं प्रा॑तः
स॒व॒न॒म॒कु॑र्वत वरु॒णप्र॑धा॒सान् मा॒ध्यं॑दि॒नं स॒व॒नं सा॒क॒मे॒धान् पि॒तृ॒य॒ज्ञं
त्र्य॒म्ब॒का – स्तृ॒ती॒य॒स॒व॒न॒म॒कु॑र्वत त॒मे॒षा॒म॒सुरा॑ य॒ज्ञम॑न्व॒वा॒जि॒गा
सं तं॑ नाऽन्व॒वा॒य॒न् तेऽब्रु॑वन्न॒ध्व॒र्त॒व्या वा॑ इ॒मे दे॒वा अ॑भू॒व॒न्नि॒ति
तद॒ध्व॒र॒स्याऽध्व॑र॒त्वं ततो॑ दे॒वा अ॑भ॒व॒न् प॒राऽसुरा॑ य ए॒वं वि॒द्वान्त् सो॒मे॒न
य॒ज॒ते भ॑व॒त्या॒त्म॒ना प॒रा () ऽस्य॑ भ्रा॒तृ॒व्यो भ॑वति । 6

(अपश्यन्तोऽ – ग्नीषोमीय – मात्मना परा – त्रीणि च) (A2)

3.2.3.1

परि॒भूर॑ग्निं परि॒भूरिन्द्रं॑ परि॒भूर्वि॑श्वा॒न् दे॒वान् परि॒भूर्मा॑ꣳ सह॑ ब्र॒ह्मव॑र्चसे॒न
स नः॑ पव॒स्व शं ग॒वे शं ज॒नाय॑ शम॒र्वते॒ शꣳ रा॒जन्मो॑षधी॒भ्यो ऽच्छि॑न्नस्य
ते रयि॑पते सु॒वीर्य॑स्य रा॒यस्पो॑षस्य ददि॒तारः॑ स्याम ।
तस्य॑ मे रा॒स्व तस्य॑ ते भक्षी॒य तस्य॑ त इ॒दमु॑न्मृजे ।
प्रा॒णाय॑ मे वर्चो॒दा वर्च॑से पव॒स्वा पा॒नाय॑ व्या॒नाय॑ वा॒चे - [] 7

3.2.3.2

दक्ष॑क्रतु॒भ्यां चक्षु॑भ्यां मे वर्चो॒दौ वर्च॑से पवे॒थाꣳ श्रो॑त्राया ऽऽ*त्म॑ने
ऽङ्गे॑भ्य आयु॒षे वी॒र्या॑य वि॒ष्णोरिन्द्र॑स्य वि॒श्वेषां॑ दे॒वानां॑ ज॒ठर॑मसि वर्चो॒दा
मे वर्च॑से पव॒स्व को॑ऽसि को॒ नाम॑ कस्मै॑ त्वा का॒य त्वा यं॑ त्वा
सोमे॑नाती॒तृपं यं॑ त्वा सोमे॑नामी॒मदꣳ सु॒प्रजाः॑ प्र॒जया॑ भूया॒सꣳ सु॒वीरो॑
वी॒रैः सु॒वर्चा॑ वर्च॒सा सु॒पोषः॑ पोषै॑-वि॒श्वेभ्यो॑ मे रू॒पेभ्यो॑ वर्चो॒दा-[] 8

3.2.3.3

वर्च॑से पव॒स्व तस्य॑ मे रा॒स्व तस्य॑ ते भक्षी॒य तस्य॑ त इ॒दमु॑न्मृजे ।
बु॒भूष॑न्नवे॒क्षेतै॒ष वै पा॒त्रियः॑ प्र॒जाप॑तिर्यज्ञः प्र॒जाप॑तिस्तमे॒व तर्प॑यति

स॒ ए॒नं॑ तृ॒प्तो॑ भू॒त्याऽभि॑ प॒वते॑ ब्र॒ह्मव॑र्च॒सका॑मो-॒ऽवे॒क्षे॒तैष॑
वै पा॒त्रियः॑ प्र॒जाप॑तिर्य॒ज्ञः प्र॒जाप॑तिस्तमे॒व त॑र्पयति स॒ ए॒नं॑ तृ॒प्तो
ब्र॒ह्मव॑र्च॒सेना॑भि प॒वत॑ आ॒मया॑व्य - [] 9

3.2.3.4

वे॒क्षे॒तैष॑ वै पा॒त्रियः॑ प्र॒जाप॑तिर्य॒ज्ञः प्र॒जाप॑तिस्तमे॒व त॑र्पयति स॒ ए॒नं॑
तृ॒प्त आ॑युषा॒ऽभि प॑वते॒ऽभिच॑रन्नवे॒क्षे॒तैष॑ वै पा॒त्रियः॑ प्र॒जाप॑तिर्य॒ज्ञः
प्र॒जाप॑तिस्तमे॒व त॑र्पयति स॒ ए॒नं॑ तृ॒प्तः प्रा॑णा॒पाना॑भ्यां वा॒चो
दक्ष॑क्र॒तुभ्यां॑ चक्षु॒र्भ्या॑ श्रो॒त्राभ्या॑-मा॒त्मनो॑ऽङ्गेभ्य
आ॒युषो॑ऽन्तरे॒ति ता॑जक् प्र ध॒न्वति॑ । 10

(वा॒चो - रू॒पेभ्यो॑ व॒र्चो॒दा - आ॒मया॑वी - पञ्च॑च॒त्वारि॑ंशच्च) (A3)

3.2.4.1

स्फ्यः॑ स्व॒स्तिर्वि॑घ्नः स्व॒स्तिः पर्शु॑र्वेदिः पर्शु॒र्नः स्व॒स्तिः ।
य॒ज्ञिया॑ य॒ज्ञकृ॑तः स्थ ते मा॒स्मिन् य॒ज्ञ उप॑ ह्वयध्वमुप॑ मा
द्यावा॑पृथि॒वी ह्वे॑तामुपाऽऽ*स्तावः॑ क॒लशः॑ सोमो॑ अ॒ग्निरु॑प दे॒वा

उप॑ य॒ज्ञ उप॑ मा॒ हो॒त्रा उप॑ह॒वे ह॒व्यन्तां॑ नमो॒ऽग्नये॑ म॒ख॒घ्ने म॒खस्य॑ मा॒
य॒ज्ञो॒ऽर्या॒दित्या॑ह॒वनी॒यमु॑प तिष्ठते॒ य॒ज्ञो वै म॒खो - [] 11

3.2.4.2

य॒ज्ञं वा॑व स तद॒हन् तस्मा॑ ए॒व नम॑स्कृत्य॒ सदः॑ प्रस॒र्पत्या॑त्मनो॒ऽना॒र्त्ये॒
नमो॑ रु॒द्राय॑ म॒ख॒घ्ने नम॑स्कृत्या मा पा॒हीत्या॑ग्नी॒ध्रं तस्मा॑ ए॒व नम॑स्कृत्य॒
सदः॑ प्रस॒र्पत्या॑त्मनो॒ऽना॒र्त्ये॒ नम॑ इन्द्राय॒ म॒ख॒घ्न इन्द्रि॑यं मे वी॒र्यं॑ मा॒
निर्व॑धीरिति॒ हो॒त्रीय॑मा॒शिष॑मे॒वैता॑मा शा॒स्तइन्द्रि॑यस्य॒ वी॒र्यस्या॑निर्घा॒ताय॑
या वै - [] 12

3.2.4.3

दे॒वताः॑ सद॒स्यार्ति॑मा॒र्पय॑न्ति यस्ता वि॒द्वान् प्र॒स॒र्पति॑ न सद॒स्यार्ति॑मा॒र्च्छति॑
नमो॒ऽग्नये॑ म॒ख॒घ्न इत्या॑हैता वै दे॒वताः॑ सद॒स्यार्ति॑मा॒र्पय॑न्ति ता य ए॒वं
वि॒द्वान् प्र॒स॒र्पति॑ न सद॒स्यार्ति॑मा॒र्च्छति॑ दृ॒ढे स्थः॑ शि॒थिरे॑ समी॒ची
मा॒ऽह॒स॒स्पात॑ सूर्यो॑ मा दे॒वो दि॒व्याद॑ह॒स॒स्पातु॑
वा॒युरन्त॑रिक्षा - [] 13

3.2.4.4

द॒ग्निः पृ॒थि॒व्या य॒मः पि॒तृ॒भ्यः सर॒स्वती म॒नुष्ये॑भ्यो दे॒वी द्वा॒रौ मा मा सं
ता॒प्तं नमः॑ सद॒से नमः॑ सद॒सस्प॑तये नमः॑ स॒खीनां॑ पु॒रोगा॑णां चक्षु॒षे नमो॑
दि॒वे नमः॑ पृ॒थि॒व्या अ॒हे दै॒धिष॑व्योद॒तस्ति॑ष्ठाऽन्यस्य॒ सद॒ने सी॒द योऽस्मत्
पा॒क॒तर॑ उ॒न्नि॒वत॑ उ॒दु॒द्वत॑श्च गे॒षं पा॒तं मा द्या॒वापृ॑थि॒वी अ॒द्याहः॑ स॒दो वै
प्र॒स॒र्प॒न्तं - [] 14

3.2.4.5

पि॒तरोऽनु॑ प्र॒स॒र्प॒न्ति त ए॒नमी॑श्च॒रा हि॒सि॒तोः सदः॑ प्र॒सृ॒प्य दक्षि॑णार्धं
प॒रेक्षे॑ताऽग॒न्त पि॒तरः॑ पि॒तृमा॒नहं॑ यु॒ष्माभि॑र्भूयास॒ सु॒प्र॒जसो॑ मया॒ यूयं॑
भूया॒स्तेति॑ तेभ्य॒ एव॑ नम॒स्कृत्य॑ सदः॑ प्र॒स॒र्प॒त्यात्म॑नोऽना॒त्यै । 15

(म॒खो - वा - अ॒न्तरि॑क्षात् - प्र॒स॒र्प॒न्तं - त्रय॑स्त्रि॒श॒च्च) (A4)

3.2.5.1

भक्षे॑हि मा ऽऽवि॒श दी॒र्घायु॑त्वाय॒ शन्त॑नु॒त्वाय॑ रा॒यस्पोषा॑य
व॒र्च॒से सु॒प्र॒जास्त्वाये॑हि व॒सो पु॒रो व॒सो प्रि॒यो मे हृदोऽस्य॑श्चि॒नोस्त्वा॑
बा॒हुभ्या॑ सु॒चक्ष॑सं त्वा दे॒व सोम॑ सु॒चक्ष॑ा अव॒ ख्ये॑षं

म॒न्द्राऽभि॒भूतिः॑ के॒तुर्य॒ज्ञानां॑ वा॒ग्जुषा॑णा सोम॒स्य तृ॒प्यतु॑ म॒न्द्रा
स्व॒र्वाच्य॑दि॒तिर॒नाहत॑ शी॒र्ष्णी वा॒ग्जुषा॑णा सोम॒स्य तृ॒प्यत्वे॑हि
वि॒श्वच॑र्षणे – [] 16

3.2.5.2

श॒म्भूर्मयो॑भूः स्व॒स्ति मा॑ हरि॒वर्णं॑ प्र॒चर॑ क्र॒त्वे द॒क्षाय॑ रा॒यस्पोषा॑य
सु॒वीर॑तायै मा मा॒ राज॑न् वि बी॒भिषो॑ मा मे॒ हार्दि॑ त्विषा॒ वधीः॑ ।
वृष॑णे शु॒ष्मायाऽऽयु॑षे वर्च॑से । वसु॑मद्-गण॒स्य सोम॑ दे॒व ते म॒तिवि॑दः
प्रा॒तः स॒वन॒स्य गा॒यत्र॑छन्द॒स इन्द्र॑पी॒तस्य॑ नरा॒श॑स॒पीत॑स्य पि॒तृपी॑तस्य
मधु॑मत॒ उप॑हू॒तस्यो॑पहू॒तो भ॑क्षयामि रु॒द्रव॑द्-गण॒स्य सोम॑ दे॒व ते
म॒तिवि॑दो मा॒ध्यन्दि॑नस्य स॒वन॒स्य त्रि॒ष्टुप्छ॑न्द॒स इन्द्र॑पी॒तस्य॑
नरा॒श॑स॒पीत॑स्य – [] 17

3.2.5.3

पि॒तृपी॑तस्य मधु॑मत॒ उप॑हू॒तस्यो॑पहू॒तो भ॑क्षयाम्यादि॒त्यव॑द्-गण॒स्य
सोम॑ दे॒व ते म॒तिवि॑दस्तृ॒तीय॑स्य स॒वन॒स्य ज॑गतीछन्द॒स इन्द्र॑पी॒तस्य॑

नरा॑श॒ꣳ स॒पी॒तस्य॑ पि॒तृ॒पी॒तस्य॑ म॒धु॒मत॑ उप॒हू॒तस्यो॑प॒हू॒तो भक्ष॑यामि ।
 आ॒प्या॒यस्व॑ स॒मे॒तु ते॑ वि॒श्वतः॑ सोम॒ वृ॒ष्णि॒यं । भवा॑ वा॒जस्य॑ स॒ङ्ग॒थे ।
 हि॒न्व मे॑ गा॒त्रा हरि॑वो ग॒णान् मे॑ मा वि॒ती॒तृषः॑ ।
 शि॒वो मे॑ स॒प्त॒र्षी॒नुप॑ तिष्ठ॒स्व मा मे॒ऽवा॒ङ्नाभि॑मति - [] 18

3.2.5.4

गाः । अ॒पा॒म सोम॑म॒मृता॑ अ॒भू॒माऽद॑र्श॒र्म ज्योति॑रवि॒दाम॑ दे॒वान् ।
 कि॒मस्मा॑न् कृ॒णव॑दरातिः कि॒मु धू॒र्ति॒रमृ॑त॒ मर्त्य॑स्य ।
 यन्म॑ आ॒त्मनो॑ मि॒न्दाऽभू॑द॒ग्निस्त॑त् पु॒नराऽहो॑र्जा॒तवे॑दा वि॒चर्ष॑णिः ।
 पु॒नर॑ग्निश्चक्षु॒रदा॑त्-पु॒नरि॑न्द्रो बृ॒हस्प॑तिः ।
 पु॒नर्मे॑ अ॒श्विना॑ यु॒वं चक्षु॑रा ध॒त्तम॑क्ष्योः ।
 इ॒ष्टय॑जुष॒स्ते दे॑व सोम॒ स्तु॒तस्तो॑मस्य - [] 19

3.2.5.5

श॒स्तोक्थ॑स्य हरि॒वत॑ इ॒न्द्रपी॑तस्य म॒धु॒मत॑ उप॒हू॒तस्यो॑प॒हू॒तो भक्ष॑यामि ।
 आ॒पूर्याः॑ स्थाऽऽमा॒ पू॒रय॑त प्र॒जया॑ च ध॒नेन॑ च ।

ए॒तत् ते॒ तत॒ ये च॒ त्वाम॑न्वे॒तत् ते॒ पिता॑म॒ह प्र॒पिता॑म॒ह ये च॒ त्वाम॑न्व॒त्र पि॒तरो॑
यथा॑भा॒गं म॑न्द॒ध्वं नमो॑ वः पि॒तरो॑ र॒साय॑ नमो॑ वः पि॒तरः॑ शु॒ष्माय॑
नमो॑ वः पि॒तरो॑ जी॒वाय॑ नमो॑ वः पि॒तरः॑ – [] 20

3.2.5.6

स्व॒धायै॑ नमो॑ वः पि॒तरो॑ म॒न्यवे॑ नमो॑ वः पि॒तरो॑ घो॒राय॑ पि॒तरो॑ नमो॑ वो
य ए॒तस्मिन्॑ लो॒के स्थ॑ यु॒ष्मा ऽस्ते॑ ऽनु॒ ये ऽस्मिन्॑ लो॒के मां ते॑ ऽनु॒ य ए॒तस्मिन्॑
लो॒के स्थ॑ यू॒यं तेषां॑ व॒सिष्ठा॑ भू॒यास्त॑ ये ऽस्मिन्॑ लो॒के ऽहं॑ तेषां॑ व॒सिष्ठो॑
भू॒यासं॑ प्र॒जाप॑ते न त्वदे॒तान्य॑न्यो वि॒श्वा जा॒तानि॑ परि॒ता ब॑भूव । 21

3.2.5.7

यत् का॒मास्ते॑ जुहु॒मस्तन्नो॑ अस्तु व॒य ऽ स्या॑म प॒तयो॑ र॒यीणां॑ ।
दे॒वकृ॑तस्यै॒नसो॑ ऽव॒यज॑नम॒सि म॒नुष्य॑कृ॒तस्यै॒नसो॑ ऽव॒यज॑नम॒सि
पि॒तृकृ॑तस्यै॒नसो॑ ऽव॒यज॑नम॒स्यप्सु॑ धौ॒तस्य॑ सोम॒ देव॑ ते नृ॒भिः
सु॒तस्ये॑ष्ट य॒जुषः॑ स्तु॒तस्तो॑मस्य॒ शस्तो॑क्थस्य॒ यो भ॑क्षो॒ अश्व॑स॒निर्यो॑
गो॒सनि॑स्तस्य॒ ते पि॒तृभि॑र्भ॒क्षं कृ॑तस्यो॒-प॑हू॒तस्यो॑प॒हूतो॑ भक्षयामि । 22

(वि॒श्व॒च॒र्ष॒णो – त्रि॒ष्टु॒च्छ॒न्द॒स इ॒न्द्र॒पी॒त॒स्य॒ न॒रा॒श॒ꣳ स॒पी॒त॒स्या दृ॒
 ऽति॑ – स्तु॒त॒स्तो॒म॒स्य – जी॒वा॒य नमो॑ वः पि॒त॒रो – ब॒भू॒व –
 चतु॑श्च॒त्वारि॑ꣳश॒च्च) (A5)

3.2.6.1

म॒ही॒नां प॒यो॒ऽसि॒ वि॒श्वे॑षां दे॒वानां॑ त॒नूर् ऋ॒ध्या॒स॒म॒द्य पृ॒ष॒ती॒नां ग्र॒हं पृ॒ष॒ती॒नां
 ग्र॒हो॒ऽसि॒ वि॒ष्णो॒र्हृ॒द॒य॒म॒स्ये॒क॒मि॒ष वि॒ष्णु॒स्त्वा॒ऽनु वि॒च॒क्र॒मे भू॒ति॒र्द॒ध्ना
 घृ॒ते॒न वर्ध॑तां त॒स्य मे॒ष्ट॒स्य वी॒त॒स्य द्र॒वि॒ण॒मा ग॒म्या॒ज्ज्यो॒ति॒र॒सि वै॒श्वान॑रं
 पृ॒श्नि॒ज॒यै दु॒ग्धं या॒वती॑ द्या॒वापृ॑थि॒वी म॒हि॒त्वा या॒वच्च॑ स॒प्त सि॒न्ध॒वो
 वि॒त॒स्थुः । ता॒वन्त॑मिन्द्र ते – [] 23

3.2.6.2

ग्र॒हꣳ स॒हो॒र्जा गृ॒ह्णाम्य॑स्तृ॒तं । यत् कृ॒ष्ण॒श॒कु॒नः पृ॒ष॒दा॒ज्य॒म॒व॒मृ॒शे॒च्छू॒द्रा
 अ॒स्य प्र॒मा॒यु॒काः स्यु॒र्यच्छ्वा॑ ऽव॒मृ॒शे॒च्चतु॑ष्पादो॒ऽस्य प॒श॒वः प्र॒मा॒यु॒काः
 स्यु॒र्यथ् स्क॒न्दे॒द्-य॒ज॒मा॒नः प्र॒मा॒यु॒कः स्यात् प॒श॒वो वै पृ॒ष॒दा॒ज्यं प॒श॒वो
 वा ए॒त॒स्य स्क॒न्द॒न्ति॒ यस्य॑ पृ॒ष॒दा॒ज्यꣳ स्क॒न्द॒ति॒ यत् पृ॒ष॒दा॒ज्यं पु॒नर्गृ॑ह्णाति

प॒शू॒ने॒वा॒स्मै पु॒नर्गृ॒ह्णा॒ति प्रा॒णो वै पृ॒षदा॒ज्यं प्रा॒णो वा - [] 24

3.2.6.3

ए॒तस्य॑ स्क्॒न्दति॑ यस्य॑ पृ॒षदा॒ज्यं॑ स्क्॒न्दति॑ यत् पृ॒षदा॒ज्यं पु॒नर्गृ॒ह्णा॒ति
प्रा॒णमे॒वा॒स्मै पु॒नर्गृ॒ह्णा॒ति हि॒र॒ण्य॒मव॒धाय॑ गृ॒ह्णा॒त्यमृ॒तं वै हि॒र॒ण्यं प्रा॒णः
पृ॒षदा॒ज्य॒ममृ॒तमे॒वा॒स्य प्रा॒णो द॒धाति॑ श॒तमा॒नं भ॒वति॑ श॒तायुः॑ पु॒रुषः॑
श॒तेन्द्रि॒य आ॒युष्ये॒वेन्द्रि॒ये प्र॒ति॒तिष्ठ॑त्यश्च॒मव॑ घ्रा॒पय॑ति प्रा॒जाप॑त्यो वा अ॒श्वः
प्रा॒जाप॑त्यः प्रा॒णः स्वा॒दे॒वा॒स्मै यो॒नेः॑ प्रा॒णं () नि॒र्मि॒मी॒ते वि॒ वा ए॒तस्य॑
य॒ज्ञश्छि॑द्यते यस्य॑ पृ॒षदा॒ज्यं॑ स्क्॒न्दति॑ वैष्ण॒व्यर्चा पु॒नर्गृ॒ह्णा॒ति
य॒ज्ञो वै वि॒ष्णुर्य॒ज्ञेनै॒व य॒ज्ञं सं त॑नोति । 25

(ते - पृ॒षदा॒ज्यं प्रा॒णो वै - यो॒नेः॑ प्रा॒णं - द्वाविं॑शतिश्च) (A6)

3.2.7.1

दे॒व स॒वित॑रे॒तत् ते प्रा॒ऽऽह॑ तत् प्र च सु॒व प्र च य॒ज बृ॒हस्प॑तिर्ब्र॒ह्मा
ऽऽयु॑ष्म॒त्या ऋ॒चो मा गा॑त त॒नूपा॑थ् सा॒मन् स॒त्या व आ॒शिषः॑ स॒न्तु स॒त्या
आ॒कू॒तय॑ ऋ॒तं च स॒त्यं च व॑दत स्तु॒त दे॒वस्य॑ स॒वितुः॑ प्र॒सवे॑ स्तु॒तस्य॑

स्तु॒त॒म॒स्यूर्जं॑ म॒ह्यञ् स्तु॒तं दु॒हामा॑ मा स्तु॒तस्य॑ स्तु॒तं
ग॒म्याच्छ॒स्त्रस्य॑ श॒स्त्र - [] 26

3.2.7.2

म॒स्यूर्जं॑ म॒ह्यञ् श॒स्त्रं दु॒हामा॑ मा श॒स्त्रस्य॑ श॒स्त्रं ग॒म्या-दि॒न्द्रि॒याव॑न्तो
व॒नाम॑हे धु॒क्षी॒महि॑ प्र॒जामि॑षं । सा मे स॒त्याऽऽशी॑र्दे॒वेषु॑ भू॒याद्-ब्र॑ह्मव॒र्चसं॑
माऽऽ ग॒म्यात् । य॒ज्ञो ब॒भूव॑ स आ ब॒भूव॑ सप्र॒जज्ञे॑ स वावृ॑धे ।
स दे॒वाना॑मधि-प॒तिर्ब॒भूव॑ सो अ॒स्माञ् अधि॑पतीन् करोतु व॒यञ् स्या॑म
प॒तयो॑ र॒यीणां॑ । य॒ज्ञो वा वै - [] 27

3.2.7.3

य॒ज्ञप॑तिं दु॒हे य॒ज्ञप॑तिर्वा य॒ज्ञं दु॒हे स यः स्तु॒तश॒स्त्रयो॑र्दो॒हम॑
वि॒द्वान् य॒जते॑ तं य॒ज्ञो दु॒हे स इ॒ष्ट्वा पा॑पी॒यान् भ॑वति य ए॒नयो॑र्दो॒हं
वि॒द्वान् य॒जते॑ स य॒ज्ञं दु॒हे स इ॒ष्ट्वा व॑सी॒यान् भ॑वति स्तु॒तस्य॑
स्तु॒त॒म॒स्यूर्जं॑ म॒ह्यञ् स्तु॒तं दु॒हामा॑ मा स्तु॒तस्य॑ स्तु॒तं
ग॒म्याच्छ॒स्त्रस्य॑ श॒स्त्रम॒स्यूर्जं॑ म॒ह्यञ् श॒स्त्रं दु॒हा () मा मा

श॒स्त्रस्य॑ श॒स्त्रं ग॒म्यादि॒त्याहै॒ष वै स्तु॒तश॒स्त्रयो॒र्दोह॒स्तं
 य॑ ए॒वं वि॒द्वान् यज॑ते दु॒ह ए॒व य॒ज्ञमि॒ष्ट्वा व॒सीयान् भ॑वति । 28
 (श॒स्त्रं - वै - श॒स्त्रन्दु॒हां - द्वावि॑शतिश्च) (A7)

3.2.8.1

श्ये॒नाय॑ प॒त्वने॑ स्वा॒हा वट्थ॑स्वयमभिगूर्ताय॑ नमो॑ विष्ट॒म्भाय॑
 धर्म॑णे स्वा॒हा वट्थ॑स्वयमभिगूर्ताय॑ नमः॑ परि॒धये॑ जन॒प्रथ॑नाय स्वा॒हा
 वट्थ॑स्वयमभिगूर्ताय॑ नम॑ ऊ॒र्जे हो॒त्राणा॑ स्वा॒हा वट्थ॑स्वयमभिगूर्ताय॑
 नमः॑ पय॒से हो॒त्राणा॑ स्वा॒हा वट्थ॑स्वयमभिगूर्ताय॑ नमः॑ प्र॒जाप॑तये
 मन॑वे स्वा॒हा वट्थ॑स्वयमभिगूर्ताय॑ नम॑ ऋ॒तमृ॑तपाः सुव॒र्वाट्थ॑स्वा॒हा
 वट्थ॑स्वयमभिगूर्ताय॑ नम॑स्तृ॒पन्ता॑ हो॒त्रा म॒धोर्घृ॑तस्य॑ य॒ज्ञप॑तिमृषय॑
 ए॒नसा - [] 29

3.2.8.2

ऽऽहुः॑ । प्र॒जा निर्भ॑क्ता अनु॒तप्य॑माना म॒धव्यौ॑ स्तो॒काव॑प॒ तौ र॑राध ।
 सं न॒स्ताभ्या॑ सृ॒जतु॑वि॒श्वकर्मा॑ घो॒रा ऋ॑षयो॒ नमो॑ अ॒स्त्वेभ्यः॑ ।

चक्षु॑ष ए॒षां॑ म॒नस॑श्च स॒न्धौ॑ बृ॒हस्प॑तये॒ महि॑ षद् द्यु॒मन्न॑मः ।
 नमो॑ वि॒श्वक॑र्मणे॒ स उ॑ पा॒त्वस्मा॑नन॒न्यान्थ्-सो॑म॒पान् म॑न्यमानः ।
 प्रा॒णस्य॑ वि॒द्वान्थ् स॑मरे॒ न धी॑र ए॒नश्च॑ कृ॒वान् महि॑ ब॒द्ध ए॒षां ।
 तं वि॒श्वक॑र्मन् - [] 30

3.2.8.3

-प्र मु॒ञ्चा स्व॑स्तये॒ ये भ॑क्षयन्तो॒ न व॑सू॒न्यान्नु॑हुः ।
 या॒नग्न॑योऽन्व॒तप्य॑न्त धि॒ष्णि॒या इ॒यं ते॑षा॒मव॑या दु॒रिष्ट्यै॑
 स्वि॒ष्टिं न॑स्तां कृ॒णोतु॑ वि॒श्वक॑र्मा । नमः॑ पि॒तृभ्यो॑ अ॒भि ये नो॑ अ॒ख्यन्
 य॒ज्ञकृ॑तो॒ य॒ज्ञका॑माः सु॒दे॒वा अ॑का॒मा वो॑ दक्षि॒णां न॑ नी॒निम॑ मा न॒स्तस्मा॑
 दे॒नसः॑ पा॒पयि॑ष्ट । या॒वन्तो॑ वै स॒दस्या॑स्ते॒ सर्वे॑ दक्षि॒ण्यास्ते॑भ्यो
 यो दक्षि॒णां न॑ - [] 31

3.2.8.4

नये॑दै॒भ्यो वृ॑श्येत॒ यद्-वै॑श्वक॒र्मणा॑नि जु॒होति॑ स॒दस्या॑ने॒व तत्
 प्री॑णात्य॒स्मो दे॒वासो॑ व॒पुषे॑ चि॒किथ्स॑त॒ यमा॑शि॒रा द॑म्पती॒ वाम॑म॒श्नुतः॑ ।

पु॒मान् पु॒त्रो जा॒यते॑ वि॒न्दते॑ व॒स्वथ॑ वि॒श्वे अ॒रपा॑ ए॒धते॑ गृ॒हः ।
 आ॒शी॒र्दा॒या द॒म्पती॑ वा॒मम॑श्नुताम॒रि॒ष्टो रा॒यः स॒चता॑ꣳ स॒मो॒कसा॑ ।
 य आ॒ऽसि॒च॒त् सं दु॒ग्धं कु॒म्भ्या स॒हे॒ष्टेन॑ या॒मन्न॑मतिं जहातु सः ।

स॒र्पि॒र्ग्री॒वी – [] 32

3.2.8.5

पी॒वर्य॑स्य जा॒या पी॒वानः॑ पु॒त्रा अ॒कृ॒शासो॑ अ॒स्य ।
 स॒हजा॑निर्यः सु॒मख॑स्यमा॒न इ॒न्द्रा॒याऽऽ*शि॒रꣳ स॒ह कु॒म्भ्याऽदा॑त् ।
 आ॒शी॒र्म ऊ॒र्ज॒मु॒त सु॒प्रजा॑स्त्वमिषं दधातु द्र॒वि॒णꣳ स॒व॒र्च॒सं ।
 सं ज॒यन् क्षे॒त्राणि॑ स॒हसा॑ऽहमिन्द्र कृ॒ण्वानो॑ अ॒न्याꣳ अ॒ध॒रान्थ॑सप॒त्नान् ।
 भू॒तम॑सि भू॒ते मा॑ धा॒ मुख॑मसि॒ मुखं॑ भू॒यासं॑ द्या॒वापृ॑थि॒वीभ्यां॑
 त्वा परि॑गृह्णामि वि॒श्वे त्वा दे॒वा वै॒श्वान॑राः – [] 33

3.2.8.6

प्र॒च्याव॑यन्तु दि॒वि दे॒वान् दृ॒हान्तरि॑क्षे व॒याꣳसि॑ पृ॒थि॒व्यां पा॒र्थि॒वान्
 ध्रु॒वं ध्रु॒वेण॑ ह॒विषा॑ऽव सोमं नयामसि ।

यथा नः सर्वमिज्जगदयक्ष्मञ् सुमना असत् ।

यथा न इन्द्र इद्विशः केवलीः सर्वाः समनसः करत् ।

यथा नः सर्वा इद्विशोऽस्माकं केवलीरसन् । 34

(ए॒नसा - वि॒श्वक॑र्मन् - यो दक्षि॑णां न - सर्पि॑र्ग्री॒वी - वै॒श्व॒नरा -
श्च॑त् वारि॑ञ्शच्च) (A8)

3.2.9.1

यद्वै होता॑ध्वर्यु॑मभ्या॑ह्वयते॒ वज्र॑मे॒नम॑भि प्रव॑र्तयत्यु॒क्थशा॑ इत्या॒ह प्रा॑तः
स॒वनं॑ प्र॒तिगी॑र्य त्री॒ण्ये॒तान्य॑क्षराणि त्रि॒पदा॑ गाय॒त्री गाय॑त्रं प्रा॒तः स॒वनं॑
गाय॒त्रियै॑व प्रा॒तः स॒वने॑ वज्र॑मन्त॒र्धत्त॑ उ॒क्थं वा॑चीत्या॒ह मा॒ध्यंदि॑नञ्
स॒वनं॑ प्र॒तिगी॑र्य च॒त्वार्ये॑तान्य-क्षराणि चतु॒ष्पदा॑ त्रि॒ष्टुप् त्रै॒ष्टुभं॑ मा॒ध्यंदि॑नञ्
स॒वनं॑ त्रि॒ष्टुभै॑व मा॒ध्यन्दि॑ने स॒वने॑ वज्र॑मन्त॒र्धत्त॑ - [] 35

3.2.9.2

उ॒क्थं वा॑चीन्द्रायेत्या॒ह तृ॒तीय॑स॒वनं॑ प्र॒तिगी॑र्य स॒प्तै॒तान्य॑क्षराणि
स॒प्त॒पदा॑ श॒क्वरी॑ श॒क्वरो॑ वज्रो॒ वज्रे॑णै॒व तृ॒तीय॑स॒वने॑ वज्र॑मन्त॒र्धत्ते॑

ब्रह्मवादिनो॑ वदन्ति॑ स॒ त्वा अध्व॑र्युः स्याद्यो॑ यथास॒वनं प्रति॑गरे॒ छन्दा॑ꣳसि
सम्पा॑दयेत् तेजः॑ प्रातः॑ स॒वन आ॒त्मन् दधी॑तेन्द्रि॒यं माध्य॑न्दिने॒ सवने॑
पशू॑ꣳ स्तृतीयस॒वन इत्यु॑क्थशा॒ इत्याह॑ प्रातः॑ स॒वनं प्रति॑गीर्य
त्रीण्ये॑तान्यक्षराणि – [] 36

3.2.9.3

त्रिप॑दा गाय॒त्री गाय॑त्रं प्रातः॑ स॒वनं प्रातः॑ स॒वन ए॒व प्रति॑गरे॒
छन्दा॑ꣳसि संपा॑दयत्यथो तेजो॑ वै गाय॒त्री तेजः॑ प्रातः॑ स॒वनं तेज॑
ए॒व प्रातः॑स॒वन आ॒त्मन् धत्त॑ उक्थं वा॒चीत्याह॑ माध्य॑न्दिनꣳ
स॒वनं प्रति॑गीर्य च॒त्वार्ये॑तान्यक्षराणि चतु॑ष्पदा त्रि॒ष्टुप् त्रै॒ष्टुभं
माध्य॑न्दिनꣳ स॒वनं माध्य॑न्दिन ए॒व स॒वने प्रति॑गरे॒ छन्दा॑ꣳसि
संपा॑दयत्यथो इन्द्रि॒यं वै त्रि॒ष्टुगिन्द्रि॒यं माध्य॑न्दिनꣳ स॒वन – [] 37

3.2.9.4

–मिन्द्रि॒यमे॒व माध्य॑न्दिने॒ स॒वन आ॒त्मन् धत्त॑ उक्थं वा॒चीन्द्रा॒येत्याह॑
तृतीयस॒वनं प्रति॑गीर्य स॒प्तैतान्य॑क्षराणि स॒प्तप॑दा श॒क्वरी श॒क्वराः

प॒शवो॑ जा॒गतं॑ तृ॒तीयस॒वनं॑ तृ॒तीयस॒वन ए॒व प्र॒तिग॒रे छ॒न्दा॒सि॒
सं॒पाद॒यत्य॑थो॒ प॒शवो॑ वै ज॒गती॑ प॒शव॑स्तृ॒तीयस॒वनं॑ प॒शूने॒व
तृ॒तीयस॒वन आ॒त्मन् ध॒त्ते य॒द्वै हो॒ताऽध्व॑र्युम॒भ्याह्व॑यत
आ॒व्यम॑स्मिन् द॒धाति॑ तद्य॒न्ना - [] 38

3.2.9.5

प॒हनी॑त पु॒राऽस्य॑ सं॒वत्स॒राद्-गृ॒ह आ वे॑वीर॒ज्छो॒सा मो॑द इ॒वेति॑
प्र॒त्याह्व॑यते तेनै॒व तद॑प॒ हते॑ यथा॒ वा आ॒यतां॑ प्र॒तीक्ष॑त ए॒वम॑ध्व॒र्युः
प्र॒तिग॒रं प्र॒तीक्ष॑ते यद॒भि प्र॒तिगृ॑णीयाद्यथा॒ ऽऽय॑तया॒ समृ॑च्छते ता॒दृगे॒व
तद्य॑दर्ध॒र्चा॒ल्लुप्ये॑त यथा॒ धाव॑द्भ्यो॒ हीय॑ते ता॒दृगे॒व तत् प्र॒बाहु॑ग्वा
ऋ॒त्विजा॑मु॒द्गीथा॑ उ॒द्गीथ॑ ए॒वोद्-गा॑तृणा - [] 39

3.2.9.6

मृ॒चः प्र॒णव॑ उ॒क्थ॑श॒सिनां॑ प्र॒तिग॒रोऽध्व॑र्यूणां॒ य ए॒वं वि॒द्वान्
प्र॒तिगृ॑णात्य॒न्नाद॑ ए॒व भ॒वत्या॑स्य॒ प्रजा॑यां॒ वा॒जी जा॑यत इ॒यं वै
हो॒ताऽसा॑वध्व॒र्युर्य॑दासी॒नः श॒स्य॑ स॒त्यस्या॑ ए॒व तद्धो॑ता॒ नैत्या॑स्त इ॒व

ही॒य॒म॒थो॑ इ॒मा॒मे॒व ते॒न य॒ज॒मा॒नो दु॒हे यत् ति॒ष्ठन् प्र॒ति॒गृ॒णा॒त्य॒मु॒ष्या ए॒व
तद॒ध्व॒र्यु॒र्नै॒ति - [] 40

3.2.9.7

ति॒ष्ठ॒ती॒व ह्य॒सा॒व॒थो॑ अ॒मू॒मे॒व ते॒न य॒ज॒मा॒नो दु॒हे यदा॑सी॒नः श॒स॒ति
तस्मा॑दि॒तः प्र॒दानं॑ दे॒वा उप॑ जी॒वन्ति॑ यत् ति॒ष्ठन् प्र॒ति॒गृ॒णा॒ति तस्मा॑द॒मु॒तः
प्र॒दानं॑ म॒नु॒ष्या उप॑ जी॒वन्ति॑ यत् प्रा॒डासी॑नः श॒स॒ति प्र॒त्य॒ङ् ति॒ष्ठन्
प्र॒ति॒गृ॒णा॒ति तस्मा॑त् प्रा॒ची॒न॒रे॒तो धी॑य॒ते प्र॒ती॒चीः प्र॒जा जा॑य॒न्ते यद्वै
हो॒ताऽध्व॑र्यु॒मभ्या॑ह्व॒यते॑ व॒ज्र॒मे॒न॒म॒भि प्र॑व॒र्त॒य॒ति () प॒रा॒डा वर्त॑ते व॒ज्र॒मे॒व
तन्नि॑ करो॒ति । 41

(स॒व॒ने॒ व॒ज्र॒म॒न्त॒र्ध॒त्ते - त्री॑ण्ये॒ता॒न्य॒क्ष॒रा॒णी - न्द्रि॑यं मा॒ध्य॒न्दि॒न॒स॒व॒नं
- नो॑ - द्रा॒तृ॒णा - म॒ध्व॒र्यु॒र्नै॒ति - वर्त॑य॒त्य - षौ च॑) (A9)

3.2.10.1

उ॒प॒या॒म॒गृ॒ही॒तो॒ऽसि॑ वा॒क्ष॒स॒द॒सि॑ वा॒क्पा॒भ्यां॑ त्वा क्र॒तु॒पा॒भ्या॑म॒स्य य॒ज्ञ॒स्य॑
ध्रु॒व॒स्या॒ऽध्य॑-क्षा॒भ्यां॑ गृ॒ह्णा-म्यु॒प॒या॒म॒गृ॒ही॒तो॒ऽस्य॑त॒स॒द॒सि॑ चक्षु॒ष्पा॒भ्यां॑

त्वा॑ क्र॒तु॒पा॒भ्या॒मस्य॑ य॒ज्ञस्य॑ ध्रु॒वस्या॑ऽध्यक्षा॒भ्यां गृ॒ह्णाम्यु॒पयाम॑गृहीतोऽसि
 श्रु॒तस॑दसि श्रो॒त्रपा॒भ्यां त्वा॑ क्र॒तु॒पा॒भ्या॒मस्य॑ य॒ज्ञस्य॑ ध्रु॒वस्या॑ऽध्यक्षा॒भ्यां
 गृ॒ह्णामि॑ दे॒वेभ्य॑स्त्वा वि॒श्वदे॑वेभ्यस्त्वा वि॒श्वेभ्य॑स्त्वा दे॒वेभ्यो॑
 वि॒ष्णवु॑रु॒क्रमै॑ष ते सोम॑स्तꣳ रक्ष॑स्व - [] 42

3.2.10.2

तं ते॑ दु॒श्चक्षा॑ माऽव॑ ख्यन्मयि॒ वसुः॑ पु॒रोव॑सु॒र्वाक्पा॑ वाचं॑ मे पा॒हि मयि॑
 वसु॑र्वि॒दद्व॑सुश्चक्षु॒ष्पाश्चक्षु॑र् मे पा॒हि मयि॑ वसुः॑ सँयद्व॑सुः
 श्रो॒त्रपाः॑ श्रो॒त्रं मे॑ पा॒हि भू॑रसि श्रेष्ठो॑ रश्मी॒नां प्रा॑णपाः प्रा॒णं
 मे॑ पा॒हि धू॑रसि श्रेष्ठो॑ रश्मी॒नाम॑पानपा अपा॒नं मे॑ पा॒हि यो न॑ इन्द्र॒वायू
 मि॒त्राव॑रुणा-व॒श्विना॑व॒भिदा॑सति भ्रातृ॒व्य () उत्पि॑पीते शु॒भस्प॑ती इ॒दम॑हं
 तम॑धरं पा॒दयामि॑ यथेन्द्राऽहमु॒त्तम॑श्चे॒तयानि॑ । 43

(रक्ष॑स्व - भ्रातृ॒व्य - स्त्रयो॑दश च) (A10)

3.2.11.1

प्र॒ सो॒ अ॒ग्ने॒ तवो॑तिभिः॒ सु॒वी॒रा॒भि॒स्तर॑ति॒ वा॒ज॒क॒र्म॒भिः॑ । यस्य॒ त्व॑
स॒ख्य॒मा॒वि॒थ । प्र॒ हो॒त्रे॒ पू॒र्व्यं॑ व॒चो॑ऽग्नये॒ भर॑ता बृ॒हत् ।
वि॒पां ज्यो॑ती॒षि॒ बिभ्र॑ते॒ न वे॒ध॒से॑ । अ॒ग्ने॒ त्री॑ ते॒ वा॒जि॒ना॒ त्री॑ ष॒ध॒स्था॑
ति॒स्र॒स्ते॒ जि॒ह्वा॒ ऋ॒त॒जा॒त॒ पू॒र्वीः॑ । ति॒स्र उ॑ ते॒ त॒नु॒वो॑ दे॒व॒वा॒ता॒स्ता॒भिर्नः॑ पा॒हि
गि॒रो अ॑प्र॒यु॒च्छन् । सं॒ वा॒ क॒र्म॒णा॒ स॒मि॒षा - [] 44

3.2.11.2

हि॒नो॒मी॒न्द्रा॒-वि॒ष्णू॒ अप॑स॒स्पारे॒ अस्य॑ ।
जु॒षे॒थां य॑ज्ञं द्र॒वि॒णं च॒ ध॒त्त॒म॒रि॒ष्टैर्नः॑ प॒थि॒भिः॑ पा॒र॒य॒न्ता॑ ।
उ॒भा जि॑ग्यथु॒र्न परा॑ जये॒थे न॑ परा॒ जि॑ग्ये॒ क॒तर॑श्च॒नै॒नोः॑ ।
इ॒न्द्रश्च॑ वि॒ष्णो य॑द॒प॒स्पृ॒धे॒थां त्रे॒धा स॒ह॒स्रं वि॑ तदै॒रये॑थां ।
त्री॒ण्यायू॑षि॒ तव॑ जा॒तवे॑द॒स्ति॒स्र आ॒जा॒नी॒रु॒ष॒स॒स्ते अ॒ग्ने ।
ता॒भिर्दे॑वा॒नाम॑वो॒ यक्षि॑ वि॒द्वान॑था - [] 45

3.2.11.3

–भव॑ यज॑मानाय॒ शँ योः॑ । अ॒ग्निस्त्री॑णि॒ त्रिधा॑तू॒न्या क्षे॑ति
वि॒दथा॑ क॒विः । स त्री॑र्॒रेका॑द॒शाँ इ॒ह । यक्ष॑च्च पिप्रय॑च्च
नो विप्रो॑ दू॒तः परि॑ष्कृतः । नभ॑न्तामन्य॒के समे॑ ।
इन्द्रा॑विष्णू दृ॒हिताः शम्बर॑स्य न॒व पुरो॑ न॒वतिं॑ च – श्र॒जथि॑ष्टं ।
शतं॑ व॒र्चिनः॑ स॒हस्रं॑ च सा॒कँ ह॒थो अप्र॑त्यसुर॒स्य वी॒रान् ।
उत॑ मा॒ता म॒हिष॑ मन्व॒वेन॑दमी॒ त्वा () ज॑हति पु॒त्र दे॒वाः ।
अथा॑ब्रवीद् – वृ॒त्रमिन्द्रो॑ ह॒निष्य॑न्थ् – स॒खे वि॑ष्णो वित॒रं वि॑क्रम॒स्व । 46
(इ॒षा – ऽथ॑ – त्वा – त्रयो॑दश च) (A11)

Prasna Korvai with starting Padams of 1 to 11 Anuvaakams :-

(यो वै प॒वमा॑नानां – त्री॑णि – परि॒भूरः॑ – स्प॒यः स्व॒स्ति – भ॒क्षेहि॑ –
म॒हीनां॑ पयो॒ऽसि॑ – दे॒व स॒वि॒तरे॑त॒त्ते – श्ये॑नाय – यद्वै हो॒तो –
प॒याम॑गृहीतो॒ऽसि॑ वा॒क्षस॑त् – प्र सो अ॒ग्न – ए॒काद॑श)

तृतीयकाण्डे द्वितीयः प्रश्नः

Korvai with starting Padams of 1, 11, 21 Series of Panchaatis :-

(यो वै – स्फ्यः स्वस्तिः – स्वधायै नमः – प्रमुञ्च – तिष्ठतीव –
षट्चत्वारिंशत्)

First and Last Padam of Second Prasnam of Kandam 3:-

(यो वै पवमानानां – विक्रमस्व)

॥ हरिः ओं ॥

॥ कृष्ण यजुर्वेदीय तैत्तिरीय संहितायां

तृतीयकाण्डे द्वितीयः प्रश्नः समाप्तः ॥

ओं नमः परमात्मने, श्री महागणपतये नमः, श्री गुरुभ्यो नमः

हरिः ओं

3.3 तृतीयकाण्डे तृतीयः प्रश्नः – वैकृतविधीनामभिधानं

3.3.1.1

अ॒ग्ने ते॒जस्वि॑न् ते॒जस्वी॑ त्वं दे॒वेषु॑ भू॒यास्ते॒जस्वन्तं॑ मा॒मायु॑ष्मन्तं
व॑र्चस्वन्तं म॒नुष्ये॑षु कुरु दी॒क्षायै॑ च त्वा तप॑सश्च ते॒जसे॑ जुहोमि
ते॒जोवि॑दसि ते॒जो मा मा हा॑सीन्माऽहं ते॒जो हा॑सिषं मा मां ते॒जो
हा॑सीदिन्द्रो॒जस्वि॑न्नो॒जस्वी॑ त्वं दे॒वेषु॑ भू॒या ओ॒जस्वन्तं॑ मा॒मायु॑ष्मन्तं
व॑र्चस्वन्तं म॒नुष्ये॑षु कुरु ब्र॒ह्मणश्च॑ त्वा क्ष॒त्रस्य॑ चो – [] 1

3.3.1.2

– जसे जुहोम्यो॒जोवि॑दस्यो॒जो मा मा हा॑सीन्माऽहमो॒जो हा॑सिषं मा
मा॒मो॒जो हा॑सीथ् सूर्य॑ भ्राजस्विन् भ्राजस्वी त्वं दे॒वेषु॑ भू॒या भ्राज॑स्वन्तं
मा॒मायु॑ष्मन्तं व॑र्चस्वन्तं म॒नुष्ये॑षु कुरु वा॒योश्च॑ त्वाऽपाञ्च॑ भ्राजसे
जुहोमि॒सुव॑र्विदसि सुव॒र्मा मा हा॑सीन्माऽहं सुव॒र्.हा॑सिषं मा मां

सुवर्॑.हासीन् मयि॑ () मे॒धां मयि॑ प्र॒जां मय्य॑ग्निस्तेजो॑ दधातु॒ मयि॑
मे॒धां मयि॑ प्र॒जां मयीन्द्र॑ इन्द्रि॒यं दधातु॑ मयि॑ मे॒धां मयि॑ प्र॒जां मयि॑ सूर्यो॑
भ्राजो॑ दधातु । 2 (क्षत्र॑स्य च – मयि॑ – त्रयो॑विंशतिश्च) (A1)

3.3.2.1

वायुर्.हिं॑कर्ताऽग्निः प्र॒स्तोता॑ प्र॒जापतिः॑ साम॒ बृह॑स्पतिरु॒द्गाता॑ विश्वे॑ दे॒वा
उप॑गातारो मरुतः॑ प्रति॒हर्तार॑ इन्द्रो॑ निधनन्ते दे॒वाः प्राण॑भृतः प्राणं
मयि॑ दध॒त्वैतद्वै॑ सर्व॑मध्वर्यु॒-रुपा॑कुर्वन्नु॒द्गातृ॑भ्य उपाकरोति ते दे॒वाः
प्राण॑भृतः प्राणं मयि॑ दध॒त्वित्या॑ हैतदे॒व सर्व॑मात्मन् धत्त॑ इडा दे॒वहू॑
र्मनु॑-र्यज्ञ॒नी-र्बृह॑स्पतिरु॒क्थाम॑दानि श॒सिषद्॑ विश्वे॑ दे॒वाः – [] 3

3.3.2.2

सू॒क्तवा॑चः पृथि॒वि मा॒तर्मा॑ माहि॒सी र्मधु॑ मनिष्ये मधु॑ जनिष्ये
मधु॑वक्ष्यामि मधु॑वदिष्यामि मधु॑मतीं दे॒वेभ्यो॑ वाचमु॒द्यास॑
शुश्रू॑षेण्यां मनु॒ष्येभ्य॑स्तं मा दे॒वा अव॑न्तु शो॒भायै॑ पि॒तरो॑ऽनु म॒दन्तु॑ । 4
(श॒सिषद्॑ विश्वे॑ दे॒वा – अ॒ष्टावि॑ंशतिश्च) (A2)

3.3.3.1

व॒सव॑स्त्वा प्र॒वृ॒हन्तु॑ गाय॒त्रेण॑ छ॒न्दसा॑ऽग्नेः प्रि॒यं पा॒थ उपे॑हि
रु॒द्रास्त्वा प्र॒वृ॒हन्तु॑ त्रै॒ष्टु॒भेन॑ छ॒न्दसे॑न्द्रस्य प्रि॒यं पा॒थ उपे॑ह्यादि॒त्यास्त्वा
प्र॒वृ॒हन्तु॑ जा॒गते॑न छ॒न्दसा॑ वि॒श्वेषां॑ दे॒वानां॑ प्रि॒यं पा॒थ उपे॑हि मा॒न्दा॒सु
ते शु॒क्र शु॒क्रमा॑ धू॒नोमि॑ भ॒न्दना॑सु को॒तना॑सु नू॒तना॑सु रे॒शीषु॑ मे॒षीषु॑
वा॒शीषु॑ वि॒श्वभृ॑त्सु मा॒ध्वीषु॑ ककु॒हासु॑ श॒क्वरी॑षु - [] 5

3.3.3.2

शु॒क्रासु॑ ते शु॒क्र शु॒क्रमा॑ धू॒नोमि॑ शु॒क्रं ते शु॒क्रेण॑ गृ॒ह्णाम्य॑हो रू॒पेण॑
सूर्य॑स्य र॒श्मिभिः॑ । आ॒ऽस्मिन्नु॒ग्रा अ॑चु॒च्यवु॑र्दिवो धा॒रा अस॑श्चत ।
ककु॒हꣳ रू॒पं वृ॑षभस्य रोचते बृ॒हत् सोमः॑ सोमस्य पु॒रोगाः॑ शु॒क्रः
शु॒क्रस्य॑ पु॒रोगाः॑ । यत् ते सो॒मादा॑भ्यं नाम जा॒गृवि॑ तस्मै ते सोम॑ सो॒माय॑
स्वा॒हो॒शिक् त्वं दे॑व सोम गाय॒त्रेण॑ छ॒न्दसा॑ऽग्नेः - [] 6

3.3.3.3

प्रि॒यं पा॒थो अपी॑हि व॒शी त्वं दे॑व सोम त्रै॒ष्टु॒भेन॑ छ॒न्दसे॑न्द्रस्य प्रि॒यं
पा॒थो अपी॑ह्यस्मत्स॒खा त्वं दे॑व सोम जा॒गते॑न छ॒न्दसा॑ वि॒श्वेषां॑ दे॒वानां॑

प्रि॒यं पा॒थो अ॒पी॒ह्या नः प्रा॒ण ए॒तु परा॒वत आ॒न्तरि॒क्षाद्वि॒स्प॒रि ।

आ॒युः पृ॒थि॒व्या अ॒ध्य॒मृ॒तम॒सि प्रा॒णाय॒ त्वा ।

इ॒न्द्रा॒ग्नी मे॒ वर्चः॑ कृ॒णुतां॑ वर्चः॑ सो॒मो बृ॒ह॒स्पतिः॑ () ।

वर्चो॑ मे॒ वि॒श्वे॒दे॒वा वर्चो॑ मे॒ ध॒त्त॒मश्चि॒ना ।

द॒ध॒न्वे वा॒ यदी॒मनु॒ वोच॑द्ब्र॒ह्मा॒णि वे॒रु तत् ।

परि॒ वि॒श्वानि॒ का॒व्या ने॒मिश्च॒क्रमि॒वा भव॑त् । 7

(श॒क्व॒री॒ष्व - ग॒ने - बृ॒ह॒स्पतिः॑ - प॒ञ्च॒वि॒ंश॒तिश्च॑) (A3)

3.3.4.1

ए॒तद्वा अ॒पां ना॒म॒धेयं॑ गु॒ह्यं य॑दा॒धा॒वा मा॒न्दा॒सु ते शु॒क्र शु॒क्र॒मा

धू॒नोमी॒त्याहा॒पामे॒व ना॒म॒धेये॑न गु॒ह्येन॑ दि॒वो वृ॒ष्टि॒मव॑ रु॒न्धे शु॒क्रं ते शु॒क्रेण॑

गृ॒ह्णामी॒त्याहै॒तद्वा अ॒हो रू॒पं य॑द्ग्रा॒त्रिः सू॒र्यस्य॑ र॒श्मयो॑ वृ॒ष्ट्या ई॒शते॑ऽह

ए॒व रू॒पेण॑ सू॒र्यस्य॑ र॒श्मिभि॑र्दि॒वो वृ॒ष्टिं च्या॑व॒यत्या॑ऽस्मि॒न्नु॒ग्रा - [] 8

3.3.4.2

अ॒चु॒च्यवु॒रित्या॑ह॒ यथा॑य॒जुरे॒वैतत् क॑कु॒ह॒ꣳ रू॒पं वृ॑ष॒भस्य॑ रोचते
 बृ॒हदि॒त्याहै॒तद्वा अ॑स्य क॒कुह॑ꣳ रू॒पं य॑द्-वृ॒ष्टी रू॒पेणै॒व वृ॑ष्टि॒मव॑ रुन्धे
 य॒त्ते सो॒मादा॑भ्यं॒ नाम॒ जागृ॑वीत्या॒हैष ह॒ वै ह॒विषा॑ ह॒विर्य॑जति॒ योऽदा॑भ्यं
 गृही॒त्वा सो॒माय॑ जु॒होति॒परा॒ वा ए॒तस्याऽऽ*युः॑ प्रा॒ण ए॒ति - [] 9

3.3.4.3

योऽꣳशुं॑ गृ॒ह्णा॒त्या नः॑ प्रा॒ण ए॒तु परा॒वत॑ इत्या॒हाऽऽ*यु॒रेव॑ प्रा॒णमा॒त्मन् ध॑त्ते
 ऽमृ॑तम॒सि प्रा॒णाय॑ त्वेति॒ हिर॑ण्यम॒भि व्य॑नित्यमृ॒तं वै हिर॑ण्यमा॒युः
 प्रा॒णोऽमृ॑ते॒नैवाऽऽ*यु॒रात्म॑न् ध॒त्ते श॒तमा॑नं॒ भव॑ति श॒तायुः॑ पु॒रुषः॑ श॒तेन्द्रि॑य
 आ॒युष्ये॒वेन्द्रि॑ये प्र॒तिति॑ष्ठत्य॒प उप॑ स्पृ॒शति॑ भेष॒जं वा॑ आ॒पो () भेष॑जमे॒व
 कुरु॑ते । 10 (उ॒ग्रा - ए॒त्या - प - स्त्री॑णि च) (A4)

3.3.5.1

वा॒युर॒सि प्रा॒णो ना॑म स॒वितु॑राधि॒पत्ये॑ऽपानं॒ मे दा॒श्चक्षु॑र॒सि श्रो॒त्रं
 ना॑म धा॒तुरा॑धि॒पत्य॑ आ॒युर्मे॑ दा रू॒पम॒सि वर्णो॑ नाम बृ॒हस्प॑ते॒राधि॑पत्ये
 प्र॒जां मे॑ दा ऋ॒तम॒सि स॒त्यं ना॑मेन्द्र॒स्याऽऽ*धि॑पत्ये॒ क्षत्रं॑ मे॒ दा भू॒तम॒सि

भव्यं नाम पितॄणामधिपत्येऽपा-मोषधीनां गर्भं धा ऋतस्य
त्वा व्योमन ऋतस्य - [] 11

3.3.5.2

त्वा विभूमन ऋतस्य त्वा विधर्मण ऋतस्य त्वा सत्यायर्तस्य त्वा
ज्योतिषे प्रजापति विराजमपश्यत् तया भूतं च भव्यं चा सृजत
तामृषिभ्यस्तिरोऽदधात् तां जमदग्निस्तपसाऽ पश्यत् तया वै स
पृश्नीन् कामानसृजत तत् पृश्नीनां पृश्नित्वं यत् पृश्नयो गृह्यन्ते
पृश्नीनेव तैः कामान् यजमानोऽव रुन्धे वायुरसि प्राणो - [] 12

3.3.5.3

नामेत्याह प्राणापानावेवाव रुन्धे चक्षुरसि श्रोत्रं नामेत्याहाऽऽयुरेवाव
रुन्धे रूपमसि वर्णो नामेत्याह प्रजामेवाव रुन्धऋतमसि सत्यं नामेत्याह
क्षत्रमेवाव रुन्धे भूतमसि भव्यं नामेत्याह पशवो वा अपामोषधीनां
गर्भः पशूनेवा - [] 13

3.3.5.4

–व रुन्ध ए॒ता॒व॒द्वै पु॒रु॒षं॑ प॒रि॒त॒स्त॒दे॒वा॒व रुन्ध॑ ऋ॒त॒स्य॑ त्वा व्यो॒म॒न॒
इ॒त्या॒हे॒यं वा॑ ऋ॒त॒स्य॑ व्यो॒मे॒मा॒मे॒वा॒भि ज॒य॒त्यृ॒त॒स्य॑ त्वा वि॒भू॒म॒न॒
इ॒त्या॒हा॒ऽन्त॒रि॒क्षं वा॑ ऋ॒त॒स्य॑ वि॒भू॒मा॒न्त॒रि॒क्ष॒मे॒वा॒भि ज॒य॒त्यृ॒त॒स्य॑ त्वा
वि॒ध॒र्म॒ण इ॒त्या॒ह द्यौ॒र्वा ऋ॒त॒स्य॑ वि॒ध॒र्म दि॒व॒मे॒वा॒भि ज॒य॒त्यृ॒त॒स्य॑ –[] 14

3.3.5.5

त्वा स॒त्या॒ये॒त्या॒ह दि॒शो वा॑ ऋ॒त॒स्य॑ स॒त्यं दि॒श ए॒वा॒भि ज॒य॒त्यृ॒त॒स्य॑
त्वा ज्यो॒ति॒ष इ॒त्या॒ह सु॒व॒र्गो वै लो॒क ऋ॒त॒स्य॑ ज्यो॒तिः सु॒व॒र्ग॒मे॒व
लो॒क॒म॒भि ज॒य॒त्ये॒ता॒व॒न्तो वै दे॒व॒लो॒का॒स्ता॒ने॒वा॒भि ज॒य॒ति द॒श संप॑द्यन्ते
द॒शाक्ष॑रा वि॒राड॒न्नं वि॒राड् वि॒राज्ये॑वा॒न्नाद्ये॑ प्र॒ति॒ति॒ष्ठ॒ति । 15
(व्यो॒म॒न॒ ऋ॒त॒स्य॑ – प्रा॒णः – प॒शु॒ने॒व – वि॒ध॒र्म दि॒व॒मे॒वा॒भि ज॒य॒त्यृ॒त॒स्य॑
– षट्च॑त्वारि॒ंश॒च्च) (A5)

3.3.6.1

दे॒वा वै यद्–य॒ज्ञे॒न ना॒वा॒रु॒न्ध॒त तत् प॒रै॒र॒वा॒रु॒न्ध॒त तत् प॒रा॒णां
प॒र॒त्वं य॑त् प॒रे गृ॒ह्य॒न्ते य॒दे॒व य॒ज्ञे॒न ना॒वा॒रु॒न्धे त॒स्या॒व॒रु॒द्ध्यै

यं प्रथमं गृह्णातीममेव तेन लोकमभि जयति यं द्वितीयमन्तरिक्षं तेन यं
तृतीयममुमेव तेन लोकमभि जयति यदेते गृह्यन्त एषां
लोकानामभিজित्या - [] 16

3.3.6.2

उत्तरेष्वहः स्वमुतोऽर्वाञ्चो गृह्यन्ते ऽभिजित्यैवेमां लोकान् पुनरिमं
लोकं प्रत्यवरोहन्ति यत् पूर्वेष्वहः स्वितः पराञ्चो गृह्यन्ते तस्मादितः
पराञ्च इमे लोका यदुत्तरेष्वहः स्वमुतोऽर्वाञ्चो गृह्यन्ते
तस्मादमुतोऽर्वाञ्च इमे लोकास्तस्मादयातयाम्नो लोकान् मनुष्या
उप जीवन्ति ब्रह्मवादिनो वदन्ति कस्मात् सत्यादद्भ्य ओषधयः
सं भवन्त्योषधयो - [] 17

3.3.6.3

मनुष्याणामन्नं प्रजापतिं प्रजा अनु प्रजायन्त इति परानन्विति
ब्रूयाद्-यद्-गृह्णात्यद्भ्यस्त्वौषधीभ्यो गृह्णामीति तस्मादद्भ्य
ओषधयः संभवन्ति यद्-गृह्णात्योषधीभ्यस्त्वा प्रजाभ्यो गृह्णामीति

तस्मादोषधयो मनुष्याणामन्नं यद्-गृह्णाति प्रजाभ्यस्त्वा
प्रजापतये गृह्णामीति तस्मात् प्रजापतिं प्रजा अनु प्रजायन्ते । 18

(अभिजित्यै - भवन्त्योषधयो - ऽष्टा चत्वारिंशच्च) (A6)

3.3.7.1

प्रजापतिर्देवासुरान् सृजत तदनु यज्ञोऽसृज्यत यज्ञं छन्दांसि
ते विष्वञ्चो व्यक्रामन्थ् सोऽसुराननु यज्ञोऽपाक्रामद्-यज्ञं छन्दांसि ते
देवा अमन्यन्तामी वा इदमभूवन् यद्-वयञ् स्म इति ते
प्रजापतिमुपाऽधावन्थ् सोऽब्रवीत्-प्रजापतिश्छन्दसां वीर्यमादाय
तद्वः प्र दास्यामीति स छन्दसां वीर्य - [] 19

3.3.7.2

मादाय तदेभ्यः प्रायच्छत् तदनु छन्दांस्यपाऽक्रामन् छन्दांसि
यज्ञस्ततो देवा अभवन् पराऽसुरा य एवं छन्दसां वीर्यं वेदाऽऽ
श्रावयाऽस्तु श्रौषड् यज ये यजामहे वषट्कारो भवत्यात्मना पराऽस्य
भ्रातृव्यो भवति ब्रह्मवादिनो वदन्ति कस्मै कमध्वर्युरा श्रावयतीति
छन्दसां वीर्यायेति ब्रूयादे तद् वै - [] 20

3.3.7.3

छन्द॑सां वी॒र्य॑मा श्राव॑याऽस्तु श्रौष॑ङ् यज॒ ये यजाम॑हे वषट्कारो
य एवं॑ वे॒द सवी॑र्यैरे॒व छन्दो॑भिरर्चति॒ यत् किं॑ चार्चति॒ यदिन्द्रो॑
वृ॒त्रम॑हन्न-मे॒ध्यं तद्-यद्-यती॑नपावपद-मे॒ध्यं तदथ॑ कस्मा॑दैन्द्रो
य॒ज्ञ आ स॑ऽस्थातो॒रित्याहु॑रिन्द्र॒स्य वा एषा॑ य॒ज्ञिया त॑नूर्यद्-य॒ज्ञस्तामे॑व
त () द्यज॑न्ति य एवं॑ वे॒दोपै॑नं य॒ज्ञो नम॑ति । 21

(छन्द॑सां वी॒र्यं - वा - ए॒व त - द॒ष्टौ च) (A7)

3.3.8.1

आ॒युर्दा अ॒ग्ने ह॒विषो॑ जुषा॒णो घृ॒तप्र॑तीको घृ॒तयो॑निरेधि ।
घृ॒तं पी॒त्वा मधु॑चारु ग॒व्यं पि॒तेव॑पु॒त्रम॑भि रक्ष॒तादि॑मं ।
आ वृ॑श्च्यते वा ए॒तद्-यज॑मानोऽग्नि॒भ्यां य॑दे॒नयोः शृ॑तं
कृ॒त्याथाऽन्या॑न्ना-वभृ॒थम॑वैत्यायु॒र्दा अ॒ग्ने ह॒विषो॑ जुषा॒ण
इ॒त्यव॑भृ॒थम॑वैष्यं जुहु॒यादाहु॑त्यै॒वैनौ श॑मयति॒ नाऽऽ*ति॑माच्छति॒
यज॑मानो यत् कु॒सीद॑ - [] 22

3.3.8.2

म॒प्र॒ती॒तं॑ म॒यि॒ ये॒न॒ य॒म॒स्य॑ ब॒लि॒ना॒ च॒रा॒मि॒ ।
 इ॒है॒व स॒न् नि॒र॒व॒द॒ये॒ तदे॒तत् तद॒ग्ने॑ अ॒नृ॒णो॑ भ॒वामि॑ ।
 वि॒श्व॒लो॒प वि॒श्व॒दा॒व॒स्य॑ त्वा ऽऽस॒ञ्जु॒हो॒म्य॒ग्धादे॑को ऽहु॒तादे॑कः
 स॒म॒स॒नादे॑कः । ते॒नः कृ॒ण्वन्तु॑ भे॒ष॒ज॒ः स॒दः स॒हो॒ वरे॑ण्यं ।
 अ॒यं नो॑ न॒भ॒सा पु॒रः स॒ऽस्फा॒नो॑ अ॒भि र॑क्षतु ।
 गृ॒हा॒णाम॑स॒म॒त्यै॑ ब॒हवो॑ नो॒ गृ॒हा अ॑सन् । स त्व॒न्नो – [] 23

3.3.8.3

न॒भ॒स॒स्प॒त ऊ॒र्जं॑ नो॒ धे॒हि॒ भ॒द्र॒या॑ ॥
 पु॒न॒र्नो॑ न॒ष्ट॒मा कृ॑धि पु॒न॒र्नो॑ र॒यि॒मा कृ॑धि ।
 दे॒व स॒ऽस्फा॒न स॒ह॒स्र॒पो॒ष॒स्ये॑शि॒षे स॒ नो॒ रा॒स्वाऽऽ॒ज्या॒नि॒ः रा॒य॒स्प॒ोष॑ः
 सु॒वी॒र्य॑ः सँ॒व॒त्स॒री॒णाऽ॒ स्व॒स्ति॑ ।
 अ॒ग्नि॒र्वा॒व य॒म इ॒यं य॒मी कु॑सी॒दं वा॑ ए॒तद्-य॒म॒स्य॑ य॒ज॒मा॒न आ॑ द॒त्ते॒
 यदो॑ष॒धी॒भिर्वे॑दि॒ः स्तृ॒णा॒ति य॒दनु॑पौष्य प्र॒या॒याद्ग्री॑व॒ब॒द्ध॒मे॒न – [] 24

3.3.8.4

ममुष्मिं॑ लो॒के ने॒नीये॒रन् यत् कु॒सीद॑म॒प्रती॑त्तं मयी॒त्युपौ॑षती॒हैव॑
सन् य॒मं कु॒सीदं॑ नि॒रव॑दा॒यानृ॑णः सु॒वर्गं॑ लो॒कमे॑ति॒यदि॑ मि॒श्रमि॑व
चरे॑दञ्जलि॒ना स॒तून् प्र॑दा॒व्ये जु॒हुया॑देष॒ वा अ॒ग्निर्वै॑श्वा॒नरो॑ यत् प्र॑दा॒व्यः
स ए॒वैन॑स्व॒दय॑त्य॒ह्नां वि॒धान्या॑-मे॒काष्ट॑का॒याम॒पूपं॑ चतुः शरा॒वं प॒क्त्वा
प्रा॒तरे॑ते॒न क॒क्षमु॑पौषे॒द्यदि॑ - [] 25

3.3.8.5

द॒हति॑ पु॒ण्य॒समं॑ भ॒वति॑ यदि न द॒हति॑ पा॒प॒सम॑मे॒तेन॑ ह॒स्म वा ऋ॑षयः पु॒रा
वि॒ज्ञाने॑न दी॒र्घस॒त्रमु॑प॒ यन्ति॑ यो वा उप॒द्रष्टा॑रमु॒प-श्रो॑तार॒मनु॒ख्याता॑रं
वि॒द्वान् य॑जते॒ सम॒मुष्मिं॑ लो॒क इ॒ष्टापु॑र्ते॒न ग॒च्छते॑ऽग्नि॒र्वा उप॑द्र॒ष्टा
वा॒युरु॑प॒श्रोता॑ ऽऽदि॒त्योऽनु॒ख्याता॑ तान् य ए॒वं वि॒द्वान् य॑जते
स॒ममु॑ष्मिं॑ लो॒क इ॒ष्टापू॑र्ते॒न ग॒च्छते॑ ऽयं नो॒ नभ॑सा पु॒र - [] 26

3.3.8.6

इ॒त्याहा॒ग्निर्वै॑ नभ॒सा पु॒रोऽग्नि॑मे॒व तदा॑है॒तन्मे॑ गो॒पाये॑ति स त्वं नो
नभ॑सस्प॒त इ॒त्याह॑ वा॒युर्वै॑ नभ॑सस्प॒तिर्वा॒युमे॒व तदा॑है॒तन्मे॑ गो॒पाये॑ति दे॒व

स॒ऽस्फा॒ने॒त्याहा॒ऽसौ वा आ॒दि॒त्यो दे॒वः स॒ऽस्फा॒न आ॒दि॒त्यमे॒व
तदा॑ है॒तन्मे॑ गो॒पाये॑ति । 27

(कु॒सी॒दं – त्वं न॑ – ए॒न – मो॒षेद्यदि॑ – पु॒र – आ॒दि॒त्यमे॒व तदा॑ है॒तन्मे॑
गो॒पाये॑ति) (A8)

3.3.9.1

ए॒तं यु॒वानं॑ परि॒ वो द॑दामि ते॒न क्री॑डन्तीश्चरत प्रि॒येण॑ ।
मा नः॑ शा॒प्त ज॒नुषा॑ सु॒भागा॑ रा॒यस्पो॑षेण॒ समि॑षा म॒देम॑ ।
नमो॑ म॒हिम्न॑ उ॒त चक्षु॑षे ते म॒रुतां॑ पि॒तस्त॑दहं गृ॒णामि॑ ।
अनु॑ म॒न्यस्व॑ सु॒यजा॑ य॒जाम॑ जुष्टं दे॒वाना॑मि॒दम॑स्तु ह॒व्यं ।
दे॒वाना॑मेष॒ उप॑नाह आ॒सीद॑पां गर्भ॒ ओष॑धीषु न्य॒क्तः ।
सोम॑स्य द्र॒प्सम॑वृणीत पू॒षा – [] 28

3.3.9.2

बृ॒हन्न॑द्रि॒रभव॑त् तदे॒षां ।
पि॒ता व॒थ्स॑नां पति॒रघ्नि॑याना॒मथो॑ पि॒ता म॒हतां॑ गर्ग॒राणां॑ ।

व॒त्सो ज॒रायु॑ प्र॒ति॒धुक् पी॒यूष॑ आ॒मि॒क्षा म॒स्तु घृ॒तम॑स्य रे॒तः ।
 त्वां गा॒वोऽवृ॑णत रा॒ज्याय॑ त्वा॒ं ह॒वन्त॑ मरु॒तः स्व॒र्काः ।
 वर्ष्म॑न् क्ष॒त्रस्य॑ क॒कुभि॑ शि॒श्रिया॑णस्ततो॒ न उ॒ग्रो वि॑ भ॒जा व॑सू॒नि ।
 व्यृ॑द्धेन वा ए॒ष प॒शुना॑ यज॒ते य॒स्यै॒तानि॑ न क्रि॒यन्त॑ ए॒ष ()
 ह त्वै॑ समृद्धेन यज॒ते य॒स्यै॒तानि॑ क्रि॒यन्ते॑ । 29

(पू॒षा - क्रि॒यन्त॑ ए॒षो - ऽष्टौ॑ च) (A9)

3.3.10.1

सू॒र्यो दे॒वो दि॒विष॑द्भ्यो॒ धा॒ता क्ष॒त्राय॑ वा॒युः प्र॒जाभ्यः॑ ।
 बृ॒हस्प॑तिस्त्वा प्र॒जाप॑तये॒ ज्योति॑ष्मतीं जुहोतु ।
 यस्या॑स्ते ह॒रितो॑ गर्भोऽथो॒ योनि॑र्हि॒रण्ययी॑ ।
 अ॒ङ्गान्य॑हु॒ता य॒स्यै तां॑ दे॒वैः स॒मजी॑गमं ।
 आ वर्त॑न वर्तय नि नि॒वर्त॑न वर्तयेन्द्र॒ नर्द॑बुद ।
 भू॒म्याश्च॑तस्रः प्र॒दिश॑स्ताभि॒रा वर्त॑या पुनः ।
 वि ते॑ भि॒नद्भि॑ त॒करीं॑ वि॒योनिं॑ वि॒ गवी॑न्यौ । वि - [] 30

3.3.10.2

मा॒तर॒ञ्च पु॒त्रं च॒ वि गर्भं॑ च॒ जरा॑यु च । ब॒हिस्ते॑ अस्तु॒ बालि॑ति ।
 उ॒रु॒द्र॒फ॒सो वि॒श्वरू॒प इ॒न्दुः प॒व॒मा॒नो धी॑र आ॒न॒ञ्ज गर्भं॑ ।
 ए॒क॒प॒दी द्वि॒प॒दी त्रि॒प॒दी च॒तु॒ष्प॒दी प॒ञ्च॒प॒दी षट्प॑दी
 स॒प्त॒प॒द्य॒ष्टा॒प॒दी भु॒व॒नाऽनु॑ प्रथ॒ता॒ स्वा॒हा ।
 म॒ही द्यौः पृ॒थि॒वी च॒ न इ॒मं य॑ज्ञं मि॒मिक्ष॑तां ।
 पि॒पृ॒ता॒न्नो भ॑रीम॒भिः । 31

(ग॒वि॒न्यौ वि - च॒तु॒श्च॒त्वारि॑ञ्श॒च्च) (A10)

3.3.11.1

इ॒दं वा॑मा॒स्ये ह॒विः प्रि॒यमि॑न्द्रा॒बृह॑स्पती । उ॒क्थं म॑दश्च॒ शस्य॑ते ।
 अ॒यं वा॑ परि॒ षि॒च्यते॑ सोम॒इन्द्रा॑बृहस्पती । चा॒रु॒र्म॒दाय॑ पी॒तये॑ ।
 अ॒स्मै इ॒न्द्रा॑बृहस्पती॒ रयि॑ ध॒त्तञ् श॑त॒ग्वि॒नं । अ॒श्वा॒व॒न्तञ् स॒हस्रि॑णं ।
 बृ॒ह॒स्प॒ति॒र्नः प॑रि॒पातु॑ प॒श्चादु॑तो॒त्तर॑स्मा॒दध॑रा॒दघा॑योः ।
 इ॒न्द्रः पु॒रस्ता॑दु॒त म॑ध्यतो॒ नः स॒खा स॒खि॑भ्यो॒ वरि॑वः कृ॒णोतु॑ ।
 वि ते॒ विष्व॑ग्वा॒तजू॑तासो॒ अग्ने॑ भा॒मासः॑ - [] 32

3.3.11.2

शु॒चे शु॒चयश्चर॑न्ति ।
तु॒वि॒म्र॒क्षासो॑ दि॒व्या न॑व॒ग्वा वना॑ वनन्ति धृ॒षता॑ रुजन्तः ।
त्वा॒मग्ने॑ मा॒नुषी॑रीडते॒ विशो॑ हो॒त्रावि॒दं वि॒विचि॑ रत्न॒धात॑मं ।
गुहा॑ सन्तः सु॒भग॑ वि॒श्वदर्श॑तं तु वि॒ष्मण॑सः सु॒यजं॑ घृ॒तश्रि॑यं ॥
धा॒ता द॑दातु नो र॒यिमी॑शानो जग॑तस्पतिः । स नः पू॒र्णेन॑ वा॒वनत् ।
धा॒ता प्र॒जाया॑ उ॒त रा॒य ई॒शे धा॒तेदं वि॒श्वं भु॒वनं॑ ज॒जान॑ ।
धा॒ता पु॒त्रं य॑ज॒मानाय॑ दा॒ता - [] 33

3.3.11.3

तस्मा॑ उ ह॒व्यं घृ॒तव॑द्विधे॒म ।
धा॒ता द॑दातु नो र॒यिं प्रा॒चीं जी॒वातु॑म॒क्षितां॑ ।
व॒यं दे॒वस्य॑ धी॒महि॑ सु॒मति॑ स॒त्यरा॑धसः ।
धा॒ता द॑दातु दा॒शुषे॑ व॒सूनि॑ प्र॒जाका॑माय मी॒ढुषे॑ दुरो॒णे ।
तस्मै॑ दे॒वा अ॒मृताः॑ सँव्य॒यन्तां वि॒श्वे दे॒वासो॑ अ॒दितिः॑ स॒जोषाः॑ ॥

अनु नोऽद्याऽनुमतिर्यज्ञं देवेषु मन्यतां ।
 अग्निश्च हव्यवाहनो भवतां दाशुषे मयः ।
 अन्विदनुमते त्वं - [] 34

3.3.11.4

मन्यासै शञ्चनः कृधि । क्रत्वे दक्षाय नो हिनु प्रण आयूँषि तारिषः ।
 अनु मन्यता-मनुमन्यमाना प्रजावन्तँ रयिमक्षीयमाणं ।
 तस्यै वयँ हेडसि माऽपि भूम सा नो देवी सुहवा शर्म यच्छतु ।
 यस्यामिदं प्रदिशि यद्विरोचतेऽनुमतिं प्रति भूषन्त्यायवः ।
 यस्या उपस्थ उर्वन्तरिक्षँ सा नो देवी सुहवा शर्म यच्छतु । 35

3.3.11.5

राकामहँ सुहवाँ सुष्टुती हुवे शृणोतु नः सुभगा बोधतु त्मना ॥
 सीव्यत्वपः सूच्याऽच्छिद्यमानया ददातु वीरँ शतदायमुक्थ्यं ॥
 यास्ते राके सुमतयः सुपेशसो याभिर्ददासि दाशुषे वसूनि ।
 ताभिर्नो अद्य सुमना उपागहि सहस्रपोषँ सुभगे रराणा ।

सिनी॑वा॒लि > ¹, या सु॑पा॒णिः > ² ।

कु॒हू॒म॒ह॒ꣳ सु॒भगां॑ वि॒द्व॒नाप॑स॒मस्मिन्॑ य॒ज्ञे सु॒हवां॑ जो॒हवी॑मि ।

सा नो॑ द॒दातु॑ श्रव॑णं () पि॒तृणां॑ तस्या॒स्ते दे॒वि ह॒विषा॑ वि॒धेम॑ । ।

कु॒हू-दे॒वाना॑म॒मृत॑स्य प॒त्नी ह॒व्या नो॑ अ॒स्य ह॒विष॑श्चि॒केतु॑ ।

सं दा॒शुषे॑ कि॒रतु॑ भू॒रि वा॒मꣳ रा॒यस्पोषं॑ चि॒कितु॑षे द॒धातु॑ । 36

(भा॒मा॒सो - दा॒ता - त्व - म॒न्तरि॑क्षꣳ सा नो॑ दे॒वी सु॒हवा॑ शर्म॑ यच्छतु॒
- श्रव॑णं - चतु॑र्वि॒ंशति॑श्च) (A11)

Prasna Korvai with starting Padams of 1 to 11 Anuvaakams :-

(अ॒ग्ने ते॒जस्वि॑न् - वा॒यु - र्व॒सव॑स्त् - वै॒त॒द्वा अ॒पां - वा॒युर॑सि प्रा॒णो
ना॒म - दे॒वा वै य॒द्य॒ज्ञेन॑न - प्र॒जाप॑ति दे॒वा॒सुरा॑ - ना॒यु॒र्दा - ए॒तं यु॒वानꣳ
- सू॒र्यो दे॒व - इ॒दं वा॑ - मे॒काद॑श)

Korvai with starting Padams of 1, 11, 21 Series of Panchaatis :-

(अग्ने॑ तेजस्विन् – वा॒युर॑सि॒ – छ॒न्द॑सां वी॒र्यं॑ – मा॒तर॑ञ्च –
षट्त्रिं॑शत्)

First and Last Padam of Third Prasnam of Kanda 3 :-

(अग्ने॑ तेजस्वि॒ – श्रि॒कितु॑षे दधातु)

॥ हरिः॑ ओं ॥

॥ कृष्ण यजुर्वेदीय तैत्तिरीय संहितायां तृतीयकाण्डे तृतीयः प्रश्नः समाप्तः ॥

3.3.1 Appendix

3.3.11.5 – सिनी॑वालि > ¹, या सु॑पाणिः > ²

सिनी॑वालि पृथु॑ष्टुके॒ या दे॒वाना॑मसि॒ स्वसा॑ ॥

जुष॑स्व ह॒व्य माहु॑तं प्र॒जां दे॒वि दिदि॑ड्ढि नः ॥

या सु॑पाणिः स्व॒ङ्गुरिः सु॒षूमा॑ बहु॒सूवरी॑ ।

तस्यै॑ वि॒ष्पन्नियै॑ ह॒विः सिनी॑वा॒ल्यै जुहो॑तन ॥

(Appearing in TS- 3.1.11.4)

ओं नमः परमात्मने, श्री महागणपतये नमः, श्री गुरुभ्यो नमः

हरिः ओं

3.4 तृतीयकाण्डे चतुर्थः प्रश्नः – इष्टिहोमाभिधानं

3.4.1.1

वि वा ए॒तस्य॑ य॒ज्ञ ऋ॑ध्यते यस्य॑ ह॒विर॑तिरिच्यते॑ सूर्यो॑ दे॒वो दि॒विष॑द्भ्य
इत्या॑ह बृ॒हस्प॑तिना चै॒वास्य॑ प्र॒जाप॑तिना च य॒ज्ञस्य॑ व्यृ॒द्धम॑पि वपति
रक्षा॑ँसि वा ए॒तत् प॒शुँ स॑चन्ते यदे॒कदे॒वत्य॑ आल॒ब्धो भू॒यान् भ॑वति
यस्या॑स्ते ह॒रितो॑ गर्भ॒ इत्या॑ह दे॒वत्रै॑वैनां॑ गमयति॑ रक्ष॒साम॑पहत्या॒ आ वर्त॑न
वर्त॑येत्याह – [] 1

3.4.1.2

ब्र॒ह्मणै॑वैन॒मा वर्त॑यति वि ते॑ भिन॒द्भि त॑करीमित्याह यथाय॒जुरे॒वैतदु॑ –
रु॒द्रप्सो॑ वि॒श्वरू॑प इ॒न्दुरि॑त्याह प्र॒जा वै प॒शव॑ इ॒न्दुः प्र॒जयै॑वैनं॑ प॒शुभिः॑
सम॑र्धयति दि॒वं वै य॒ज्ञस्य॑ व्यृ॒द्धं ग॑च्छति पृथि॒वीम॑तिरिक्तं॑ तद्यन्न
श॒मये॒दार्ति॑मा॒र्च्छेद्-य॑जमानो म॒ही द्यौः॑ पृथि॒वीच॑ न इत्या – [] 2

3.4.1.3

ह॒ द्यावा॑पृ॒थिवी॑भ्या॒मेव॑ य॒ज्ञस्य॑ व्यृ॒द्धं चाति॑रिक्तं च शमयति
 नाऽऽ*ति॒माच्छ॑ति यज॒मानो॑ भस्म॒नाऽभि॑ समू॒हति॑ स्वगाकृ॒त्या अथो॑
 अनयो॒र्वा एष॑ गर्भो॒ऽनयो॑रे॒वैनं॑ दधाति यदव॒द्येदति॑ तद्दे॒चये॑द्यन्नावद्येत्
 प॒शो॒राल॑ब्धस्य नाव द्येत् पुरस्ता॒न्नाभ्या॑ अन्यदव॒द्येदु॒परि॑ष्टादन्यत् पुरस्ता॒द्वै
 नाभ्यै॑ – [] 3

3.4.1.4

प्रा॒ण उप॑रि॒ष्टाद॑पा॒नो यावा॑नेव प॒शुस्त॑स्याव द्यति वि॒ष्णवे॑ शि॒पिवि॑ष्टाय
 जुहोति॑ यद्वै य॒ज्ञस्याति॑रिच्यते यः प॒शोर्भू॑मा या पु॒ष्टिस्तद्-वि॑ष्णुः
 शि॒पिवि॑ष्टो ऽतिरिक्त ए॒वाति॑रिक्तं दधात्यतिरिक्तस्य शान्त्या अ॒ष्टाप्रू॒ङ्ढिर॑ण्यं
 दक्षि॑णाऽष्टा॒पदी॑ ह्येषा ऽऽत्मा नवमः प॒शो॒राप्त्या॑ अन्तरकोश
 उ॒ष्णीषे॑णाऽऽ*वि॒ष्टितं॑ भवत्ये॒वमि॑व हि प॒शुरु॑ल्बमि॒व () च॑र्म॒व
 मा॒समि॑वा॒स्थीव॑ यावा॑नेव प॒शुस्त॑माप्त्वाऽव रुन्धे॒यस्यै॑षा य॒ज्ञे
 प्रायश्चि॑त्तिः क्रि॒यत॑ इ॒ष्ट्वा व॑सी॒यान् भव॑ति । 4

(वर्तयत्याह - न इति - वै नाभ्या - उल्बमिवै - कविः शतिश्च)
(A1)

3.4.2.1

आ वायो भूष शुचिपा उप नः सहस्रं ते नियुतो विश्ववार ।
उपो ते अन्धो मद्यमयामि यस्य देव दधिषे पूर्वपेयं ।
आकूत्यै त्वा कामाय त्वा समृधे त्वा किक्किटा ते मनः प्रजापतये
स्वाहा किक्किटा ते प्राणं वायवे स्वाहा किक्किटा ते चक्षुः सूर्याय
स्वाहा किक्किटा ते श्रोत्रं द्यावापृथिवीभ्यां स्वाहा किक्किटा ते
वाचं सरस्वत्यै स्वाहा- [] 5

3.4.2.2

त्वं तुरीया वशिनी वशाऽसि सकृद्यत् त्वा मनसा गर्भ आऽशयत् ।
वशा त्वं वशिनी गच्छ देवान्-सत्याः सन्तु यजमानस्य कामाः ।
अजाऽसि रयिष्ठा पृथिव्यां सीदोर्ध्वाऽन्तरिक्षमुप तिष्ठस्व दिवि ते
बृहद्भाः । तन्तुं तन्वन् रजसो भानुमन्विहि ज्योतिष्मतः पथो रक्ष धिया
कृतान् । अनुल्बणं वयत जोगुवामपो मनु () भव जनया दैव्यं

ज॒नं । म॒नसो॑ ह॒विर॒सि प्र॒जाप॑ते॒र्वर्णो॑ गा॒त्राणां॑ ते गा॒त्रभा॑जो भू॒यास्म । 6

(सर॑स्वत्यै स्वाहा – म॒नु – स्त्रयो॑दश च) (A2)

3.4.3.1

इ॒मे वै स॒हाऽऽ*स्तां॑ ते वा॒युर्व्य॑वात् ते गर्भ॑म॒दधा॑तां त॒ꣳ सोमः॑
 प्रा॒ज॒नय॑-द॒ग्निर॒ग्रस॑त स ए॒तं प्र॒जाप॑तिर॒ग्नेय॑-म॒ष्टाक॑पालम॒पश्य॑त् तं
 नि॒रव॑पत् तेनै॒वैना॑म॒ग्नेर॒धि नि॒रक्री॑णात् तस्मा॒दप्य॑न्यदे॒वत्या॑मा॒लभ॑मान
 आ॒ग्नेय॑म॒ष्टाक॑पालं पु॒रस्ता॑न्निर्व॒पेद॒ग्नेरे॒वैना॑म॒धि
 निष्क्री॑याऽऽल॒भते॑ यद् - [] 7

3.4.3.2

वा॒युर्व्य॑वात् तस्मा॒द्-वा॒यव्या॑ यदि॒मे गर्भ॑म॒दधा॑तां तस्मा॒द्-द्या॒वापृ॑थि॒व्या
 यथ् सोमः॑ प्रा॒ज॒नय॑द॒ग्निर॒ग्रस॑त तस्मा॒दग्नी॑षोमी॒या
 यद॒नयो॑र्वि॒यत्यो॑र्वा॒गव॑दत् तस्मा॒थ् सा॒रस्व॑ती यत् प्र॒जाप॑तिर॒ग्नेर॒धि
 नि॒रक्री॑णात् तस्मा॒त् प्रा॒जाप॑त्या सा वा ए॒षा सर्व॑दे॒वत्या॑ यद॒जा व॑शा
 वा॒यव्या॑मा ल॒भेत॑ भू॒तिकामो॑ वा॒युर्वै क्षे॑पि॒ष्ठा दे॒वता॑ वा॒युमे॒व स्व॑ेन- [] 8

3.4.3.3

भाग॑धेये॒नोप॑ धावति॑ स ए॒वैनं॑ भूतिं॑ गमयति॑ द्यावापृ॑थिव्या॒मा ल॑भेत
 कृ॒षमा॑णः प्रति॑ष्ठाका॒मो दि॒व ए॒वास्मै॑ पर्ज॒न्यो वर्॒षति॑ व्य॒स्यामो॑ष॒धयो
 रो॒हन्ति॑ सम॒र्धुक॑मस्य॒ सस्यं॑ भवत्य॒ग्नीषो॑मीया॒मा ल॑भेत यः
 का॒मये॑तान्न॒वानन्ना॑दः स्या॒मित्य॒ग्निनै॒वान्न॑मव रुन्धे
 सो॒मेना॑न्नाद्य-म॒न्नवा॑ने॒वान्नादो॑ भवति॑ सा॒रस्व॑तीमा ल॑भेत य - [] 9

3.4.3.4

ई॒श्वरो॑ वा॒चो व॑दि॒तोः सन् वाचं॑ नवदे॒द्-वा॒ग्वै सर॑स्वती॒ सर॑स्वतीमे॒व
 स्वे॒न भा॑गधेये॒नोप॑ धावति॑ सै॒वास्मिन् वाचं॑ दधाति॑ प्रा॒जाप॑त्या॒मा ल॑भेत
 यः का॒मये॑तान॒भिजि॑तम॒भि ज॑ये॒यमि॑ति प्र॒जाप॑तिः सर्वा॑ दे॒वता॑
 दे॒वता॑भिरे॒वा-न॑भिजि॒तम॒भि ज॑यति॑ वा॒यव्यो॑पाकरोति॑
 वा॒योरे॒वैना॑मव॒रुध्या॑ऽऽ*ल॒भत॑ आ॒कूत्यै॑ त्वा॒ कामा॑य त्वे - [] 10

3.4.3.5

त्या॒ह य॒थाय॑जु॒रेवै॑तत् कि॒क्कि॑टाका॒रं जु॑होति॑ कि॒क्कि॑टाका॒रेण॑ वै ग्रा॒म्याः
 प॒शवो॑ रमन्ते॒ प्राऽऽ*र॑ण्याः प॒तन्ति॑ यत् कि॒क्कि॑टाका॒रं जु॑होति॑ ग्रा॒म्याणां॑

प॒शूनां॑ धृ॒त्यै॑ पर्य॒ग्नौ॑ क्रि॒यमा॑णे जुहोति जीव॒न्तीमे॒वैनां॑ सु॒वर्गं॑
 लो॒कं ग॑मयति त्वं तु॒रीया॑ व॒शिनी॑ व॒शाऽसी॑त्याह दे॒वत्रै॒वैनां॑ गमयति
 स॒त्याः स॒न्तु य॑ज॒मान॑स्य का॒मा इ॒त्याहै॒ष वै का॒मो - [] 11

3.4.3.6

यज॒मान॑स्य यद॒नार्त॑ उ॒दृचं॑ गच्छति तस्मा॒देव॑माहा॒ज्जाऽसि॑ रयि॒ष्ठेत्या॑है
 ष्वे॒वैनां॑ लो॒केषु॑ प्रति॒ष्ठाप॑यति दि॒वि ते बृ॒हद्वा॑ इत्याह सु॒वर्ग ए॒वास्मै॑ लो॒के
 ज्योति॑र् दधाति तन्तुं तन्वन् रज॒सो भा॒नुम॑न्विहीत्याहे॒माने॑वास्मै लो॒कान्
 ज्योति॑ष्मतः करोत्यनु॒ल्बणं॑ वय॒त जो॒गुवा॑मप॒ इत्या - [] 12

3.4.3.7

—ह यदे॒व य॒ज्ञ उ॒ल्बणं॑ क्रि॒यते॑ तस्यै॒वैषा॑ शा॒न्तिर्म॑नु॒र्भव॑
 ज॒नया॑ दै॒व्यं ज॒नमि॑त्याह मा॒नव्यो॑ वै प्र॒जास्ता॑ ए॒वाऽऽ*द्याः॑ कुरुते
 म॒नसो॑ ह॒विर॑सीत्याह स्व॒गाकृ॑त्यै गा॒त्राणां॑ ते गा॒त्रभा॑जो
 भूया॑स्मेत्याहाऽऽ*शि॒षमे॑वैता॒मा शा॑स्ते तस्यै॒वा ए॒तस्या॑
 ए॒कमे॒वा—दे॒वय॑जनं य॒दाल॑ब्धायाम॒भ्रो - [] 13

3.4.3.8

भवति॑ य॒दाल॑ब्धायाम॒भ्रः स्याद॑प्सु॒ वा॑प्रवेशये॒त् सर्वा॑ वा
 प्रा॒ञ्जीया॑द्यदप्सु॒ प्रवेशये॑द्यज्ञवेशसं॒ कुर्या॑त् सर्वा॒मेव
 प्रा॒ञ्जीया॑दिन्द्रि॒यमे॒वाऽऽत्मन्॑ धत् ते सा वा ए॒ष त्रया॑णामे॒वाव रुद्धा॑
 सँव॑त्सरसदः॒ सह॑स्रया॒जिनो॑ गृहमे॒धिनस्त॑ ए॒वैतया॑
 यजे॑रन् तेषामे॒वैषाऽऽप्ता॑ । 14

(यथ् - स्वेन - सारस्वतीमा लभेत यः - कामाय त्वा - कामो दृ
 ऽप इत्य - भ्रौ - द्विचत्वारिंशच्च) (A3)

3.4.4.1

चित्तं॑ च चित्ति॒श्चाऽऽकू॑तं चाऽऽकू॒तिश्च॑ वि॒ज्ञातं॑ च वि॒ज्ञानं॑ च
 मनश्च॑ शक्वरी॒श्च दर्श॑श्च पूर्ण॒मासश्च॑ बृहच्च॒ रथन्तरं॑ च
 प्रजा॑पतिर्जयानिन्द्राय॒ वृष्णो॑ प्रायच्छदु॒ग्रः पृ॒तना॑ज्येषु॒ तस्मै॑ विशः
 सम॑नमन्त सर्वाः स उ॒ग्रः सहि॑ हव्यो बभूवदे॒वासुराः सँय॑त्ता आसन्त्स
 इन्द्रः॑ प्रजा॑पतिमुपा () धावत् तस्मा ए॒ताञ्जया॑न् प्रायच्छत् तान॒जुहो॑त्

ततो॑ वै दे॒वा असु॑रानजयन् यदजयन् तज्जयानां॑ जयत्व७ स्पर्ध॑मानेनैते
होत॑व्या जयत्ये॒व तां पृ॑तनां । 15 (उप – पञ्चविंशतिश्च) (A4)

3.4.5.1

अग्नि॑भू॒ताना॑मधिपतिः॑ समा॑ऽवत्विन्द्रो॑ ज्येष्ठानां॑ यमः॑ पृथि॒व्या
वायु॑रन्तरिक्षस्य॑ सूर्यो॑ दिवश्चन्द्र॒मा नक्ष॑त्राणां बृह॒स्पति॑र्ब्रह्म॒णो
मित्रः॑ सत्यानां॑ वरु॒णोऽपा॑ स॒मुद्रः॑ स्रोत्यानामन्न॑ साम्रा॒ज्याना॑मधिपति
तन्मा॑ऽवतु सोम॑ ओष॒धीना॑ सवि॒ता प्र॑सवाना॑ रु॒द्रः प॑शूनां त्वष्टा
रूपा॑णां विष्णुः॑ पर्व॒तानां॑ मरु॒तो ग॑णानामधिपतयस्ते मावन्तु॑ पितरः
पिता॑महाः प॒रेऽव॑रे () तता॑स्ततामहा॑ इह मा॑ऽवत । अ॒स्मिन् ब्र॑ह्मन्नस्मिन्
क्षत्रे॑ऽस्या-मा॒शिष्य॑स्यां पु॒रोधा॑यामस्मिन्-कर्म॑न्नस्यां दे॒वहू॑त्यां । 16

(अव॑रे – सप्तद॑श च) (A5)

3.4.6.1

दे॒वा वै यद्य॑ज्ञेऽकुर्व॑त तदसु॑रा अकुर्व॑त ते दे॒वा ए॒तान॑भ्यातानानपश्यन्-
तान॑भ्यातन्वत यद्दे॒वानां॑ कर्मा॑ऽसी॒दार्ध्य॑त तद्यदसु॑राणां न तदार्ध्य॑त येन

कर्म॒णो॒र्त्सेत् तत्र॑ हो॒तव्या॑ ऋ॒ध्नो॒त्येव॑ तेन॒ कर्म॑णा॒ यद्विश्वे॑ दे॒वाः
स॒मभ॑रन् तस्मा॒-द॒भ्याता॑ना वै॒श्वदे॒वाय॑त्-प्र॒जाप॑तिर्ज॒यान् प्रा॑यच्छत्
तस्मा॒ज्जयाः॑ प्रा॒जाप॑त्या - [] 17

3.4.6.2

यद्-राष्ट्र॑भृ॒द्धी राष्ट्र॑माऽद॒दत् तद्-राष्ट्र॑भृ॒ता राष्ट्र॑भृ॒त्त्वं ते दे॒वा
अ॒भ्याता॑नैरसुरान॒भ्यात॑न्वत् जयै॑रज॒यन्-राष्ट्र॑भृ॒द्धी राष्ट्र॑माऽद॒दत्
यद्दे॒वा अ॒भ्याता॑नैरसुरान॒भ्यात॑न्वत् तद॒भ्याता॑नाना॒मभ्या॑तान॒त्वं
यज्जयै॑रज॒यन् तज्जया॑नां ज॒यत्वं यद्-राष्ट्र॑भृ॒द्धी राष्ट्र॑माऽद॒दत्
तद्-राष्ट्र॑भृ॒ता राष्ट्र॑भृ॒त्त्वं ततो॑ दे॒वा अ॒भवन्॑ प॒राऽसु॒रा यो भ्रातृ॑व्यवा॒न्थ्
स्याथ् स () ए॒तान् जुहु॑याद॒भ्याता॑नैरे॒व भ्रातृ॑व्या॒नभ्या॑तनु॒ते जयै॑र्ज॒यति
राष्ट्र॑भृ॒द्धी राष्ट्र॑मा द॒त्ते भव॑त्यात्म॒ना प॒राऽस्य॑ भ्रातृ॑व्यो भव॒ति । 18

(प्रा॒जाप॑त्याः - सोऽ - षा द॒श च) (A6)

3.4.7.1

ऋ॒ता॒षा॒ड् ऋ॒त॒धा॒मा॒ऽग्नि॑-गन्ध॒र्वस्त॑-स्यौष॒धयो॑ऽप्सर॒स ऊ॒र्जो॑ नाम
 स इ॒दं ब्र॑ह्म क्ष॒त्रं पा॒तु ता इ॒दं ब्र॑ह्म क्ष॒त्रं पा॑न्तु तस्मै॒ स्वाहा॑ ताभ्यः
 स्वाहा स॒हो॒हि॒तो वि॒श्वसा॑मा॒ सूर्यो॑ गन्ध॒र्व-स्तस्य॑ मरी॒चयो॑ऽप्सर॒स
 आ॒युवः॑ सु॒षुम्नः॑ सूर्य॒ रश्मि॑-श्चन्द्र॒मा गन्ध॒र्व-स्तस्य॑ नक्ष॒त्राण्य॑-प्सर॒सो
 बे॒कुर॑योभु॒ज्युः सु॒पर्णो॑ य॒ज्ञो गन्ध॒र्व-स्तस्य॑ दक्षि॒णा अ॒प्सर॒स स्त॒वाः
 प्र॒जाप॑ति-वि॒श्वकर्मा॑ मनो - [] 19

3.4.7.2

गन्ध॒र्वस्तस्य॑र्ख् सामान्य॑-प्सर॒सो वह्न्य॑इषि॒रो वि॒श्वव्य॑चा वा॒तो
 गन्ध॒र्व-स्तस्या॑ऽऽ*पो॑ ऽप्सर॒सो मु॒दाभु॑वनस्य प॒ते यस्य॑त उ॒परि॑ गृ॒हा इ॒ह
 च । स नो॑ रा॒स्वाज्या॑नि॒र् रा॒यस्पोष॑ सु॒वीर्य॑ सं॒वँत्स॑रीणा॒ स्व॒स्तिं ।
 पर॑मे॒ष्ठ्यधि॑पति-मृ॒त्युर् गन्ध॒र्व-स्तस्य॑ वि॒श्वम॑प्सर॒सो भुवः॑ सु॒क्षि॒थिः-
 सु॒भूति॑-भ॒द्रकृ॑त् सु॒वर्वा॑न् प॒र्जन्यो॑ गन्ध॒र्व-स्तस्य॑ वि॒द्युतो॑ ऽप्सर॒सो
 रु॒चो दू॒रे हे॒तिर॑-मृ॒डयो॑ - [] 20

3.4.7.3

मृत्युर्गन्धर्व-स्तस्य प्रजा अप्सरसो भीरुवःचारुः कृपण काशी कामो
 गन्धर्व-स्तस्याधयो ऽप्सरसः शोचयन्तीर्नाम स इदं ब्रह्म क्षत्रं पातु ता
 इदं ब्रह्म क्षत्रं पान्तु तस्मै स्वाहा ताभ्यः स्वाहा स नो भुवनस्य पते
 यस्यत उपरि गृहा इह च । उरु ब्रह्मणेऽस्मै क्षत्राय महि शर्म
 यच्छ । 21(मनो - ऽमृडयः - षट्चत्वारिंशच्च) (A7)

3.4.8.1

राष्ट्रकामाय होतव्या राष्ट्रं वै राष्ट्रभृतो राष्ट्रेणैवास्मै राष्ट्रमव रुन्धे राष्ट्रमेव
 भवत्यात्मने होतव्या राष्ट्रं वै राष्ट्रभृतो राष्ट्रं प्रजा राष्ट्रं पशवो राष्ट्रं यच्छ्रेष्ठो
 भवति राष्ट्रेणैव राष्ट्रमव रुन्धे वसिष्ठः समानानां भवति ग्रामकामाय
 होतव्या राष्ट्रं वै राष्ट्रभृतो राष्ट्रं सजाता राष्ट्रेणैवास्मै राष्ट्रं सजातानव
 रुन्धे ग्राम्ये - [] 22

3.4.8.2

-व भवत्यधिदेवने जुहोत्यधिदेवन एवास्मै सजातानव रुन्धे
 त एनमवरुद्धा उप तिष्ठन्ते रथमुख ओजस्कामस्य होतव्या ओजो वै

॥ राष्ट्रभू॒त ओ॒जो रथ॑ ओ॒जसै॒वास्मा॑ ओ॒जोऽव॑ रु॒न्ध ओ॒जस्व्ये॒व भव॑ति
यो रा॒ष्ट्राद॑प॒भूतः॑ स्यात् तस्मै॑ हो॒तव्या॑ याव॒न्तोऽस्य॑ रथाः॒ स्युस्तान्॑ ब्रूयाद्
यु॒ङ्ध्वमि॑ति रा॒ष्ट्रमे॒वास्मै॑ यु॒नक्त्या॑ - [] 23

3.4.8.3

हु॒तयो॑ वा ए॒तस्या॑क्लृ॒प्ता यस्य॑ रा॒ष्ट्रं न॑ क॒ल्पते॑ स्वर॒थस्य॑ दक्षि॒णं
चक्रं॑ प्र॒वृह्य॑ ना॒डीम॑भि जुहु॒यादाहु॑तीरे॒वास्य॑ क॒ल्पय॑ति ता अ॒स्य
क॒ल्पमा॑ना रा॒ष्ट्रम॑नु क॒ल्पते॑ संग्रा॒मे सँय॑न्ते हो॒तव्या॑ रा॒ष्ट्रं वै
॥ राष्ट्र॑भू॒तो रा॒ष्ट्रे ख॒लु वा॑ ए॒ते व्या॑यच्छन्ते ये स॒ङ्ग्राम॑ सं य॑न्ति यस्य
पूर्व॑स्य जुह्व॑ति स ए॒व भव॑ति जय॑ति तं संग्रा॒मं मा॑न्धु॒क इ॒ध्मो- [] 24

3.4.8.4

भव॑त्यङ्गा॒रा ए॒व प्र॑तिवेष्ट॒माना॑ अ॒मित्रा॑णाम॒स्य से॒नां
प्र॑तिवेष्टयन्ति य उ॒न्माद्ये॑त् तस्मै॑ हो॒तव्या॑ ग॒न्धर्वा॑प्सर॒सो वा
ए॒तमु॒न्माद॑यन्ति य उ॒न्माद्य॑त्ये॒ते ख॒लु वै ग॒न्धर्वा॑प्सर॒सो
॥ य॒द्राष्ट्र॑भू॒तस्तस्मै॑ स्वाहा॒ ताभ्यः॑ स्वाहे॑ति जुहो॑ति तेनै॒वैनाञ्छ॑मयति

नै॒यग्रो॒ध औ॒दु॒म्बर॒ आ॒श्वत्थः॒ प्लाक्ष॒ इती॒ध्मो भव॑त्ये॒ते वै
गन्ध॑र्वा॒प्सरसां॑ गृ॒हाः स्व॒ ए॒वैना॑ - [] 25

3.4.8.5

ना॒यत॑ने॒ शम॑यत्य॒भिच॑रता॒ प्र॒ति॒लो॒म॒ हो॒त॒व्याः प्रा॒णाने॑वा॒स्य
प्र॒ती॒चः प्र॒ति यौ॑ति॒ तं ततो॑ येन॒ केन॑ च स्तृ॒णुते॒ स्वकृ॑त॒ इरि॑णे॒ जुहो॑ति
प्र॒दरे॑ वैत॒द्वा अ॒स्यै निर्ऋ॑तिगृही॒तं निर्ऋ॑तिगृही॒त ए॒वैनं॑ निर्ऋ॑त्या
ग्रा॒हय॑ति॒ यद्वा॒चः क्रू॒रं तेन॑ वषट् करोति॒ वाच॑ ए॒वैनं॑ क्रू॒रेण॑
प्रवृ॑श्चति॒ ताज॑गा॒र्तिमा॑र्च्छति॒ यस्य॑ का॒मये॑तान्नाद्य - [] 26

3.4.8.6

मा द॑दीयेति॒ तस्य॑ स॒भाया॑मु॒त्तानो॑ नि॒पद्य॑ भु॒वन॑स्य प॒त इति॑
तृ॒णानि॑ सं गृ॒ह्णी॑यात् प्र॒जाप॑तिर्वै भु॒वन॑स्य प॒तिः प्र॒जाप॑तिनै॒वास्या॑न्नाद्य॒मा
दत्त॑ इ॒दम॒हम॒मुष्या॑ ऽऽ*मु॒ष्याय॑णस्यान्नाद्य॒ ह॒रामी॑त्याहा॒न्नाद्य॑मे॒वा॒स्य
ह॒रति॑ षड्भिर्ह॒रति॑ षड्वा ऋ॒तवः॑ प्र॒जाप॑तिनै॒वास्या॑
- न्नाद्य॑मा॒दाय॑र्तवोऽस्मा॒ अनु॑ प्र॒यच्छ॑न्ति - [] 27

3.4.8.7

यो ज्येष्ठबन्धुरप॑ भूतः॑ स्यात् त॑ऽस्थले॑ऽवसाय्य॑ ब्रह्मौदनं॑ चतुः॑
 शरा॑वं प॒क्त्वा तस्मै॑ होत॒व्या व॒र्ष्म वै रा॑ष्ट्रभृ॒तो व॒र्ष्म स्थलं॑ व॒र्ष्मणै॑वैनं॑
 व॒र्ष्म समा॑नानां॑ गमयति॑ चतुः॑ शरा॑वो भवति॑ दिक्ष्वे॒व प्र॑तितिष्ठति॑ क्षीरे॑
 भवति॑ रुच॒मेवास्मिन्॑ दधात्युद्धरति॑ शृत॒त्वाय॑ सर्पि॒ष्वान् भवति॑ मे॒ध्यत्वाय॑
 चत्वार॑ आ॒र्षेयाः प्रा॑श्नन्ति दि॒शामे॒व ज्योति॑षि जुहोति॑ । 28

(ग्रामी - यु॒नक्ती - ध॒मः - स्व॒ ए॒वैना॑ - न॒न्नाद्यं॑ - यँ॒च्छन्त्ये॑ -
 का॒न्न प॒ञ्चा॒शच्च॑) (A8)

3.4.9.1

दे॒विका॑ निर्व॒पेत् प्र॒जाका॑मश्छन्दा॒ऽसि॒ वै दे॒विका॑श्छन्दा॒ऽसी॒व
 खलु॑ वै प्र॒जाश्छ॑न्दोभिरे॒वास्मै॑ प्र॒जाः प्र॑जनयति॑ प्रथ॒मं धा॒तारं॑
 करोति॑ मिथुनी॑ ए॒व तेन॑ करोत्यन्वे॒वास्मा॑ अनु॒मति॑र्मन्यते॒ राते॑ रा॒का प्र॑
 सिनी॑वाली॒ जन॑यति॑ प्र॒जास्वे॒व प्र॑जातासु॒ कु॒ह्वा वाचं॑ दधात्ये॒ता ए॒व
 निर्व॒पेत् प॒शुका॑मश्छन्दा॒ऽसि॒ वै दे॒विका॑श्छन्दा॒ऽसी॒ - [] 29

3.4.9.2

व॒ खलु॒ वै प॒शव॑श्छन्द्ोभि॑रेवा॒स्मै प॒शून् प्र॑जनयति प्रथ॒मं धा॑तारं
 करो॑ति प्रै॒व तेन॑ वापयत्यन्वेवा॒स्मा अनु॑मतिर्मन्यते रा॒ते रा॒का प्र॑ सिनीवा॒ली
 जन॑यति प॒शूने॒व प्र॑जातान् कु॒ह्वा प्रति॑ष्ठापयत्येता ए॒व
 निर्व॑पेद्-ग्रा॒मका॑मश्छन्दा॒सि वै दे॒विका॑श्छन्दा॒सी व॒ खलु॒ वै
 ग्रा॒मश्छन्द्ोभि॑रेवा॒स्मै ग्रा॒म - [] 30

3.4.9.3

मव॑ रुन्धे मध्यतो॑ धा॒तारं करो॑ति मध्यत ए॒वैनं॑ ग्रा॒मस्य॑ दधात्येता ए॒व
 निर्व॑पेज्ज्यो॒गामया॑वी छन्दा॒सि वै दे॒विका॑श्छन्दा॒सि खलु॒ वा ए॒तम॑भि
 म॒न्यन्ते॑ यस्य॒ ज्यो॒गामय॑ति छन्द्ोभि॑रेवैन-मगदं करोति मध्यतो॑ धा॒तारं
 करो॑ति मध्यतो॑ वा ए॒तस्या॑क्लृप्तं य॒स्य ज्यो॒गामय॑ति मध्यत ए॒वास्य॑ तेन॑
 कल्प॑यत्येता ए॒व नि॒ - [] 31

3.4.9.4

व॒पेद्यं॑ य॒ज्ञो नो॒पन॑मेच्छन्दा॒सि वै दे॒विका॑श्छन्दा॒सि खलु॒
 वा ए॒तं नो॒प न॑मन्ति यं य॒ज्ञो नो॒पन॑मति प्रथ॒मं धा॑तारं करोति मुख॒त

ए॒वा॒स्मै॒ छ॒न्दा॒॑सि॒ द॒धा॒त्यु॒पै॒नं॒ य॒ज्ञो॒ न॒म॒त्ये॒ता ए॒व
नि॒र्व॒पे॒दी॒जा॒नश्छ॒न्दा॒॑सि॒ वै दे॒विका॒ या॒तया॒मानी॒व॒ ख॒लु॒ वा ए॒तस्य॒
छ॒न्दा॒॑सि॒ य ई॒जा॒न उ॒त्त॒मं॒ धा॒तारं॑ करो - [] 32

3.4.9.5

-त्यु॒परि॒ष्टादे॒वा॒स्मै॒ छ॒न्दा॒॑स्य॒या॒तया॒मान्य॒व॒ रु॒न्ध उ॒पै॒नमु॒त्त॒रो
य॒ज्ञो॒ न॒म॒त्ये॒ता ए॒व नि॒र्व॒पे॒द्यं॒ मे॒धा नो॒प॒नमे॒च्छ॒न्दा॒॑सि॒ वै
दे॒विका॒श्छ॒न्दा॒॑सि॒ ख॒लु॒ वा ए॒तं नो॒प॒ नम॒न्ति॒ यं मे॒धा नो॒प॒नम॒ति
प्र॒थ॒मं॒ धा॒तारं॑ करोति मुख॒त ए॒वा॒स्मै॒ छ॒न्दा॒॑सि॒ द॒धा॒त्यु॒पै॒नं
मे॒धा न॒म॒त्ये॒ता ए॒व नि॒र्व॒पे - [] 33

3.4.9.6

द्रु॒क्काम॒श्छ॒न्दा॒॑सि॒ वै दे॒विका॒श्छ॒न्दा॒॑सी॒व॒ ख॒लु॒ वै रु॒क्
छ॒न्दो॒भिरे॒वा॒स्मिन् रु॒चं द॒धा॒तिक्षी॒रे भ॒वन्ति॒ रु॒चमे॒वा॒स्मिन् द॒धति॒
म॒ध्यतो॒ धा॒तारं॑ करोति म॒ध्यत॒ ए॒वैन॒॑ रु॒चो द॒धा॒तिगा॒यत्री॒ वा
अ॒नु॒म॒तिस्त्रि॒ष्टु॒ग्रा॒का ज॒गती॒ सि॒नी॒वा॒ल्यनु॒ष्टुप् कु॒हूर्धा॒ता व॒षट्का॒रः

॥ पूर्वपक्षो राकाऽपरपक्षः कुहूरमावास्या सिनीवाली
॥ पौर्णमास्यनुमतिश्चन्द्रमा धाताऽष्टौ – [] 34

3.4.9.7

वसवोऽष्टाक्षरा गायत्र्येकादश रुद्रा एकादशाक्षरा त्रिष्टुब् द्वादशाऽऽ*दित्या
द्वादशाक्षरा जगती प्रजापतिरनुष्टुब् धाता वषट्कार एतद्वै देविकाः सर्वाणि
च छन्दांसि सर्वाश्च देवता वषट्कारस्ता यथ् सह सर्वा निर्वपेदीश्वरा
एनं प्रदहो द्वे प्रथमे निरुप्य धातुस्तृतीयं निर्वपेत् तथो
एवोत्तरे निर्वपेत् तथैनं न प्रदहन्त्य () थो यस्मै कामाय निरुप्यन्ते
तमेवाऽऽ*भिरुपाऽऽ*प्नोति । 35

(पशुकामश्छन्दांसि वै देविकाश्छन्दांसि – ग्रामं – कल्पयत्येता
एव नि – रुत्तमन्धातारं करोति – मेधा नमत्येता एव निर्वपे –
दष्टौ – दहन्ति – नव च) (A9)

Special Korvai:

(दे॒विकाः प्र॒जाका॑मो मि॒थुनी॑ प॒शुका॑मः प्रै॒व ग्रा॑मका॒मो ज्यो॑गा॒मया॑वी
यं य॑ज्ञो य ई॒जानो॑ यं मे॒धा रु॑क्का॒मोऽष्टौ॑ ।
दे॒विका॑ भवन्ति दधति रा॒ष्ट्रका॑माय भवति दधाति ।)

3.4.10.1

वा॒स्तो॒ष्पते॑ प्र॒ति जा॑नी ह्य॒स्मान्त् स्वा॑वेशो॒ अन॑मी॒वो भ॑वानः ।
यत् त्वे॒महे॑ प्र॒तित॑न्नो जुष॒स्व श॑न्न॒ऐधि॑ द्वि॒पदे॑ शञ्चतु॒ष्पदे॑ ।
वा॒स्तो॒ष्पते॑ श॒ग्मया॑ स॒ꣳ सदा॑ते सक्षी॒महि॑ र॒ण्वया॑ गा॒तुम॑त्या ॥
आ॒वः क्षे॑म उ॒त यो॑गे वर॒न्नो यू॒यं पा॑त स्व॒स्तिभिः॑ स॒दानः॑ ।
यथ् सा॒यं प्रा॑तर॒ग्निहो॑त्रं जु॒होत्या॑हु॒तीष्ट॑का ए॒व ता॑ उप॒ धत्ते॑ – [] 36

3.4.10.2

यज॑मानोऽहो॒रात्रा॑णि वा ए॒तस्ये॑ष्टका॒ य आ॑हि॒ताग्नि॑र्यथ्
सा॒यं प्रा॑तर्जु॒होत्य॑हो॒रात्रा॑ण्ये॒वा ऽऽ*प्त्वे॑ष्टकाः कृ॒त्वोप॑ धत्ते दश॒ समा॑नत्र
जु॒होति॑ द॒शाक्ष॑रा वि॒राड् वि॒राज॑मे॒वा ऽऽ*प्त्वे॑ष्टकां कृ॒त्वोप॑ धत्तेऽथो

विराज्ये॑व य॒ज्ञमा॑प्नोति चित्य॑श्चित्योऽस्य॑ भवति॑ तस्माद्यत्र॑ दशो॑षित्वा
प्रयाति॑ तद्-य॒ज्ञवा॑स्त्ववा॒स्त्वेव॑ तद्यत् ततो॑ऽर्वाचीन॑ - [] 37

3.4.10.3

रुद्रः॑ खलु॑ वै वा॒स्तोष्प॑तिर्यदहु॑त्वा वा॒स्तोष्प॑तीयं प्रयायाद् रुद्र॑ ए॒नं
भू॒त्वाऽग्नि॑रनू॒त्थाय॑ ह॒न्याद्वा॑स्तोष्प॑तीयं जुहोति॑ भा॒गधे॑ये॒नैवैन॑
शम॑यति नाऽऽ*॒र्तिमा॑च्छति॒ यज॑मानो यद्यु॒क्ते जु॑हुयाद्यथा प्रया॑ते
वा॒स्तावा॑हुतिं जुहोति॑ तादृ॒गेव॑ तद्यदयु॒क्ते जु॑हुयाद्यथा क्षे॒म आ॑हुतिं
जुहोति॑ तादृ॒गेव॑ तदहु॑तमस्य वा॒स्तोष्प॑तीय॑ स्या - [] 38

3.4.10.4

दक्षि॑णो यु॒क्तो भ॑वति स॒व्योऽयु॒क्तोऽथ॑ वा॒स्तोष्प॑तीयं जुहोत्यु॒भयमे॑वाऽ
कर॑परिवर्गमे॒वैन॑ शम॑यति यदे॒कया॑ जुहुयाद्वि॒होमं॑ कुर्यात्
पुरो॑ऽनुवाक्या म॒नूच्य॑ या॒ज्यया॑ जुहोति॑ सदे॒वत्वाय॑ यद्भु॒त आ॑दध्याद् रुद्रं॑
गृ॒हान॑न्वारो॒हयेद्-यद॑व॒क्षाणा॑न् यसं॑ प्र॒क्षाय॑ प्रयायाद्यथा य॒ज्ञवे॑शसं

ॐ॒वाऽऽद॒हनं॑ ॐ॒वा ता॒दृगे॒व तद॒यन्ते॑ योनि॒र्ऋ॒त्विय॑ इत्य॒रण्योः॑

स॒मारो॑हय - [] 39

3.4.10.5

–त्येष॑ वा अ॒ग्नेर्यो॑निः स्व ए॒वैनं॑ ॐ॒योनौ॑ स॒मारो॑हयत्यथो
ख॒ल्वाहु॑र्यद॒रण्योः॑ स॒मारूढो॑ नश्येदुद॒स्याग्निः॑ सीदेत् पुनरा॒धेयः॑
स्यादिति॑ या ते अ॒ग्ने य॒ज्ञिया॑ तनूस्तये॒ह्या रो॒हेत्या॑त्मन्त् स॒मारो॑हयते
यज॑मानो वा अ॒ग्नेर्यो॑निः स्वा॒यामे॒वैनं॑ ॐ॒न्याञ् स॒मारो॑हयते । 40

(धत्ते- ऽर्वाचीनञ् - स्यात् - स॒मारो॑हयति - पञ्चचत्वारिंशच्च) (A10)

3.4.11.1

त्वम॒ग्ने बृ॒हद्व्यो॑ दधा॒सि दे॒व दा॒शुषे॑ । क॒विर्गृ॒हप॑तिर्यु॒वा ।
ह॒व्यवा॒डग्नि॒रजरः॑ पि॒ता नो॑ वि॒भुर्वि॒भावा॑ सु॒दृशी॑को अ॒स्मे ।
सु॒गार्ह॒पत्याः॑ स॒मिषो॑ दि॒दीह्य॑स्मद्रि॒यख्सं॑ मिमी॒हि श्रवा॑ञ्सि ।
त्वं च॑ सोम नो व॒शो जी॒वातुं॑ न म॒रामहे॑ । प्रि॒यस्तो॑त्रो वनस्पतिः ।
ब्र॒ह्मा दे॒वानां॑ प॒दवीः॑ क॒वीना॑मृषिर्वि॒प्राणां॑ म॒हिषो॑ मृ॒गाणां॑ ।

श्ये॒नो॒ गृ॒ध्राणा॑ꣳ स्व॒धिति॑ र्व॒नाना॑ꣳ सोमः - [] 41

3.4.11.2

पवि॒त्रम॒त्येति॑ रे॒भन् । आ वि॒श्वदे॒वꣳ स॒त्पति॑ꣳ सू॒क्तैर॒द्या वृ॑णीमहे ।
 स॒त्यस॒वꣳ स॒वितारं॑ ॥ आ॒स॒त्येन॑ रज॒सा वर्त॑मानो नि॒वेश॑यन्न॒मृतं॑
 म॒र्त्यञ्च॑ । हि॒रण्य॑येन स॒विता रथे॑नाऽऽ* दे॒वोया॑ति भुव॒ना वि॒पश्यन्॑ ।
 यथा॑ नो अ॒दितिः॑ क॒रत् प॒श्चे नृ॒भ्यो यथा॑ ग॒वे ॥ यथा॑ तो॒काय॑ रु॒द्रियं॑ ॥
 मा न॒स्तो॒के तन॑ये मा न आयु॒षि मा नो॒ गोषु॑ मा - [] 42

3.4.11.3

नो अ॒श्वेषु॑ री॒रिषः॑ । वी॒रान् मानो॑ रु॒द्र भामि॑तो व॒धीर्हवि॑ष्मन्तो नम॒सा
 वि॒धेम॑ ते । उ॒द॒प्रुतो॑ न वयो रक्ष॒माणा वा॒वद॑तो अ॒भ्रिय॑स्येव घो॒षाः ॥
 गि॒रिभ्र॑जो नो॒र्मयो॑ म॒दन्तो॑ बृ॒हस्प॑तिम॒भ्यर्का॑ अ॒नावन् ।
 हꣳसै॒रिव॑ स॒खिभि॑र्वा॒वद॑द्भि॒रश्म॑न्म॒यानि॑ नह॒ना व्य॑स्यन् ।
 बृ॒हस्प॑तिर॒भिक॑नि॒क्रद॑द्वा उ॒त प्रा॑स्तौ॒दुच्च॑ वि॒द्वाꣳ अ॑गायत् ।
 ए॒न्द्र सान॑सिꣳ र॒यिꣳ - [] 43

3.4.11.4

स॒जित्वा॑न॒ꣳ स॒दा॒स॒हं॑ । व॒र्षि॑ष्ठ॒मू॒तये॑ भ॒र ।
 प्र॒स॒सा॒हि॒षे॑ पु॒रु॒हू॒त श॒त्रून् ज्ये॑ष्ठ॒स्ते शु॒ष्म इ॒ह रा॒तिर॑स्तु ।
 इ॒न्द्राऽऽ* भ॒र द॒क्षि॑णे॒ना व॒सू॒नि प॒तिः सि॒न्धू॒नाम॑सि रे॒वती॑नां ।
 त्व॒ꣳ सु॒तस्य॑ पी॒तये॑ स॒द्यो वृ॒द्धो अ॒जाय॑थाः । इ॒न्द्र ज्यै॑ष्ठ्याय सु॒क्रतो॑ ।
 भुव॑स्त्वमि॒न्द्र ब्र॑ह्म॒णा म॒हान् भुवो॑ वि॒श्वेषु॑ स॒वने॑षु य॒ज्ञियः॑ ।
 भुवो॑ नृ॒ꣳश्च्यौ॒त्नो वि॒श्वस्मि॑न् भ॒रे ज्ये॑ष्ठश्च म॒न्त्रो - [] 44

3.4.11.5

वि॒श्वच॑र्ष॒णे ।
 मि॒त्रस्य॑ च॒र्षणी॑धृ॒तः श्रवो॑ दे॒वस्य॑ सा॒नसिं॑ । स॒त्यं चि॒त्र श्र॑वस्त॒मं ।
 मि॒त्रो ज॒नान् या॑तयति प्र॒जानन् मि॒त्रो दा॑धार पृथि॒वीमु॒त द्यां॑ ।
 मि॒त्रः कृ॒ष्टीर॑नि॒मिषा॑ऽभि च॒ष्टे स॒त्याय॑ ह॒व्यं घृ॒तव॑द्-वि॒धेम॑ ।
 प्र॒समि॑त्र॒ मर्तो॑ अस्तु प्र॒यस्वा॑न् यस्त आ॒दित्य॑ शि॒क्षति॑ व्र॒तेन॑ ।
 न ह॑न्यते न जी॒यते॑ त्वो॒तो नैन॑म॒ꣳहो अ॒श्नोत्य॑न्ति॒तो न दू॒रात् । य-[] 45

3.4.11.6

चि॒द्धि॒ ते॒ वि॒शो॒ यथा॑ प्र॒दे॒व वरु॑ण व्र॒तं । मि॒नी॒म॒सि॒ द्यवि॑द्यवि ।
यत् किञ्चे॒दं वरु॑ण दै॒व्ये जने॑ऽभि॒द्रो॒हं म॒नु॒ष्याश्च॑राम॒सि ।
अचि॑त्तीयत् तव ध॒र्मा यु॒योपि॑ममा न॒स्तस्मा॑ दे॒नसो॑ दे॒व री॑रिषः ।
कि॒त॒वा॒सो॒ यद्दि॑ रि॒पुर्न दी॒वि यद्वा॑ घा स॒त्य मु॒तय॑न्न वि॒द्म ।
सर्वा॑ ता वि॒ष्य शि॒थिरे॑ () व दे॒वाथा॑ ते स्याम वरु॑ण प्रि॒यासः॑ । 46
(सो॒मो-गो॒षु मा- रयि॑- मन्त्रो॑- य- च्छि॑थिरा- स॒प्त च॑) (A11)

Prasna Korvai with starting Padams of 1 to 11 Anuvaakams :-

(वि वा ए॒तस्या॑ - ऽऽवा॒यो - इ॒मे वै - चि॒त्तञ्चा॑ - ऽग्नि॑र्भू॒तानां॑ -
दे॒वा वा अ॑भ्या॒ताना॑ - नृ॒ताषा॑ड् - रा॒ष्ट्रका॑माय - दे॒विका॑ - वा॒स्तो॒ष्पते॑
- त्वम॑ग्ने बृ॒ह - दै॒काद॑श)

Korvai with starting Padams of 1, 11, 21 Series of Panchaatis :-

(वि वा ए॒तस्ये॑ - त्या॒ह - मृ॒त्युर्गन्ध॑र्वो - ऽव रु॒न्धे म॑द्ध्यत -
स्त्वम॑ग्ने बृ॒हथ् - षट्च॑त्वारि॒ंशत्)

First and Last Padam of Fourth Prasnam of Kadaam 3 :-

(वि वा ए॒तस्य॑ – प्रि॒यासः॑)

॥ हरिः॑ ओं ॥

॥ कृष्ण यजुर्वेदीय तैत्तिरीय संहितायां तृतीयकाण्डे चतुर्थः प्रश्नः समाप्तः ॥

ओं नमः परमात्मने, श्री महागणपतये नमः, श्री गुरुभ्यो नमः

हरिः ओं

3.5 तृतीयकाण्डे पञ्चमः प्रश्नः – इष्टिशेषाभिधानं

3.5.1.1

पूर्णा पश्चादु॒त पूर्णा पु॒रस्तादु॒न्मध्यतः॑ पौ॒र्णमा॒सी जि॒गाय॑ ।
तस्यान् दे॒वा अधि॑ सँव॒सन्त उत्त॑मे नाक॒ इह मा॑दयन्तां ।
यत्ते दे॒वा अद॑धु भा॒गधे॒यममा॑वास्ये सँव॒सन्तो म॑हित्वा ।
सानो य॒ज्ञं पि॒पृहि॑ विश्व॒वारो रयि॑ नो धे॒हि सु॒भगे सु॒वीरं॑ ।
नि॒वेश॑नी स॒ङ्गम॑नी वसू॒नां वि॒श्वा रू॒पाणि॑ वसू॒न्यावे॑शयन्ती ।
सह॒स्रपो॑षꣳ सु॒भगा ररा॑णा सा न आ॒गन् वर्च॑सा – [] 1

3.5.1.2

सँवि॒दाना॑ ।
अ॒ग्नीषो॑मौ प्रथ॒मौ वी॒र्ये॑ण वसू॒न् रु॒द्राना॑दित्यानिह जि॒न्वतं॑ ।
मा॒ध्यꣳ हि पौ॒र्णमा॒सं जु॒षेथां॑ ब्रह्म॒णा वृ॒द्धौ सु॒कृते॑न

सा॒ताव॒थाऽस्म॒भ्य॑ꣳ स॒हवी॒राꣳ र॒यिं॑ नि॒ यच्छ॑तं ।
 आ॒दि॒त्याश्चाऽङ्गि॑रसश्चा॒ग्नीनाऽद॑धत ते॒ दर्श॑पूर्णमा॒सौ प्रै॒प्सन्
 तेषा॑मङ्गि॒रसां॑ निरु॒प्तꣳ ह॒विरा॒सीद॑थाऽऽ*दि॒त्या ए॒तौ
 हो॒माव॑पश्यन् तावजुहवुस्ततो॒ वै ते॑ दर्श॑पूर्णमा॒सौ – [] 2

3.5.1.3

पूर्व॑ आ ऽल॑भन्त दर्श॑पूर्णमा॒सा-वा॒लभ॑मान ए॒तौ हो॒मौ
 पु॒रस्ता॑ꣳज्जुहुयाथ् सा॒क्षादे॒व दर्श॑पूर्णमा॒सावा॒ लभ॑ते ब्रह्म॒वादि॑नो
 वद॑न्ति स त्वै दर्श॑पूर्णमा॒सावा॒ लभे॑त य ए॒नयो॑रनु-लो॒मञ्च॑
 प्र॒तिलो॒मञ्च॑ वि॒द्यादि॒त्यमा॒वास्या॑या ऊ॒र्ध्वं तद॑नुलो॒मं पौ॑र्णमा॒स्यै
 प्र॒तीची॒नं तत् प्र॒तिलो॒मं य॑त् पौ॑र्णमा॒सीं पूर्वा॑मा॒लभे॑त प्र॒तिलो॒ममे॑ना॒वा
 ल॒भेता॑-मु॒मप॑क्षीयमाण-मन्व॒प – [] 3

3.5.1.4

क्षी॒येत॑ सा॒रस्व॒तौ हो॒मौ पु॒रस्ता॑ꣳज्जुहुयादमा॒वास्या॑ वै
 स॒रस्व॒त्यनु॒लोम॑-मे॒वैना॒वा ल॒भते॑ ऽमु॒माप्या॑यमानमन्वा प्या॒यत॑

आग्नावैष्णव-मेकादशकपालं पुरस्तान्निर्वपेथ् सरस्वत्यै चरुं
 सरस्वते द्वादशकपालं यदाग्नेयो भवत्यग्निर्वै यज्ञमुखं यज्ञमुखमेवर्द्धि
 पुरस्ताद्-धत्ते यद्-वैष्णवो भवति यज्ञो वै विष्णुर्यज्ञमेवाऽऽरभ्य
 प्रतनुते सरस्वत्यै () चरुर्भवति सरस्वते द्वादशकपालोऽमावास्या वै
 सरस्वती पूर्णमासः सरस्वान् तावेव साक्षादा रभत ऋध्नोत्याभ्यां
 द्वादशकपालः सरस्वते भवति मिथुनत्वाय प्रजात्यै मिथुनौ गावौ
 दक्षिणा समृद्ध्यै । 4

(वर्चसा - वै ते द्वादशपूर्णमासा - वप - तनुते सरस्वत्यै -
 पञ्चविंशतिश्च) (A1)

3.5.2.1

ऋषयो वा इन्द्रं प्रत्यक्षं नापश्यन् तं वसिष्ठः प्रत्यक्षमपश्यथ्
 सोऽब्रवीद्-ब्राह्मणं ते वक्ष्यामि यथा त्वत्पुरोहिताः प्रजाः प्रजनिष्यन्तेऽथ
 मेतरेभ्य ऋषिभ्यो मा प्रवोच इति तस्मा एतान्थस्तोम-भागानब्रवीत् ततो
 वसिष्ठपुरोहिताः प्रजाः प्राजायन्त तस्माद्-वासिष्ठो ब्रह्मा कार्यः प्रैव

जा॒यते॒ र॒श्मि॒रसि॒ क्षया॑य॒ त्वा क्ष॑यं जि॒न्वे - [] 5

3.5.2.2

-त्याह॑ दे॒वा वै क्ष॑यो दे॒वेभ्य॑ ए॒व य॒ज्ञं प्रा॒ऽऽ*ह॑ प्रेति॑रसि॒ धर्मा॑य॒
त्वा ध॑र्मं जि॒न्वेत्या॑ह॒ मनु॑ष्या॒ वै ध॑र्मो मनु॑ष्येभ्य॑ ए॒व य॒ज्ञं
प्रा॒ऽऽ*हान्वि॑तिरसि॒ दि॒वे त्वा दि॒वं जि॒न्वेत्या॑हैभ्य॑ ए॒व लो॒केभ्यो॑ य॒ज्ञं
प्रा॒ऽऽ*ह॑विष्ट॒म्भोऽसि॒ वृष्ट्यै॑ त्वा वृष्टिं॑ जि॒न्वेत्या॑ह॒ वृष्टि॑मे॒वाव - [] 6

3.5.2.3

रु॒न्धे प्र॒वाऽस्य॑नु॒वाऽसी॑त्याह॒ मिथु॑न॒त्वायो॒शिग॑सि॒ वसु॑भ्यस्त्वा
वसू॑ज्जि॒न्वेत्या॑हाष्टौ॒ वस॑व॒ एका॑दश॒ रुद्रा॑ द्वा॒दशाऽऽ*दि॒त्या ए॒ताव॑न्तो॒ वै
दे॒वास्ते॑भ्य॑ ए॒व य॒ज्ञं प्रा॒ऽऽ*हौजो॑ऽसि॒ पित॑र॒भ्यस्त्वा पि॒तृन् जि॒न्वेत्या॑ह॒
दे॒वाने॒व पि॒तृन॑नु॒ सन्त॑नोति॒ तन्तु॑रसि॒ प्र॒जाभ्य॑स्त्वा प्र॒जा जि॒न्वे - [] 7

3.5.2.4

-त्याह॑ पि॒तृने॒व प्र॒जा अ॒नु सन्त॑नोति॒ पृ॒तना॑षाडसि॒ पशु॑भ्यस्त्वा
पशू॑ज्जि॒न्वेत्या॑ह॒ प्र॒जा ए॒व प॒शून॑नु॒ सन्त॑नोति॒रे॒वद॑स्यो-

ष॒धी॒भ्यस्त्वौष॑धी-जि॒न्वे॒त्याहौ॑ष॒धीष्वे॒व प॒शून् प्र॑ति॒ष्ठाप॑यत्यभिजिदसि
यु॒क्त॒ग्रावे॑न्द्राय॒ त्वेन्द्रं॑ जि॒न्वे॒त्याहा॑भिजित्या॒ अधि॑पतिरसि प्रा॒णाय॑
त्वा प्रा॒णं - [] 8

3.5.2.5

जि॒न्वे॒त्याह॑ प्र॒जास्वे॒व प्रा॒णान् द॑धाति त्रि॒वृद॑सि प्र॒वृद॑सीत्याह
मि॒थुन॑त्वाय॒ स॒॒रो॒होऽसि॑ नी॒रो॒होऽसी॑त्याह प्र॒जात्यै॑ वसु॒कोऽसि॑
वै॒ष॒श्रिर॑सि वस्य॒ष्टिर॑सीत्याह प्र॒तिष्ठि॑त्यै । 9

(जि॒न्वे॒त्य - व - प्र॒जा जि॒न्व - प्रा॒णन् - त्रि॒॒॒श॒च्च) (A2)

3.5.3.1

अ॒ग्नि॒ना दे॒वेन॑ पृ॒तना॑ जया॒मि गा॒यत्रे॑ण छ॒न्दसा॑ त्रि॒वृता॑ स्तो॒मैर्न॑ रथ॒न्तरे॑ण
सा॒म्ना व॑षट्कारेण॒ वज्रे॑ण पू॒र्व॒जान् भ्रा॑तृ॒व्यान॑ध॒रान् पा॑दया॒म्यवै॑नान् बा॒धे
प्र॒त्ये॒नान्नु॑देऽस्मिन् क्ष॒येऽस्मिन्॑ भू॒मिलो॑के योऽस्मा॑न् द्वेष्टि यञ्च॒ वयं॑ द्वि॒ष्मो
वि॒ष्मोः क्र॑मे॒णाऽत्ये॑नान् क्रा॒मामी॑न्द्रेण दे॒वेन॑ पृ॒तना॑ जया॒मि त्रै॑ष्टु॒भेन॑
छ॒न्दसा॑ पञ्चद॒शेन॑ स्तो॒मैर्न॑ बृ॒हता॑ सा॒म्ना व॑षट्कारेण॒ वज्रे॑ण - [] 10

3.5.3.2

सह॒जान् वि॒श्वेभिर्दे॒वेभिः पृ॒तना जयामि जागतेन॑ छन्द॒सा सप्तद॑शेन
स्तोमे॑न वामदे॒व्येन साम्ना॑ वषट्कारेण॑ वज्रे॑णा परजानिन्द्रेण॑ सयुजो॑
वय॑ꣳ सास॒ह्याम पृ॒तन्यतः । घ्नन्तो॑ वृ॒त्राण्यप्रति॑ ।
यत्ते॑ अग्ने तेज॒स्तेना॒हं तेज॒स्वी भूयासं॑ यत्ते॑ अग्ने वर्च॒स्तेना॒हं
वर्च॒स्वी भूयासं॑ यत्ते॑ अग्ने हर॒स्तेना॒हꣳ हर॒स्वी भूयासं॑ । 11

(बृ॒हता॑ सा॒म्ना वषट्कारेण॑ वज्रे॑ण – षट्चत्वारि॑ꣳशच्च) (A3)

3.5.4.1

ये दे॒वा यज्ञ॑हनो॑ यज्ञ॒मुषः पृथि॒व्यामध्या॑सते ।
अ॒ग्निर्मा तेभ्यो॑ रक्ष॒तु गच्छे॑म सु॒कृतो॑ वयं ।
आ॒ऽगन्म मि॒त्रावरु॑णा वरे॒ण्या रा॒त्रीणां भा॒गो यु॒वयो॒र्यो अ॒स्ति ।
नाकं॑ गृ॒ह्णाणाः सु॒कृत॑स्य लो॒के तृती॑ये पृ॒ष्ठे अधि॑ रोच॒ने दि॒वः ।
ये दे॒वा यज्ञ॑हनो॑ यज्ञ॒मुषोऽन्तरि॑क्षेऽध्या॑सते । वा॒युर्मा तेभ्यो॑ रक्ष॒तु गच्छे॑म
सु॒कृतो॑ वयं । यास्ते॑ रा॒त्रीः स॒वित – [] 12

3.5.4.2

-दे॒व॒या॒नी॒र॒न्त॒रा द्या॒वा॒पृ॒थि॒वी वि॒य॒न्ति॑ ।
 गृ॒हैश्च॑ स॒र्वैः प्र॒जया॑ न्व॒ग्रे सु॒वो रु॒हा॒णा॒स्त॒रता॑ र॒जाँ॒सि ।
 ये दे॒वा य॒ज्ञ॒ह॒नो य॒ज्ञ॒मु॒षो दि॒व्य॒ध्या॒स॒ते ।
 सू॒र्यो मा ते॒भ्यो र॒क्षतु॑ ग॒च्छेम॑ सु॒कृ॒तो व॒यं ।
 येने॒न्द्राय॑ स॒म॒भरः॑ प॒याँ॒स्यु॒त्त॒मे॒न ह॒विषा॑ जा॒तवे॑दः ।
 तेना॒ग्ने त्व॒मु॒त वर्ध॑ये॒मँ स॒जा॒तानाँ॑ श्रै॒ष्ठ्य आ धे॑ह्ये॒नं ।
 य॒ज्ञ॒ह॒नो वै दे॒वा य॒ज्ञ॒मु॒षः - [] 13

3.5.4.3

स॒न्ति त ए॒षु लो॒केष्वा॑स॒त आ॒द॒दान॑ वि॒म॒थ्ना॒ना यो द॑दा॒ति यो य॒ज॒ते
 त॒स्य । ये दे॒वा य॒ज्ञ॒ह॒नः पृ॒थि॒व्या॒म॒ध्या॒स॒ते ये अ॒न्त॒रि॒क्षे ये
 दि॒वी॒त्या॒हे॒मा॒ने॒व लो॒काँ॒स्ती॒र्त्वा स॒गृ॒हः स॒प॒शुः सु॒व॒र्गं लो॒क॒मे॒त्य॒प वै
 सो॒मे॒ने॒जा॒ना॒द्दे॒वता॑श्च॒ य॒ज्ञश्च॑ क्रा॒म॒न्त्या॒ग्ने॒यं प॒ञ्च॑क॒पा॒ल॒मु॒द॒व॒सा॒नी॒यं
 नि॒र्व॒पे॒द॒ग्निः स॒र्वा दे॒वताः॑ - [] 14

3.5.4.4

पाङ्क्त्यौ॑ य॒ज्ञो दे॒वता॑श्चै॒व य॒ज्ञञ्चा॑व रु॒न्धेगा॑य॒त्रो वा अ॒ग्निर्गा॑य॒त्र छ॒न्दास्तं॑
छ॒न्दसा॑ व्य॒र्धय॑ति यत् पञ्च॑क॒पालं॑ क॒रोत्य॑ष्टाक॒पालः॑ का॒र्योऽष्टा॑क्ष॒रा
गा॒यत्री॑ गा॒यत्रोऽग्नि॑-र्गा॒यत्र॑ छ॒न्दाः स्वे॒नैवैनं॑ छ॒न्दसा॑ सम॒र्धय॑ति
पङ्क्त्यौ॑ या॒ज्यानु॑वाक्ये॒ भवतः॑ पाङ्क्त्यौ॑ य॒ज्ञस्ते॒नैव॑ य॒ज्ञान्नै॑ति । 15

(स॒वित - दे॒वा य॒ज्ञमु॑षः - सर्वा॑ दे॒वता - स्त्रि॑च॒त्वारि॑ञ्च) (A4)

3.5.5.1

सू॒र्यो मा दे॒वो दे॒वेभ्यः॑ पा॒तु वा॒युरन्त॑रि॒क्षाद्-य॑ज॒मानोऽग्नि॑र्मा पा॒तु
चक्षु॑षः । सक्ष॑ शूष॒ सवि॑त॒र्विश्व॑च॒र्षण॑ ए॒तेभिः॑ सोम॒ नाम॑भिर्वि॒धेम ते॑
ते॒भिः सोम॒ नाम॑भिर्वि॒धेम ते॑ । अ॒हं पर॑स्ताद-हमवस्तादहं॒ ज्योति॑षा वि
तमो॑ व॒वार । य॒दन्त॑रि॒क्षं तदु॑ मे पि॒ताऽभू॑दहं॒ सूर्य॑मु॒भय॑तो द॒दर्शा॑हं
भू॒या स॒मुत्त॑मः स॒माना॑ना - [] 16

3.5.5.2

मा स॒मुद्रा॑-दाऽन्त॑रि॒क्षात्-प्र॒जाप॑तिरु॒दधिं॑ च्या॒वया॑तीन्द्रः
प्र॒स्नौतु॑ म॒रुतो॑ व॒र्षय॑न्तू॒न्नम्भ॑य पृथि॒वीं भि॒न्धी॑दं दि॒व्यं न॑भः ।

उ॒द्रो दि॒व्यस्य॑ नो॒ दे॒ही॒शानो॑ वि॒सृ॒जा दृ॒तिं । प॒शवो॑ वा ए॒ते यदा॑दि॒त्य ए॒ष
रु॒द्रो यद॑ग्नि॒रोष॑धीः प्रा॒स्याग्ना॑वादि॒त्यं जु॑होति रु॒द्रादे॑व प॒शून् न्तर्द॑धात्यथो
ओ॒षधी॑ष्वे॒व प॒शून् – [] 17

3.5.5.3

प्रति॑ष्ठापयति क॒विर्य॒ज्ञस्य॑ वि॒तनो॑ति पन्थां॒ नाक॑स्य पृ॒ष्ठे अधि॑ रो॒चने
दि॒वः । येन॑ ह॒व्यं व॑हसि॒ यासि॑ दू॒त इ॒तः प्र॑चे॒ता अ॒मु॒तः स॒नीया॑न् ।
यास्ते॑ वि॒श्वाः स॒मिधः॑ स॒न्त्यग्ने॑याः पृ॒थिव्यां॑ ब॒र्हिषि॑ सूर्ये॒ याः ।
तास्ते॑ गच्छ॒न्त्वाहु॑तिं घृ॒तस्य॑ दे॒वाय॑ते यज॒मानाय॑ शर्म ।
आ॒शा॒सानः॑ सु॒वीर्यं॑ रा॒यस्पोष॑ स्व॒श्रियं॑ ।
बृ॒हस्प॑तिना रा॒या स्व॒गाकृ॑तो म॒ह्यं य॑ज॒मानाय॑ () तिष्ठ । 18
(स॒मा॒ना॒ना – ओ॒षधी॑ष्वे॒व प॒शून् – म॒ह्यं य॑ज॒माना – यैक॑ञ्च) (A5)

3.5.6.1

सं त्वा॑ न॒ह्यामि॑ प॒यसा॑ घृ॒तेन॑ सं त्वा॑ न॒ह्याम्य॑प ओ॒षधी॑भिः ।
सं त्वा॑ न॒ह्यामि॑ प्र॒जया॑ऽह॒मद्य॑ सा दी॒क्षिता॑ स॒नवो॑ वाज॒मस्मे॑ ।

प्रे॒तु ब्र॒ह्म॒णस्प॒त्नी वे॒दिं ँ॒वर्णे॒न सी॒दतु॑ ।
 अथा॒हम॒नुका॒मिनी॒ स्वे लो॒के वि॒शा इ॒ह ।
 सु॒प्रज॒सस्त्वा वय॑ꣳ सु॒पत्नी॒रुप॑ से॒दिम॑ ।
 अ॒ग्ने स॒पत्न॒दम्भ॒नम॒दब्धा॒सो अ॒दाभ्यं॑ ॥
 इ॒मं ँ॒विष्या॑मि वरु॒णस्य॑ पा॒शं – [] 19

3.5.6.2

ॐ॒यम॒ब॒ध्नीत॑ स॒विता॑ सु॒केतः॑ ।
 धा॒तुश्च॑ यो॒नौ सु॒कृ॒तस्य॑ लो॒के स्यो॒नं मे॑ सह॒ पत्या॑ करो॒मि ।
 प्रे॒ह्युदे॒ह्युत॑स्य॒ वामी॑र॒न्वग्नि॑स्तेऽग्रं॒ नय॑त्वदि॒तिर्म॑ध्यं द॒दताꣳ
 रु॒द्राव॑सृ॒ष्टाऽसि॑ यु॒वा ना॒म मा॒ मा हि॑ꣳसी॒र्वसु॑भ्यो रु॒द्रेभ्य॑ आ॒दित्ये॑भ्यो
 वि॒श्वेभ्यो॑ वो॒ दे॒वेभ्यः॑ प॒न्नेज॑नीर्गृ॒ह्णामि॑ य॒ज्ञाय॑ वः प॒न्नेज॑नीः सा॒दयामि॑
 वि॒श्वस्य॑ ते॒ विश्वा॑वतो॒ वृष्णि॑यावत – [] 20

3.5.6.3

स्त॒वाग्ने॑ वा॒मीर॑नु॒ संदृ॑शि॒ विश्वा॑ रेता॒ऽसि॑ धि॒षीया॑ऽगन् दे॒वान् य॒ज्ञो नि॑
दे॒वीर्दे॒वेभ्यो॑ य॒ज्ञम॑शिष॒न्नस्मिन्त् सु॑न्वति यज॒मान आ॑शिषः स्वाहाकृताः
समु॒द्रेष्ठा॑ गन्ध॒र्वमा॑तिष्ठ॒तानु॑ । वा॒तस्य॑ प॒त्मन्नि॒ड ई॒डिताः॑ । 21

(पा॒शं - वृ॑ष्णि॒याव॑त - स्त्रि॒ऽश॑च्च) (A6)

3.5.7.1

व॒षट्का॑रो वै गा॒यत्रि॑यै शिरो॑ऽछिनत् तस्यै र॒सः प॑राऽप॒तथ् स पृ॑थि॒वीं
प्रा॒विश॑थ्स॒ खदि॑रोऽभ॒वद्य॑स्य॒ खादि॑रः सु॒वो भ॑वति छ॒न्दसा॑मे॒व रसे॑नाव
द्यति॑ सर॒सा अ॒स्याऽऽ*हु॑तयो भवन्ति तृ॒तीय॑स्यामि॒तो दि॒वि सो॑म आसीत्
तं गा॒यत्र्या॑ऽहर॒त् तस्य॑ प॒र्णम॑च्छिद्य॒त तत् प॒र्णोऽभ॑वत् तत् प॒र्णस्य॑ प॒र्णत्वं
यस्य॑ प॒र्णम॑यी जुहू - [] 22

3.5.7.2

-र्भव॑ति सौ॒म्या अ॒स्याऽऽ*हु॑तयो भवन्ति जु॒षन्ते॑ऽस्य दे॒वा आ॑हु॒तीर्दे॒वा
वै ब्र॑ह्म॒न्नव॑दन्त॒ तत् प॒र्ण उ॑पाऽ*शृ॒णोथ् सु॒श्रवा॑ वै ना॒म यस्य॑ प॒र्णम॑यी
जुहू॑र्भव॑ति न पा॒पऽश्लो॑कऽशृ॒णोति॑ ब्र॒ह्म वै प॒र्णो वि॒ण्मरु॑तोऽन्नं

वि॒ण्मा॒रुतो॑ऽश्व॒त्थो॒ यस्य॑ प॒र्ण॒मयी॑ जु॒हूर्भ॒वत्या॑-श्व॒त्-थ्युप॒भृद्-
ब्र॒ह्म॒णै॒वान्न॑मव रु॒न्धेऽथो॒ ब्र॒ह्मै - [] 23

3.5.7.3

-व वि॒श्य॒ध्यू॒हति॑ रा॒ष्ट्रं वै॒ प॒र्णो वि॒डश्व॒त्थो यत् प॒र्ण॒मयी॑
जु॒हूर्भ॒वत्या॑-श्व॒त्थ्युप॒भृद्-रा॒ष्ट्रमे॒व वि॒श्य॒ध्यू॒हति॑ प्र॒जाप॑तिर्वा
अ॒जुहो॑त् सा य॒त्राऽऽ*हु॑तिः प्र॒त्यति॑ष्ठत् ततो॒ विक॑ङ्क॒त उ॒दति॑ष्ठत् ततः
प्र॒जा अ॒सृज॑त यस्य वैक॑ङ्क॒ती ध्रु॒वा भ॑वति प्र॒त्येवा॑ऽस्या
ऽऽ*हु॑तयस्तिष्ठन्त्यथो प्रै॒व जा॑यत ए॒तद्वै सु॒चाञ् () रू॒पं य॑स्यै॒वञ्
रू॒पाः सु॒चो भ॑वन्ति सर्वा॒ण्ये॒वैनञ् रू॒पाणि॑ प॒शूना॑मुपतिष्ठन्ते
नास्याप॑-रू॒पमा॑त्मज्जायते । 24

(जु॒हू - रथो॑ ब्र॒ह्म - सु॒चाञ् - स॒प्तद॑श च) (A7)

3.5.8.1

उ॒पया॑मगृ॒हीतो॑ऽसि प्र॒जाप॑तये त्वा ज्योति॑ष्मते ज्योति॑ष्मन्तं गृ॒ह्णामि॑
दक्षाय॑ दक्ष॒वृधे॑ रा॒तं दे॒वेभ्यो॑ऽग्नि जिह्वे॑भ्यस्त्वर्ता॒युभ्य॑

इन्द्र॑ ज्येष्ठे॑भ्यो वरु॑णराज॑भ्यो वा॒तापि॑भ्यः पर्जन्या॑त्म॒भ्यो दि॒वे वा॒ऽन्तरि॑क्षाय
 त्वा पृ॒थिव्यै॑ त्वाऽपे॑न्द्र॒ द्विष॑तो॒ मनो॑ऽप जि॒ज्यास॑तो ज॒ह्यप॑ यो नो॒ऽराती॑यति
 तं ज॒हि प्रा॑णाय॒ त्वाऽपा॑नाय॒ त्वा व्या॑नाय॒ त्वा स॑ते॒ त्वाऽस॑ते
 त्वाऽध॑भ्यस्त्वौष॒धीभ्यो॑ ()वि॒श्वेभ्य॑स्त्वा भु॒तेभ्यो॑ यतः॒ प्रजा॑ अ॒क्खि॒द्रा
 अजा॑यन्त॒ तस्मै॑ त्वा प्रजा॑पतये॒ विभू॑दाव॒न्ने ज्योति॑ष्मते॒ ज्योति॑ष्मन्तं
 जुहो॑मि । 25 (ओष॑धीभ्य - श्रु॑तुर्दश च) (A8)

3.5.9.1

यां वा॑ अ॒ध्वर्यु॑श्च यज॑मानश्च दे॒वता॑मन्तरि॒तस्त॑स्या आ वृ॑श्च्येते
 प्राजा॑पत्यं दधि॒ग्रहं॑ गृ॒ह्णीया॑त् प्रजा॑पतिः सर्वा॑ दे॒वता॑ दे॒वता॑भ्य ए॒व
 नि॒हुवा॑ते ज्येष्ठो॑ वा ए॒ष ग्र॑हाणां य॒स्यैष॑ गृ॒ह्यते॑ ज्यैष्ठ्य॑मे॒व ग॑च्छति
 सर्वा॑सां वा ए॒तद्दे॒वता॑नां रूपं॑ य॒देष॑ ग्र॒हो य॒स्यैष॑ गृ॒ह्यते॑ सर्वा॑ण्ये॒वैनं॑
 रूपा॑णि प॒शूना॑मुपतिष्ठन्त॒ उपया॑मगृहीतो - [] 26

3.5.9.2

–ऽसि प्रजापतये त्वा ज्योतिष्मते ज्योतिष्मन्तं गृह्णामीत्याह ज्योतिरेवैनं
समानानां करोत्यग्नि-जिह्वेभ्यस्त्वर्तायुभ्य इत्याहैतावतीर्वै देवतास्ताभ्य
एवैनं सर्वाभ्यो गृह्णत्यपेन्द्र द्विषतो मन इत्याह भ्रातृव्यापनुत्त्यै प्राणाय
त्वाऽपानाय त्वेत्याह प्राणानेव यजमाने दधाति तस्मै त्वा प्रजापतये
विभूदावन्ने ज्योतिष्मते ज्योतिष्मन्तं जुहोमी – [] 27

3.5.9.3

–त्याह प्रजापतिः सर्वा देवताः सर्वाभ्य एवैनं देवताभ्यो जुहोत्याज्यग्रहं
गृह्णीयात् तेजस्कामस्य तेजो वा आज्यं तेजस्यैव भवति सोमग्रहं
गृह्णीयाद्-ब्रह्मवर्चसकामस्य ब्रह्मवर्चसं वै सोमो ब्रह्मवर्चस्यैव भवति
दधिग्रहं गृह्णीयात् पशुकामस्योर्ग्वै दध्यूर्कं पशव ऊर्जेवाऽस्मा ऊर्जं
पशूनव रुन्धे । 28

(उपयामगृहीतो – जुहोमि – त्रिचत्वारिंशच्च) (A9)

3.5.10.1

त्वे॑ क्र॒तुम॑पि वृ॒ज्जन्ति॑ वि॒श्वे द्वि॒र्यदे॑ते त्रि॒-र्भव॑न्त्यू॒माः ।
 स्वा॒दोः स्वा॒दीयः॑ स्वा॒दुना॑ सृ॒जा सम॑त ऊ॒ षु म॒धु म॒धुना॑ऽभि यो॒धि ।
 उ॒पया॑मगृ॒हीतो॑ऽसि प्र॒जाप॑तये त्वा जु॒ष्टं गृ॒ह्णाम्ये॑ष ते यो॒निः
 प्र॒जाप॑तये त्वा । प्रा॒णग्र॑हान् गृ॒ह्णात्ये॑ता॒वद्वा अ॑स्ति याव॒देते॑ ग्र॒हाः
 स्तो॒माश्छ॑न्दा॒ऽसि पृ॒ष्ठानि॑ दि॒शो याव॑दे॒वास्ति॑ त - [] 29

3.5.10.2

-द॒व रु॒न्धे ज्ये॑ष्ठा वा ए॒तान् ब्रा॒ह्मणाः॑ पु॒रा वि॒द्वाम॑क्रन् तस्मात् तेषा॒ऽ
 सर्वा॑ दि॒शोऽभि॑जिता अ॒भूवन्॑ यस्यै॒ ते गृ॒ह्यन्ते॑ ज्यै॒ष्ठ्यमे॒व ग॑च्छत्यभि
 दि॒शो ज॑यति पञ्च गृ॒ह्यन्ते॑ पञ्च दि॒शः सर्वा॑स्वे॒व दिक्ष्-वृ॑ध्नुवन्ति
 न॒वन॑व गृ॒ह्यन्ते॑ न॒व वै पु॑रुषे प्रा॒णाः प्रा॒णाने॒व य॑जमानेषु दधति
 प्रा॒यणी॑ये चोद॒यनी॑ये च गृ॒ह्यन्ते॑ प्रा॒णा वै प्रा॒णग्र॑हाः - [] 30

3.5.10.3

प्रा॒णैरे॒व प्र॑यन्ति प्रा॒णैरु॑द्यन्ति द॒शमे॑ऽहन् गृ॒ह्यन्ते॑ प्रा॒णा वै
 प्रा॒णग्र॑हाः प्रा॒णेभ्यः॑ ख॒लु वा ए॒तत् प्र॑जा यन्ति य॒द्वाम॑दे॒व्यं

ॐ॒यो॒ने॒श्च्य॒वते॑ द॒शमे॑ऽह॒न् वाम॑दे॒व्यं ॐ॒यो॒ने॒श्च्य॒वते॑
यद्-द॒शमे॑ऽह॒न् गृ॒ह्यन्ते॑ प्रा॒णैभ्य॑ ए॒व तत् प्र॒जा न॑यन्ति । 31
(तत् - प्रा॒णग्र॑हाः - स॒प्तवि॑ंशच्च) (A10)

3.5.11.1

प्र दे॒वन्दे॒व्या धि॒या भर॑ता जा॒तवे॑दसं । ह॒व्या नो॑ वक्ष॒दानु॑षक् ।
अ॒यमु॒ष्य प्र॑दे॒वयु॑र्हो॒ता य॒ज्ञाय॑ नी॒यते॑ ।
रथो॑ न यो॒रभी॑वृ॒तो घृ॑णी॒वान् चे॒तति॑ त्म॒ना ।
अ॒यम॒ग्निरु॑रुष्य॒त्यमृ॑तादि॒व जन्म॑नः ।
सह॑स॒श्चि॒त् स॒हीयान्॑ दे॒वो जी॒वात॑वे कृ॒तः ।
इ॒डाया॑स्त्वा प॒दे व॒यं ना॒भा पृ॑थि॒व्या अधि॑ ।
जा॒तवे॑दो नि धी॒म॒ह्यग्ने॑ ह॒व्याय॑ वो॒ढवे॑ । 32

3.5.11.2

अ॒ग्ने वि॒श्वे॑भिः स्व॒नीक॑ दे॒वैरू॑र्णा॒वन्तं॑ प्रथ॒मः सी॒द यो॒निं॑ ।
कु॒ला॒यिनं॑ घृ॒तव॑न्तं स॒वि॒त्रे य॒ज्ञं न॑य॒ यज॑मानाय सा॒धु ।

सी॒द॒ हो॒तः॑ स्व॒ उ॒ लो॒के॑ चि॒कि॒त्वा॒न्त्स॒ाद॒या॒ य॒ज्ञ॑ सु॒कृ॒त॒स्य॒ यो॒नौ॑ ।
 दे॒वा॒वी॒र्दे॒वान् ह॒वि॒षा॑ य॒जा॒स्य॒ग्ने॑ बृ॒हद्-य॒ज॒मा॒ने॑ व॒यो धाः॑ ।
 नि॒ हो॒ता हो॒तृ॒षद॒ने॑ वि॒दा॒न॒स्त्वे॒षो दी॒दि॒वा॑ अ॒सद॑त् सु॒दक्षः॑ ।
 अ॒द॒ब्ध॒व्र॒त-प्र॒म॒ति॒र्व॒सि॒ष्ठः॑ स॒हस्रं॑ भ॒रः शु॒चि॒जि॒ह्वो अ॒ग्निः॑ ।
 त्वं दू॒त॒स्त्व - [] 33

3.5.11.3

मु॒ नः॑ प॒र॒स्पा॒स्त्वं॑ ँ॒स्य॒ आ वृ॒षभ॑ प्र॒णे॒ता ।
 अ॒ग्ने॑ तो॒क॒स्य॑ न॒स्तने॑ त॒नूना॑म॒प्रयु॑च्छन् दी॒द्य॒द्वो॒धि गो॒पाः॑ ।
 अ॒भि त्वा॑ दे॒व स॒वि॒तरी॑शा॒नं॒ वा॒र्या॑णां । स॒दाऽव॑न् भा॒गमी॑महे ।
 म॒ही द्यौः॑ पृ॒थि॒वी च॒न इ॒मं॒ य॒ज्ञं मि॑मिक्षतां ।
 पि॒पृ॒तां नो॑ भ॒री॒म॒भिः॑ । त्वा॒म॒ग्ने पु॒ष्क॒रा॒द॒ध्य॒थ॒र्वा नि॑रमन्थत ।
 मू॒ध॒र्नो॑ वि॒श्व॒स्य॑ वा॒घ॒तः॑ । तमु॒ - [] 34

3.5.11.4

त्वा दध्यङ् ऋषिः पुत्र ईधे अथर्वणः । वृत्रहणं पुरन्दरं ।
तमु त्वा पाथ्यो वृषा समीधे दस्युहन्तमं । धनं जयञ् रणेरणे ।
उत ब्रुवन्तु जन्तव उदग्निर्वृत्रहाऽजनि । धनं जयो रणेरणे ।
आ यञ् हस्ते न खादिनञ् शिशुं जातं न बिभ्रति ।
विशामग्निञ् स्वध्वरं । प्रदेवं देववीतये भरता वसुवित्तमं ।
आस्वे योनौ नि षीदतु । आ - [] 35

3.5.11.5

जातं जातवेदसि प्रियञ् शिशीताऽतिथिं । स्योन आ गृहपतिं ।
अग्निनाऽग्निः समिध्यते कविर्गृहपतिर्युवा । हव्यवाङ् जुह्वास्यः ।
त्वञ् ह्यग्ने अग्निना विप्रो विप्रेण सन्थसता । सखा सख्या समिध्यसे ॥
तं मर्जयन्त सुक्रतुं पुरोयावानमाजिषु । स्वेषु क्षयेषु वाजिनं ॥
यज्ञेन यज्ञमयजन्त देवास्तानि धर्माणि प्रथमान्यासन् ।
ते ह नाकं महिमानः सचन्ते यत्र () पूर्वे साध्याः सन्ति देवाः । 36
(वोढवे - दूतस्त्वं - तमु - सीदत्वा - यत्र - चत्वारि च) (A11)

Prasna Korvai with starting Padams of 1 to 11 Anuvaakams :-

(पूर्ण - षयो - ऽग्निना - ये देवाः - सूर्यो मा - सन्त्वा नह्यामि -
वषट्कारः स खदिर - उपयामगृहीतोऽसि - यां वै - त्वे क्रतुं - प्रदेव
- मेकादश)

Korvai with starting Padams of 1, 11, 21 Series of Panchaatis :-

(पूर्णा - सहजान् - तवाग्ने - प्राणैरेव - षट्त्रिंशत्)

First and Last Padam of Fifth Prasnam of Kandam 3:-

(पूर्णा - सन्ति देवाः)

Kanda Korvai with starting Padams of 5 Prasnam of Kandam 3:-

(प्रजापति - र्यो वै - अग्ने - वि वै - पूर्णा - पञ्च)

॥ हरिः ओं ॥

॥ कृष्ण यजुर्वेदीय तैत्तिरीय संहितायां तृतीयकाण्डे पञ्चमः प्रश्नः समाप्तः ॥

॥ इति तृतीयं काण्डं ॥

Details of Anuvakam, Panchati and Padam for Kandam 3

	Anuvakam	Panchati	Padams
Prasna 1	11	42	2248
Prasna 2	11	46	2335
Prasna 3	11	36	1857
Prasna 4	11	46	2392
Prasna 5	11	36	1790
Totals	55	206	10622